

*ASO LUA, 19 IUNI 2018*

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**SAUNOAGA FAAFEILOAI A LE FOGOGA FETALAI**

**FOFOGA FETALAI:** Ou te faasilasila atu ua amatalia nei Taulumaga ma Galuega a le Fono Aoaofaitulafono.

Ua avea leni avanoa taua ou te faatalofa atu ai i le paia ma le mamalu o le Palemene i le afio o lau Afioga i le Taitai o le Malo i lau Afioga i le Palemia, le Sui Palemia faapea foi le mamalu o le Kapeneta, Minisita Lagolago ma Taitaifono ma sui usufono mamalu o le Palemene. Malo le soifua, malo le lagi e mama.

E avea ai foi leni avanoa ou te faatalofa atu ai foi i Faauluuluga o Matagaluega e fia ma Faalapotopotoga a le Malo ua mafai ona tatou faatasi e molimauina Taulumaga ma Galuega a le Fono Aoaofaitulafono.

Ou te fiafia foi e avea ma sui usufono o leni Palemene, ou te faatalofa atu ai ma le agaga fiafia i le paia o fanau aoga ua mafai ona tatou faatasi aemaise foi o le aiga faiaoga.

Mo le silafia e le Maota, ua nofoia nei le nofoaga o tagata lautele e sui auai o le Polokalame Faa-Palemene mo Aoga Tulagalua 2018. E le toe tau faailoaina le faatautaiga o leni faamoemoe o le Palemene mo alo ma fanau aoga. O le sini autu o leni taumafaiga, o le aoaoina lea o alo ma fanau i nafa ma matafaioi a le Palemene o ona sui usufono ma Komiti Faa-Palemene. O se vaega o la latou polokalame i le aso, lea ua auai mai ai e molimauina Taulumaga ma le faasologa o galuega a le Palemene, e ala i lana fonotaga i leni taeao.

E avea ai lou leo e fai ma sui o le Palemene e faatalofa ma faafeiloai atu ai i a outou susuga i faiaoga, aemaise o alo ma fanau ua mafai ona auai i leni foi taeao. O le tatalo, ia agalelei le Atua i taulumaga uma o la outou polokalame i leni aso.

**MALELEGA MAI LE SUI O LE FONO A SUI TOFIA**

*Na fofogaina e le Fofoga Fetalai le Malelega Mai le Sui o le Fono a Sui Tofia.*

**“TUSI mo:**

**Le Fofoga Fetalai:**

**19 IUNI 2018**

**Malelega mai le Sui o le Fono a Sui Tofia**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofa Faitulafono na te iloiloaina ai le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o Puipuiga mai Tupe e Faaofi mai Faasolitulafono 2018.

**TUUIINA ATU** i lou nei Lima i lenei Aso Lulu 13 o Iuni 2018.

**(Sainia): Le Mamea Ropati Mualia**  
**SUI O LE FONOA A SUI TOFIA.**”

**FAASILASILAGA MAI LE TAITAI O LE MAOTA**

*Na fofogaina e le Fofoga Fetala'i le Faasilasilaga mai le Taitai o le Maota.*

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o Aoga 2018.

**TUUIINA ATU** i lenei aso 19 o Iuni i le tausaga 2018.

**(Sainia): Susuga Hon Tuilaepa Auelua Fatialofa Lupesoliai Lolofietele**  
**Neioti Aiono Galumalemana Dr. Sailele Malielegaoi**  
**TAITAI O LE MAOTA.**

**TUUIINA ATU O PEPA**

*Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.49.*

1. P.P. 2018/2019 Nu. 31, Lipoti Faaletausaga a le Pulega o Faailoga ma Tusi Pasi Tauloa a Samoa, Iulai 2013-Iuni 2014.

19 IUNI 2018

### Tuuina atu o Pepa

2. P.P. 2018/2019 Nu. 32, Lipoti Faaletausaga a le Pulega o Faailoga ma Tusi Pasi Taualoa a Samoa Iulai 2014-Iuni 2015.
3. P.P. 2018/2019 Nu. 33, Lipoti Faaletausaga a le Pulega o Faailoga ma Tusi Pasi Taualoa Iulai 2015-Iuni 2016.
4. P.P. 2018/2019 Nu. 34, Lipoti Faaletausaga a le Pulega o Faailoga ma Tusi Pasi Taualoa a Samoa, Iulai 2016-Iuni 2017.
5. P.P. 2018/2019 Nu. 35, Lipoti Faaletausaga a le Matagaluega o Leoleo 2016/2017.
6. P.P. 2018/2019 Nu. 36, Lipoti a le Komisi o le Toefuataiga o Tulafono a Samoa i le Tulafono o Nakoti 1967 (Iloiloga o Fualaa Faasaina), Lipoti Faaiu 21/17, Tesema 2017.
7. P.P. 2018/2019 Nu. 37, Lipoti Faaletausaga a le Matagaluega o Faalapotopotoga a le Malo 2016/2017.

### TUUIINA ATU O LIPOTI A KOMITI FAA-PALEMENE

*Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.52(5).*

1. P.P. 2018/2019 Nu. 38, Lipoti a le Komiti o Tupe Maua ma Tupe Totogi i le Tala Faatatau Lona Lua o Tupe Faaopoopo 2017/2018.
2. P.P. 2018/2019 Nu. 39, Lipoti a le Komiti o Tupe Maua ma Tupe Totogi i le Tala Faatatau Autu o Tupe 2018/2019.

### TULAFONO TAU FAAOFI O TEUTEUGA O LE TULAFONO O PUIPUIGA MAI TUPE E FAAOFI MAI FAASOLITULAFONO 2018 – faitauga muamua

**Afioga Hon SILI EPA TUIOTI (Minisita o Tupe):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Puipuiga mai Tupe e Faaofi mai Faasolitulafono 2018 i lona faitauga muamua.*

*Faaluaina e le Minisita mo Aoga, Taaloga ma Aganuu; Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Faamasinoga ma Pulega Tau Faamaasinoga.*

*Na faamaonia le lafo ma faitauina le Tulafono Tau Faaofi i lona faitauga muamua.*

19 IUNI 2018

**TULAFONO TAU FAAOFI O TEUTEUGA O LE TULAFONO O  
AOGA 2018 – faitauga muamua**

**Afioga Hon LOAU SOLAMALEMALO KENETI SIO (Minisita mo Aoga, Taaloga ma Aganuu):** Ia ua malo afua ailao ua maua i lenei taeao fou i le alofa ma le agalelei o lo tatou Matai. E faalua foi se leo e pei ona saunoa lau Afioga i le Fofoga Fetalai e molimoli lapalapaomalo ma momoli laau i Fogaa aua lo tatou vatapuia ma le Atua i Lona alofa ma Lona agalelei i lenei taeao fou, e faatalofa atu ai.

Ae ua ou tulai atu ma le agaga faaloalo tele i lau Afioga i le Fofoga Fetalai e faatuina le lafo, *Ina ia faitauina nei le Tulafono Tau Faaofi o Teuteuga o le Tulafono o Aoga 2018 i lona faitauga muamua.*

Ma le agaga faaloalo.

*Faaluaina e le Minisita mo Faamasinoga ma Pulega Tau Faamasinoga ma le Minisita o Tupe.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O LE FAATATAUINA O TUPE  
FAAOPOPO (NU.2) 2017/2018 & TULAFONO TAU FAAOFI O LE  
FAATATAUINA O TUPE 2018/2019 – faitauga faalua**

**FOFOGA FETALAI:** E tusa ai ma le Tulafono Tumau 132, o le a faaauau felafolafoaiga i Tulafono Tau Faaofi nei e lua e pei ona valaauina ma e tataua ona saunoa sao lava i Tulaga Tau Tupe ma le Tamaoaiga o Samoa faapea Faiga Faavae tau Tupe a le Malo.

Mo le silafia e le Maota e i ai suiga i le Tala Faatatau Autu o le Tupe 2018/2019 na tuuina mai e le Malo i le aso ananafi, ma ua tuuina atu i le Pepa Faaopopo o Galuega Nu.2.

Ia ma o le avanoa leni mo sui usufono muamua e fia saunoa, e tusa ai o avanoa ma felafolafoaiga e pei ona folasia i lumamea.

Ia ua tulai mai le sui usufono mo Lefaga ma Faleaseela. Tulai mai le sui usufono mo Lefaga ma Faleaseela e saunoa, sosoo ai lea ma le sui usufono mo Falelatai ma Samatau. Malie le sui usufono ua tuai ona maua atu, ae lafo ia i o ia Lefaga ma Faleaseela.

**Afioga TOLEAFOA KEN VAAFUSUAGA POUTOA (Lefaga & Faleaseela):** Lau Afioga i le Fofoga Fetalai faafetai mo lou avanoa, aua se finagalo o lou itumalo o Lefaga ma Faleaseela o lo o nofo tapuai i le usugafono a lo latou tofi faipule, a o alofaiva le Palemene o Samoa aua se manuia o le atunuu.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ia le paia e o le Aiga Satuala ma lo latou Tama, afio le Aiga Taulagi ma le Matua o Satuala, le mamalu ia te oe Tuisavailuu ma le Fale Aana, ma le Tagata o le Vavau. Tapuai maia ae se i taumafai so tatou sao, aua le lufilufiina o le tamaoauga o le atunuu. Ae le gata i lea, o le Tama faaleagaga o lou itumalo, to maia i lea lau faamanuiaga.

Lau Afioga i le Fofoga Fetalai, ia ta piiama ia i lou sa folau i lenei taeao i le viiga ma le faamanu i le Atua i Lana puipuimalu ia Samoa ma ona tagata. Faamalo le soifua manuia i lau Afioga. Fai mai le tala, ÷o manua o le nuu, e matafanua i Saua, ae siufanua i Fitiuta. Ø Ona ou faatulou lea. Fai mai o Tapusalaiia o le motu, e matafanua i Tula ma Utumea, ae siufanua i Falesau, Laloifi, o Faleomavaega, ona ou faatulou lea. Fai mai o Upolu o le motu, e matafanua i Aleipata, ae siufanua i Tulatala, ona ou faatulou lea. O Savaii o le motu, e matafanua i Faasaleleaga, ae siufanua i Tufu ma Toloa, ona ou faatulou lea. O paia na ma mamalu na o Samoa mai Saua seia paia le papa i Tau, lea ua ao ma ua atoa lio o le masina i Tiafau tauave, o le Malae o le Faautugatagi a Samoa. Aua Tama ma o latou Aiga, Aiga ma o latou Tama, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti, tulou.

Avea foi lenei avanoa taua ou te ofo alofa atu ma ou faatalofa atu i lau Afioga i Lana Afioga Mamalu, O Le Ao o le Malo Tutoatasi o Samoa. Lau Afioga i le Tuiaana Tuimalealii fano Vaaletoa Sualauvi II ma lau Masiofo. E faatalofa atu foi i lau Afioga i le Sui o le Fono a Sui Tofia, lau Afioga Le Mamea Ropati Mualia ma lau Masiofo. Afio lau afioga i le Faamasino Sili ma le Ofisa o Faamasinoga, lau afioga Tiavaasue Patu Falefatu Sapolu ma lou Faletua.

E faatalofa atu i lau Afioga i le faauluuluga o le Malo o Samoa, lau Afioga i le Palemia, Susuga Tuilaepa Sailele Malielega, a lafalafa Tuna, o lena ua atoa ia oe Aiga o Samoa, e amata mai Atua seia paia Aana. Lau Afioga i le Sui Palemia le Kapeneta, aemaise le afifio o outou Afioga i Minisita Lagolago, lau Afioga i le Fofoga Fetalai ma le Palemene, malo afua ailao ua maua lenei aso na lupe, aua se manuia o Samoa mo a taeao. O le paia lena o le Tafatolu o le tatou Faigamalo. Faamalo atu foi i Faauluuluga o Matagaluega ma Faalapotopotoga a le Malo, faapea pisinisi tumaoti o si o tatou atunuu, malo le galulue aemaise ia tatou paaga mai fafo, o lo o fesoasoani mai aua le atinaeina o le atunuu.

E le faagaloina foi le Aufai tatalo i so o se fatafaitaulaga e fia i taitai o Ekalesia i totonu o si o tatou atunuu faapea le Aufaigaluega galulue o lo o tatalo leoleoa aua se manuia o le nuu o le Atua. E faapea foi ona faatalofa atu i alo ma fanau, ua mafai ona tatou faatasi i lenei taeao, ona o le alofa ma le agalelei. E faatalofa atu foi i le tapuaiga a Samoa i ona tulaga faalupe aua Aiga o Tupu, Aiga o Nofo, Aiga o Papa, Faleupolu tofia. Le Faigamalo a Tutuila ma Manua, lau Afioga i le Kovana Sili ma le faletua, le paia lava lea aua Fatulegaae ma Malotumau i Laloifi ma Falesau, Utumoe ma Gagaemoe, o paia na o le Faleagafulu, ae a Tootoo o le Manuatele.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Lou itumalo, malo tatalo, e lagona e la outou sui usufono le mafanafana i so o se taimi, ona o lau tapuaiga, malo faafetai. Ae le i faia se taofi o lenei itumalo i le Tala o le Tupe, e muamua ona momoli le agaga faamalo a lenei itumalo i lau Afioga i le Taitai o le atunuu, faafetai mo atinae lelei aua se manuia o Samoa. Faamalo atu i le Kapeneta, o le fautuaga a lenei itumalo, aua ne i apoina le pola ua pala lona afasisi, ae ia taulai pea lau silasila mamao, ma ia loloto pea lau tofa, aua Samoa mo a taeao. Ae aua ne i galo, o oe o le ua faalanu maaveave, o le lelei, o le leaga, a ia lava pea le uta ma le moe.

Lau Afioga i le Minisita o Tupe, e momoli atu le agaga faafetai mo le galuega fita sa feagai ma lau Afioga ma le Matagaluega o Tupe, le tau faasoasoina o nei seleni, aua le faia o atinae o si o tatou Malo. So o se pisinisi o le a sauni e atinae, a le nono i faletupe, e le mafai ona faatino ma fua mai, semeamanu o lena e maua le avanoa, e mafua foi ona faigofie mai nonogatupe, o lena e lelei ona totogiina a tatou aitalafu. O lea ua tataua ona tatou agai i luma, aua le faalagolago i tala salatua, ua 56 tausaga o Samoa, ua tele lona suiga. O lona uiga, e le mafai, le mafai ona tatou tutu i se mea e tasi, ae tataua ona tatou migoi, leaga ua televave le lalolagi.

Lau Afioga i le Minisita mo Galuega, Felauaiga ma Atinae Eseeese, e le faigofie lau avega, o lena ua taoto atu la matou talosaga i a matou auala galue, ae tatalo atu i lau Afioga mo lau faasoaa. O le auala lea i le mataaga lea o Matareva lau Afioga, ia lena sa e afio atu i le polokalame lea sa tatala i ina ma ta feiloai, ia o lena ua e silasila i le auala. E taua tele lea auala, e auala atu ai se talosaga i lau Afioga, ia o le faatupulaia o tagata tafafao maimoa mai fafo i lea mataaga, ia ma le taumafai foi o le Afioga ia Togia o feagai ma lea mataaga ma taumafai le atinae, e moomia le faaleleia o lea auala e alu i tai.

O le auala galue o Matautu lau Afioga, e tatalo atu ma le agaga faaaloalo i lau faasoasoa, i ou faiva alofilima, ia o le auala o lo o fia faaleleia. O le auala i Gagaifo-uta agai i tai, lea sa faatinoina e le Matagaluega, ia maimau pe ana faapea e uma ona sua ma tapena ona faata lea. Ia lea ua alu lea seleni i lea galuega, ia alofa ifo lau Afioga i lea auala. O le auala agai atu i Savaia-uta agai i tai, lau Afioga ua moomia se fesoasoani a le Matagaluega se i alofa atu mo lea auala. O le auala o Tafagamanu lau Afioga i le Minisita, e moomia foi le fia faaleleia o lea auala. O le auala lea o Safaatoa-uta agai i tai, o le amataga o le auala o lo o lelei, ma le agai i lalo, ae na o luga lava o le auala lau Afioga i le Minisita, e moomia i ai se fesoasoani. Ia tuu atu pea i ou autafa le auala o le afioaga o Faleaseela, i lau faasoaa ia ma le auala lea e talosaga atu i lau Afioga le auala lea i Matafaa, ia lena ua maua le tala mai i lau Sui Minisita po o lau Minisita Lagolago, o lea ua maea mai le lua asiasiga. Ia lau Afioga i le Minisita, ia manuia ou faiva alofilima, ia ma le auala lea e sosoo ai Falelatai ma Samatau ma Faleaseela, o lo o manaomia lava se fesoasoani lau Afioga i le Minisita.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E tatalo atu foi i lau Afioga i le Minisita, se i e silasila ifo i nai taavale laupasese foi ia ua le mafai ona toe laiseneina e lau Matagaluega. E moni ua umi tausaga, afai o la e lelei le condition, ia o le mea taua lea e tatau ona silasila i ai le LTA aua le agai i luma o nai ia foi aiga aua le atinae o pisinisi o lo o tua foi i ai latou.

Ona ou agai mai lea i le Minisita mo Pisinisi Alamanuia ma Leipa. Lau Afioga i le Minisita, e tatalo atu i lau Afioga i le Minisita, faafetai tele lava mo galuega faavaitaimi i Niu Sila ma Ausetalia, lea ua maua galuega faavaitaimi mo tatou tagata, e mafai ona agai atu ai i Niu Sila ma Ausetalia ma maua ai a latou galuega. Faafetai atu ai i le Malo mo ia galuega lelei, aua se manuia o le atunuu.

Ae tatalo atu ai i lau Afioga i nisi Tulafono o le Matagaluega, e pei o nisi o le aufaipamu lea ua maua tala lea ua faatonuina e le Matagaluega e manaomia mea ia o forklift. Ia ae silasila foi lau Afioga i le Minisita, e utiuti lava le pasene o lo o maua e nai ia foi aufaipisinisi aua le atinaeina o le atunuu. O lea e tatalo atu i lau Afioga se i e silasila atu i ia tulaga. O le tatalo foi a lou nei sui usufono lau Afioga i le Minisita o Pisinisi, se i fesoasoani ifo i le vaega o le Private Sector, aua o lea tatou te iloa, a galulue faatasi le Malo ma le Private Sector, e fesoasoani i le atinaeina o le tatou atunuu, masalo e tele le fesoasoani a le Private Sector i le tatou Tala o le Tupe aemaise ia le tatou tamaoaiga. O lea e tatalo atu i lau Afioga aua a faatusatusa le pasene o tagata faigaluega a le Malo i le Private Sector, masalo po o le 60% le Private Sector ae 40% lea e faigaluega i le Malo. O lea e tatalo atu ai ma le agaga faaaloalo i lau Afioga i le Minisita, se i e silasila ane i lea tulaga ma le agaga faaaloalo.

Lau Afioga lava i le Minisita mo Pisinisi ma Alamanuia, e momoli atu le agaga faafetai ma le agaga faamalo i lau Afioga, ona o le taumafaiga o le tatou vaalele. Malo le tau malo le finau, masalo ua maua mai nisi o tala mai Niu Sila ma Ausetalia, ua amata ona lagolago le tatou atunuu i le tatou vaalele. O lea e momoli atu ai le agaga faafetai, pau lava lau tatalo, se i e talosaga ifo i le Minisita mo Galuega, pe le mafai ona faatelegese le tatou togiina o le tatou landing fee foi lea, ae se i tau tuu se avanoa se i tau galue ai le tatou vaalele, ia maua sana tupe faasili aua le lima tausaga. O le tatalo atu lea a lenei itumalo i lau Afioga i le Minisita.

Lau Afioga i le Minisita mo Galuega, Felauaiga ma Atinae Eseeese, o le mea ua pau ia au o le Faalapotopotoga lea o Vaa o Samoa lau Afioga, e momoli atu le agaga faafetai i lau Afioga mo galuega lelei ua faatinoina mo tatou uafu ia i Mulifanua ma Salelologa. Malo faafetai ua tele le suiga o ia uafu, ona o le galuega o Faalapotopotoga o Vaa. E maua foi o lenei faalapotopotoga e le manaomia se tupe a le Malo e atinae ai lea faalapotopotoga. Maimau pe a faapea uma Faalapotopotoga a lo tatou Malo, e le manaomia se tupe ae aumai lana tupe faasili, ia aua le fesoasoani i le Tala o le Tupe a le tatou Malo e faatino ai nisi o galuega o talosaga atu ai lau Afioga.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ona ou oo mai lea i le Afioga i le Sui Palemia, po o lau Afioga i le Sao Faapito, o le taligalu o Gagaifolevao ma Faleaseela lau Afioga, masalo ua tele ina aia tuamaota ma tualaoa o nei afioaga, e moomia lava se fesoasoani a lau Matagaluega.

Lua lau Afioga i le Minisita mo Punaoa Faalenatura ma le Siosiomaga e tatalo atu pea i lau Afioga i le mea lea o le pemita o le fauina o maota ma laoa i le vaega lea o le PUMA. Masalo o la e lelei le process, ae o le mea lea e tupu, e fai lava si tuai lau Afioga i le Minisita. Se i silasila ifo i le faatinoina o lea faamoemoe, a leai, e pei e manaia pe a toe faafoi i le Ofisa o Galuega, e pei ona masani ai lo tatou atunuu. O i ina sa vave ai ona faatino ai pemita ma ata ma le faatinoina o na tulaga, aua le fauina o maota ma laoa.

Ona ou oo mai lea i le Minisita mo Tina ma Tamaitai, Atinae o Nuu, Afioga ma Agafesootai, e momoli atu le agaga faafetai o lenei itumalo i lau Afioga i le Minisita, ona o le tatou ie sae po o falelalaga a nuu ma afioaga lea ua maua ua siitia le tulaga ua i ai ie. O la ua oo i le 500 ia toga aua lea faamoemoe lelei o le Malo. Ae pau lava si au talosaga, se i silasila ifo lau Afioga i le Minisita i seleni a nai komiti. O lea e maua e uma ona toe agai lea o tina i le Ofisa o le Tupe, e saini mai le tagata lea e open ai le siaki, faatoa afio mai i le faletupe. A lea foi ua manaia le taimi lea e faatino ai faamoemoe o nai komiti, o lea e amata i le taeao, o lona uiga, e toe faatali foi nai tina e afifio i le Treasury se i afio atu le tagata lea e sainia siaki, e open mai, ona faatoa afifio lea i le faletupe. Ia ae silasila lau Afioga i le Minisita, o nai tina, e ta le 4:00 i le vaveao, ua afifio mai aua lo latou faamoemoe. E tatalo atu i lau Afioga i le Minisita, se i e silasila ifo i ai ma le agaga faaaloalo.

Lau Afioga, ae le i faaiuina sa matou tala ma le agaga faaaloalo....

**FOFOGA FETALAI:** Malie le sui usufono o Lefaga ma Faleaseela, se i tulai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia):** Lau Afioga i le Fofoga Fetalai. O le mataupu lea ua leva tele ona taumafai le tatou Malo e uunai tina ma Faalapotopotoga a Tama ma Faalapotopotoga o Taaloga, se i taumafai ia e fai ni a latou tusitupe, e teu lelei ai a latou seleni. O se mea lelei le teu aua o le mea lava e masani ona tupu, e avatu loa taape ae tupu mai loa mo mea e manao i ai ae ua leai se tupe.

E oo lava i ai tatou foi o alii ma faipule o nuu, a tatou toe manatunatu e tele lava foi o nuu, e maua mai loa tupe e manao lava e tufa. Ae a tupu mai loa ia faalavelave ona faatoa manatunatu lea sa tatau ona teu ia tatou seleni. Aua ne i o tatou fiu e fai mo mea o lesona lelei mo tatou tagata, ona o le mea lava lea mo le manao vave e avatu loa lava tufa. O le isi mea, e o mai isi avatu tupe, e oo atu i tua ua leai ni seleni mo loomatutua tonu e agai i ai le fesoasoani. E le o se mea leaga la le mea lea e taumafai i ai le Malo e fai, o se mea lelei e fai fai lava masani.



19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le tele foi la o isi afioaga o la ua fai ia latou tusitupe ona o le taumafaiga lava o le tatou Malo. Ae o le agaga tasi o nei mea, ia puipuia a latou seleni ia oo tonu i e tatau ona oo i ai seleni nei. E atoa le tausaga o fai le latou galuega, o le mea lena e taua tele ai le faamasani o tatou tagata i teugatupe. E oo mai lava i le taimi lenei, o le matua tele o mea tau fufulu aemaise lava mea nei o faalapotopotoga, e oo foi i Faalapotopotoga tau Lakapi, o faalapotopotoga tau taaloga. Tasi ia o faalapotopotoga o le matua aitupe lava o tagata, ae mumusu tele e fai mea ia. O le mea la lea, aua tatou te naunau foi lele e fai le mea fai mai tagata e fai, e pei e foliga e faigofie, ae o i ina tonu lava e tutupu mai ai le anoano o mau mea piopio.

**FOFOGA FETALAI:** Ia e aoga foi le laga mai e le sui usufono o le mataupu ua maua ai le fautuaga a le Malo. O le mea masani lava lena o lea e tupu, ae tautuana ma le sui usufono. Tulai mai le sui usufono e saunoa.

**Afioga TOLEAFOA KEN VAAFUSUAGA POUTOA:** E momoli atu le agaga faafetai i le fesoasoani mai a le Afioga i le Palemia.

Lau Afioga i le Fofoga Fetalai, o le sao lena o lenei itumalo i le Tala Faatatau o le Tupe. Ae matou te tatalo atu pea i nai mea e fia faaleleia o lo matou itumalo, e lafo atu i le Kapeneta ma le Malo. Ae o lo o matou galulue pea ma o matou faatalitali mai, po o le a le taimi e oo atu ai le faasoa.

Ia manuia lau Afioga i le Fofoga Fetalai, le Palemia ma le Kapeneta, le Palemene faapea lau tapuaiga Samoa. Lo tatou itumalo, o lo tatou sao lena, aua le Tala Faatatau o le Tupe. Manuia le Fonousu a Samoa. Soifua.

**FOFOGA FETALAI:** Malo faafetai. Ia e le laeia le saunoaga a le sui usufono mo Lefaga ma Faleaseela, ae avea ia mea aanoa e aumai e faamaumau e le Malo aua le itumalo. Malo le saunoa i lau Afioga i le sui usufono mamalu mo Lefaga ma Faleaseela.

Tulai mai lau Afioga i le sui usufono mo Falelatai ma Samatau.

**Afioga TAEFU LEMI (Falelatai ma Samatau):** Faamalo faafetai i lau Afioga i le Fofoga Fetalai.

E matautia faatulou i le paia o le Maota, o le Maota o le Fonousu a Samoa, po o le Maota tulutuluitao ua soo ona taiao, o le Maota Faitulafono e faia upu a Samoa.

Matou te faatalofa i lau Afioga i le Fofoga Fetalai ma le paia o le Palemene, lau Afioga i le Palemia ma le Kapeneta ma le paia o le Faigamalo, ia ae a sui usufono mamalu o le Fono Faitulafono a Samoa.

E faatalofa i le tapuaiga a Samoa i ona tulaga faalupe, lau Afioga O Le Ao Mamalu o le Malo, lau Afioga i le Tama Aiga Tuimalealiifano ma lau Masiofo, faapea le Sui o le Fono a Sui Tofia, le paia i le Afaigaluega Totofi a le Atua i so o se fatafaitaulaga o lo outou tauasuina ai le Ipuvai o le Ola aua se manuia aua Samoa ma lona Malo.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E faatalofa i le paia o si ou itumalo, le paia o le Aiga Tauaana i le Falefitu o le ati Tagaloa, ae a Falelatai ma Tagata o le Vavau. E faatalofa i si ou nuu o Samatau i le afifio o le Usoalii, ma le Gafa Fiame ma le Tamaitai, ia alaalatai le saofaiga ia te oe Leulumoega.

E faatalofa i le paia o Samoa ua potopoto ae a le fita faafogafoga i le Fonousu a Samoa i lenei taeao, le paia aua Aiga ma Tama, o Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ou te faatalofa i lenei taeao i le susu mai o Faauluuluga o Matagaluega e fia o Faalapotopotoga a le Malo e tapuaia le Fono a Samoa. Ae a le susu o pule aoga ma komiti aoga, ae a le fanau aoga o lo o tatou mafuta e tapuaia le Fono a Samoa.

Lau Afioga i le Fofoga Fetalai, ou te faafetai tele mo le avanoa ua tuuina mai, ae ou te le i agai atu i le tamaoiga ma le aotelega o i ai le tulaga o le Tala o le Tupe, tau lava ina momoli atu lau faafetai, e avea ai au ma sui o le toasefuluvalu na faauuina i le Aso Tofi na tea nei i le faauuga a le Iunivesite o le Pasefika i Saute. Ia e faamata e faatauvaa lava le taumafaiga, ia ae na matuai iloga lava ona faatino ma tino mai le faamoemoe o nai sui usufono mamalu o le Palemene pei ona molimau e le Iunivesite o le Pasefika i Saute, ua faatu ai e le Palemene o Samoa se matatia i le Pasefika, ae ua molimau foi le UNDP po o Malo Afaatasi, ua faatuina e le Palemene o Samoa se matatia i le lalolagi, i le mea nei o aoga faia mo sui usufono o le Palemene, o latou o taitai o le atunuu, ae ua manatu lava, e toe aputi le tulaga lea, aua se sao lelei i le atinaeina o le Palemene o Samoa.

E momoli atu ai le agaga faafetai tele i lau Afioga i le Fofoga Fetalai, faafetai i le Afioga i le Palemia e tusa ai o le savali faaaloalo i le Aso Lua i le taeao, faafetai i le Sui Palemia, ia sa fai lava ma sui o le tatou Malo i le aso i lea taeao i le faauuga, aemaise foi ia le faaaloalo i le afiafi. O le agaga faafetai lea lau Afioga i le Fofoga Fetalai e faaleo aua lenei aso.

Ae o le Tala Faatatau o le Tupe, e i ai lava le maitau o se tala fiafia, o se tala fiafia ua alualu pea i luma, toetoe lava a tatou ausia le \$1000miliona o le tamaoiga o le tatou faasoa le lufilufi lima lelei o lau Afioga i le Minisita o Tupe. O le mea lea e momoli atu ai le faafetai, e mitamita fai ae le mafaufau i atinae e mafai ona tatou faatino, e faatino e ala i atinae i so o se vaega eseese o Samoa, o le malae vaalele, toetoe lava a maea lelei, ia e fai foi ma o tatou mitamitaga. E i ai le tuualalo lau Afioga i le Minisita aemaise foi le Afioga i le Minisita mo Galuega, ia ua ta manatu lava i le atinae o le tatou taulaga, aua ua ou iloa ua i ai si alafua lea ua faataatia, a o se alafua ua leva lava ona tataua ona i ai. E i ai le fautuaga po o le tuualalo, so o se taimi lava e faatino ai se atinae i totonu o le ogatotonugalemu o le taulaga o Apia, ia aua o le taimi lenei, o atinae fou ma fale fou, maualuga le faavae, ia ona malosi lava lea o le malosi, ia ae faaletonu lava le limavaivai.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le tuualalo la, ia faia se faiga, faataoto ni taiala, alafua, so o se galuega fou e fia faia i le taulaga, pe pisinisi pe aiga taitoatasi, ia faapena ona lifi malie i luga ia le lotoifale o le taulaga o Apia, atonu o se taimi i le lumanai, ua faapena ona siitia uma le faavae o le taoto ai o tatou laufanua ma tulaga faapena i le taulaga, ia ma faigata ai ona lofia i lologa. Pei na ona faamaalo iuofe atu faapena, ae o lena e i ina le atoaga o se vaivaiga o lo o taumafai atu ai. A o le agaga maualuga, ina ia malupuipua le taulaga i taimi o timuga ma afa ma le taimi e lolovaia ai.

Lau Afioga i le Fofoga Fetalai, e aoga tele si polokalame sa ou taua, aua ma mautu ai le manatu ma malamalama atili ai i le faatinoga o galuega a le Palemene. O le Maota lena, ia o le Maota e fai ai Tulafono a Samoa, ma e leai foi se isi e na te suia se isi lava matalalaga pe sii se isi matalalaga i Tulafono ua uma ona faataoto atu e le Maota lena. Ona i ai lea o le manatu lau Afioga, ia a lailoa lo tatou Malo e tau faamalamalama ia ma tau faapulapula tulaga uma o le Tulafono, ae i ai lava le talitonuga o lena sui usufono ma lena itumalo, e pasia loa le Tulafono, ua Tulafono, avea loa ma Tulafono. O la ua taoto totoga ma itutino eseese o le Malo e faatinoa aulape eseese o lea Tulafono ma lea Tulafono.

O le mea la lea o la ta ita tuualalo i lo tatou Malo, soia ia, tatou tapuaia faiva o ia itutino o le auaunaga e tautuaina o le tatou Malo e ala i Tulafono ua tuulima ma tuuaa atu e lo tatou Palemene nei. Ia tatou faatuatua i le Atua, aua o le galuega lena ma le Maota lena, ia o lo o faamemelo mai i ai Samoa. O le Maota e vete ai upufai o le Malo o Samoa, e leai foi se isi i tua atu o le Maota lena e na te suia, se i vagana foi o se tofa i ina lau Afioga i le Fofoga Fetalai aemaise o lo tatou Malo, ina ia mafai ai ona toe fetuutuunai. Ia o lata lea tuualalo.

Lau Afioga i le Minisita mo Galuega, Felauaiga ma Atinae Eseese, faafetai tele lava. O le vaiaso na tea nei, ia sa tatala ai se auala sa matou talosagaina mo se taimi umi, ia ona o le aai o si o matou nuu i Samatau, ia o le aai fou, ua silia ma le luasefulu agai i le tolusefulu tausaga o nofoia, ia sa taumafai atu lava ina ia faaleleia lea auala. Faafetai i lau Afioga i le Minisita, ma e ou te faamanatu pea ma ou tatalo atu pea, leai e le o se auala galue le auala sa faatino nei, o le auala lava o le aai o si o matou nuu, ia a fai lau faasoia, a totoe se tupe mai auala galue o si ou uso a sui usufono na lauga nei mai Lefaga ma Faleaseela, a totoe lava sina seleni, alofa ane isi ou itumalo i le tulaga o i ai ia auala galue, ona e feoloolo auala galue e le i oo i ai le faasoia lau Afioga, ae na ona ou toe faamanatu, e lagolagoina malosi e lena itumalo le faiga lea o lo o tau faataoto mai, teu tatou auala, taatia le ta, seia i ai se taimi, ae teu o tatou auala, ua fia oo itumalo ma nuu i le vaega o fanua ma eleele e galulue ai, ia ae ua faigata auala.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ou te toe tatalo atu ai i lau Afioga i le Minisita, ia se i alofagia oo atu lau fesoasoani ia ma faasoa foi aua auala galue o lenei itumalo aemaise foi o le tele o itumalo e pei ona taua. Ua afaina tele le auala e fesootei ai Falelatai ma Samatau ia ma le la itu o le tatou motu nei o Upolu i Lefaga ma Faleaseela, pei ona taua e le sui usufono mamalu na saunoa nei, ia taatia atu i ina.

Lau Afioga i le Minisita mo Aoga, Taaloga ma Aganuu, o le Matagaluega o Aoga sa faaleleia le auala lea o le Kolisi o Aana i le Paeaiga na tea nei, ona o le limavaivai foi o le faasoa a le Minisita mo Galuega, ia aapa ma loa le Minisita mo Aoga i lenei taimi teu le auala lea. I le itu auala le faleaoga lea o le Kolisi o Aana Nu.2, leai e fai sina maotua, ia sa misi i le faasoa o tatou pasi foi nei e uia, e ui lava e mamao, ae tatalo atu i lau Afioga ia o lo o uia pea lea auala e fanau aoga o faiaoga aemaise o matou nei o komiti aoga, ae tatalo atu i sau fesoasoani le Minisita mo Galuega i le faatinoga o galuega ia.

Lau Afioga i le Fofoga Fetalai, manuia tele le Fonousu a Samoa i lenei taeao.

**FOFOGA FETALAI:** Malo faafetai, malo saunoa. Se i tulai mai le sui usufono mo le Itumalo Tu Taulaga Sisifo.

**Afioga FAUMUINA ASI PAULI WAYNE FONG (Itumalo Tu Taulaga Sisifo):** Faafetai i le alofa o le Atua i lenei taeao, lau Afioga i le Fofoga Fetalai, aemaise foi o le Fonousu a Samoa i lenei aso, viia Lona agalelei.

Afio lau Afioga i le Palemia, faapea foi le Sui Palemia ma le Kapeneta, aemaise foi o latou sui lagolago. I le itu ia Samoa, o le a ou le oo i ai, o lea ua uma ona oo i ai si ou uso lea mai Lefaga ma Faleaseela, ia o lenei foi ua oo i ai le isi ou uso lea mo Falelatai ma Samatau ma le la itu. Ae o le a faaoga se laolao lea e avatu nai mataupu ia lau Afioga i le Fofoga Fetalai, e ala atu ai aua se lelei o itumalo aemaise foi o le atunuu.

E muamua ona faafetaia lau Afioga i le Minisita o Tupe mo le Tala o le Tupe maeaea, e ui lava ina faanoanoa e le lava, ia ae ou te iloa o lea o le a sacrifice le service a le public service, aemaise foi le mamalu o le atunuu, ona o le tau faasoasoina o le tatou tupe, ae talitonu le agaga, ia e toe oso foi le la i lea tausaga. A aumai o le a maua se ai e sili atu i lo le ai o lo o i ai i le taimi lenei. Faafetai i lau faasoa i le utiuti o le tatou seleni. E i ai le mea sa tulai mai i le vaitaimi lea ua tea atu nei, sa i ai le ma malaga ma le Afioga i le sui usufono mo Lefaga ma Faleaseela, ua uma ona ma sauni ua toe lava o le oso i le vaalele, uma foi ona fai ma umu e momoli i Niu Sila ma o atu a ma ma o atu ai, ae toe logo mai, ua leai se tupe. Ia sa nofo filemu lava ma le faanoanoa, ae leai se mea o i ai. O le mea taua lava, a o aoga atu i se isi Matagaluega, ia lelei, ae sa tuu ma te o ma te talanoa ma lou uso i fafo i tonu o le ma itumalo i Lefaga ma Faleaseela.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

A o le mea taua i leni aso lau Afioga, o lea ua faasoa mai, ua lava le faasoa. A na faapea e ave uma i le Matagaluega o Galuega i le Afioga i le Minisita, o i ina lea e ola ai tatou, ola ai Samoa. O lea mea e aupito sili ona taua i le Afioga i le Minisita, o le fuafuaga po o le miti lea a le Malo i le uafu lea i Vaiusu, manaia le fuafuaga. Ae se i e manatu ifo lava lau Afioga i le Minisita i nuu o lo o aafia, Vaigaga, Vaiusu, Vailoa ma i latou uma e nonofo i le bay o Vaiusu, pe mafai ona maua se tatou fesootaiga. Ou te talitonu, a malamalama lava nuu ia, e leai lava se faigata, ae a faapea o le a alo lava la outou vaa, a o leni e faatalitali atu, ia ona i ai laia o se faanoanoaga. E manaomia se tulaga ina ia...

**FOFOGA FETALAI:** Ia se i tulai mai le Minisita mo Galuega, Felauaiga ma Atinae Eeseese.

**Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai, e le fia faalavelaveina le saunoaga matagofie a le sui usufono mamalu. Ua ou tulai atu lau Afioga ona o le tapenaga lea e saunoa i ai le Afioga i le Minisita, e le i ai se tulaga ua faamaonia, o le tapenaga foi lea ou te talitonu e i ai lava le fuafuaga mo consultations e faatino mo afioaga ia e aafia, a o le tulaga o le Vaiusu Port lea e saunoa i ai le sui usufono mamalu, e le i i ai se faaiuga po o se faatalatalanoaga foi a le Malo, ina ia i ai se tulaga mautu e faataunuu ai lea miti ae o le miti lava e tatau ona faataunuu i se taimi, ma lou faaaloalo lava.

**FOFOGA FETALAI:** Malo, tulai mai le sui usufono.

**Afioga FAUMUINA ASI PAULI WAYNE FONG:** Faafetai i lau Afioga i le....

**FOFOGA FETALAI:** Ia malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, masalo o le mataupu leni ua leva ona oo i ai ia lau faasilasilaga, ma ua le faatasi foi pe faalua, ae faapena mea nei o fuafuaga a le Malo. E i ai lava ia fuafuaga e fai ma faasilasila, ae o upu uma lava sa ou aumaia, o lea e i ai ia fuafuaga o lea e fai faatalanoaga, ma o le taimi lava e faamaea ai loa talanoaga, ia ona faatoa talanoa loa lea ma nuu ia. Ia o le a tuu fua e talanoa e le iloa pe faatino e maua tupe? Ua uma foi la ona ou faailoaina, e mafai ona faia i le tulaga o le faanonogatupe. Ae i ai le faaeteetega i i, ona e fai foi ma tatou tilotilo i le maualuga ua oo i ai a tatou nonogatupe. O lea la e taumafai tatou, ina ia saili mai ni grants e faatino ai, ona e le gata ina tele le fuafuaga, ae tele foi ma le tau.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

A o le mataupu leni, o le mataupu na laga i le tausaga e 1970, 1971, 1972. Ma e ua taoto foi ia suesuega faainisinia. O le fautuaga a inisinia i le taimi lena, aua le faia le uafu e aua ne i toe agai tele i Matautu, ae agai loa i i i Vaiusu, ona o Vaiusu e tele lava le faasaoina o le atunuu. E le gata ina mafai ona faalauaitete faatele, ae i ai le mea tele na e faaletonu na e i ai i Matautu, o le malosi o le au, o le au la lena, lea e tatui ai ia vaa agai i le uafu. A fai lava la le uafu ma omai vaa e taula ai, e tui tui lava malepe le uafu, e le gata la ina malepe le uafu, ae leaga ai ma vaa.

O le ala la lena o lea e ala ai ona alofia e vaa ia le uafu i Matautu. A o Matautu foi la, o lea e feagai tonu lava ma le tafe mai o le vaiatafe, ma atili alu ae ai i luga le papau ona o le oneone lea e aumai mai uta. Silasila foi i le oneone la e faulai i luma o le fale o Aggie Grey, e matua tele lava le oneone lea e sau mai i tafega nei. O lea e alu atu lava ma atili papau ai pea le uafu lea. O le faatinoga o mea ia ma le sao o mea nei, lau Afioga i le Fofoga Fetalai, a lea na iu lava ina toso atu ai ma le tatou vaa apilitia i luga o le le uafu le Forum Samoa, ma o le Forum Samoa na lea sa faalagolago i ai le PFL. A o le a la le mea na tupu? Na ona apilitia lava e 3 ea pe 4 masina lea na i ai le vaa i luga o le aau, e oo i tagata na omai e moulu i lalo, na matua le mafai lava ona fai se mea. O le latou tali e le mafai lava ona toe faasaoina le vaa, ona ua matua malosi lava ua tele le mea lea e tietie ai le vaa i luga o le aau. O le mea lena o lea e feagai nei ma le tele o vaa, ua oo i le malosi o tatou vaa toso vaa, e le gafatia le malosi o le au. Ia o lea foi la na faasalalau, ua fiu le aumaulu e omai mai fafo, ua matua leai lava se togafiti e mafai ai. Ae o le a le mea lea na tupu? O lea e pepese ai lava latou na feagai ma le vaa, o le vavega le mea lea na tupu, lea na faasalalau mai, o le vavega, o talosaga ia na mafai ai ona sau i tua le vaa. A ua paso ia latou na omai, e matua leai lava se malosi e mafai ai ona toe faasaoina le vaa, o lona uiga e pala ai lava i luga o le aau. Ma o le iuga lena o lea na iu ai lava ina gau ma le PFL, ma faasalalau ai e faatau faalauaitete. Ona o atu loa lea o tatou aveese mai, o lea la ua pulea e tatou le PFL, e ui lava sa tele le tauemu, ma faapea ane, oi e gau le PFL ae o atu tatou e aumai le mea gau.

O le a la le mea lea ua i ai nei? O lea ua polofiti le PFL. E pau lea o se Kamupani Vaa e pulea e Samoa ae leai ma se vaa e tasi. Ae o le faaaoga o le mea o le mafaufau, faaaoga mo mea o facilities, mo aseta a le Malo, lea ua iu lava ina pipii mai loa ma isi vaa tetele, lea la ua fai ia le tatou faiga paaga, lea ua polofiti le PFL.

Ua ala la ona ou taua atu le mea lea, ona e tele mea ia e agai i ai ia fuafuaga a le tatou Malo. O lea foi ua uma ona ave i o i Saina, o lea o le a faatali lipoti e aumai, e fa ia suesuega na fai. O suesuega nei e fa, pe tatau ona faaauau pea i i Matautu pe tatau loa ona agai i o i Vaiusu? E tasi lava le mea lea e tau mai, e aupito i maoae lava ia manatu faainisinia o o i Vaiusu e tatau ona fai ai le uafu. A o mea uma la na, e faalagolago i le maua o le grant e faatino ai mea ia. O lea la e faatalanoa, ua leva foi ona ou tautala mai ai lava o lea lava e faatalanoa.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E lua la fuafuaga a le Malo e le gata i i, a o o i Asau o lea e faatalanoa. O le mea lea ua i ai nei, ou te manatu o se vaimea o le 50% i le 60% lea ua i ai le tulaga o le tatou faiga paaga i le ioeina, a na faapea e fai atu le Malo fai loa i se soft term loan, ua leva ona sau le ioega. Ae pau lava le mea lea e faatalitali i ai, e tatou te manao e fai i le grant, e i ai le mafuaaga e ala ai ona tatou agai i le grant ona o lea e i ai vaegatupe tetele ia e faalala mai e a tatou faiga paaga, o la e aumai ai ia le tele o le seleni e mafai ai ona atinae, i le tulaga o le faameaalofa. O lea la tatou te uunai lava le mea lena e oo mai i le taimi lenei.

Lau Afioga i le Fofoga Fetalai, o le faamalamalamaga atoa lena. Ou te faamalulu atu pe afai o lea e tatou te sese, aua o le tele ia o le sese lea e fai nei e faasalalau mai i nusipepa, ae aua tou te faitau nusipepa ae faalogologo i polokalame o lea e faalauaitetele mai ai mea a le tatou Malo. A faalogologo lelei lava i ai, o le upu la e faaoga e au, o lea e faatalanoa le mataupu. Se i uma la se i maea lelei le faatalanoaga o le a fai, ia ona faatoa fai loa lea o mea na. O le mea lena e fai atu ai e mataga le o atu nei fai talanoaga ae faalogo atu e leai se mea e faia. E pei foi la o le tulaga ia i isi a tatou fuafuaga, ua leva ona fai le iuga o le a faatino i o i Maliolio. Ia pe ova foi ma le lua tausaga o fai le iuga mo i i le atinae tele lea ua fai nei o le auala sima i luga o le vaitafe o Vaisigano. Ua ou le faaogaina le upu lea o le auala laupapa, leaga e leai ni auala laupapa e fai i ni sima ma ni uamea. Ae lea la o le alu atu le term fou, o le auala sima i luga o le alavai. Leaga e i ai foi le ala sima e alu i lalo o le vai.

O lea o le alu atu le gagana tuusao, e faamatala atu ai le uiga o mea, ma le sau o lauga, e le o maua atoatoa mai ona o lea tou te o faitau ia le Observer, ae tou te le o faalogologo mai i le 2AP, o lea e alu atu ai ia faamatalaga sao.

**FOFOGA FETALAI:** Malo faafetai, ia ma e aoga le laga e le sui usufono mamalu o le mataupu lea ina ia maua ai le faamaninoga a le Malo. Ia ae tautuana foi ma sui usufono mamalu o le Palemene. O lea ua faamanino e le Malo le tulaga lea, e le aoga foi ona toe laga mai e se isi saunoaga leaga o lea ua manino le faamalamalamaga a le Malo. Ia aemaise lava foi sui usufono sa faauuina i le tulaga i le la vaiaso, ia malo faafetai. Masalo e faigofie lava ona outou malamalama ua lava foi lo outou silafia.

Ia tulai mai le sui usufono e saunoa.

**Afioga FAUMUINA ASI PAULI WAYNE FONG:** Faafetai i lau Afioga i le Fofoga Fetalai, leaga o lea e le i uma atu lau folasaga. Ou te le i talanoa matuai ou malamalama lelei i le mea lea e saunoa mai ai le Afioga i le Palemia ua uma foi ona tatou talanoa ai. E pau lava si tamai vala lea sa ou fai atu ai, a manuia le uafu, manuia le matou nuu. Ae matou te le o fai atu e matou te o atu e taofi le uafu lau Afioga, o lo o lagolago i ai le itumalo.

**FOFOGA FETALAI:** O lea ua maua atu.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le maitau atu iinei, o le sao o le saunoaga a le sui usufono, o le a tu fua e fai mea ae le talanoa mai i le matou nuu, a? Ia lea ua uma na avatu le faamalamalama, faatali, se i maea lelei ia mea ia, ona faatoa fai loa lea o le mea lena. Aisea? O le a tu fua talanoa o lea e le i maea le talanoaga? Aua na o le pau o le mea o le maasiasi le mea e maua ai, ae iu ia oe ia le tulaga le malilie o le tou aupalota.

Ia lau Afioga i le Fofoga Fetalai, o le faasaoga lena leaga o lea ua toe faasipa foi le faamatalaga a le sui usufono.

**FOFOGA FETALAI:** Malo, ia tulai mai le sui usufono. O lea e manino le saunoaga a le Malo.

**Afioga FAUMUINA ASI PAULI WAYNE FONG:** Faafetai o le a leai foi se faafinauga ma le Afioga i le Palemia aua o ia lava o le sifi, o ia lava e numera tasi e ona le tonu. Ae e lelei lava le faatalatalanoa e oo lava i ai, a o le mea sili, ia lea ua uma ona....

**FOFOGA FETALAI:** Ia se i toe tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, pau lava lea o le mea, e le o au o se sifi, o au o le auauna a le Vaega ma le atunuu. E manatua foi le fetalaiga a lo tatou Alii, -a e fia sifi, alu e auauna, a e fia muamua alu e mulimuli. O le mea lena o lea e tupu nei, i le tele o faalapotopotoga ma soona vevesi ai le atunuu, ua tele naunau sifi.

**FOFOGA FETALAI:** Malo. Ia leaga o le Malo ma le Taitai o le Malo o lea e galulue.

**Afioga FAUMUINA ASI PAULI WAYNE FONG:** Faafetai i lau Afioga i le Fofoga Fetalai, o le a ou me i ese la ma le uafu i Vaiusu, o lea ou te i lava i le Minisita lea o Galuega i le tulaga i auala. E le o ni auala galue la lea ou te fai atu ai lau Afioga i le Fofoga Fetalai, o auala o lo o nonofo ai tagata soifua.

I le auala lea e alu i Tafaigata, i le Factory o le Taula, Robert Louis Stevenson, Falepuipui i Tafaigata, ma le mea o lo o sasaa i ai le lapisi, o le manaia ia, manaia, faafetai atu lava i le Afioga i le Minisita mo lea auala. Ae a e afe loa i totonu o Falelauniu, e taamilo mai i ina e alu atu ai i ina, o i ina la o lo o i ai le faaletonu, o lea e tatalo atu ai i le Afioga i le Minisita. Ou te manatua sa i ai le faifeau sa lauga i totonu o le Fono lenei. O le faifeau, ua malolo manumalo, i le tuumalo o le Afioga i le Sui Ao. Sa ia lauga ai iinei i tulaga i galuega fai, -e aua e te sola, aua e te sola e le i faia lau galuega, aua e te sola o taatia se galuega e le i uma.ø



19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E tatalo atu i le Afioga i le Minisita, e alofa ifo la i le auala lea, ae aua le sola, e fia fai le auala lea ina ia maua lelei ai le nonofo filemu. O le matua manaia lava o Falelauniu i le mea lea ua i ai, mananaia fale, mananaia ia vao la e i ai i autafa, a o le auala, na ona taatia atu faapena lau Afioga.

Ia o Siusega, e lelei le isi pito, ae toetiiti lava lelei le isi pito. Ia taumafai atu i lena pito lau Afioga i le Minisita, o lena ua manaia le galuega.

Ia lau Afioga i le Minisita mo Tupe Maua a le Malo, o le uo mamae lava a au le Afioga ia Tialavea, ia taatia foi i le Afioga i le Minisita. E to lou pulou i lau Afioga i le Minisita i lou lototele, lototele i mea o lo o fai i le taimi lenei. Ioe e leai se isi e mafai ona faia le mea lea e te faia.

E i ai le matou faifeau i Vaigaga sa i ai i vaitaimi ia ua maliu si toeaina, le toeaina e igoa ia Poasa. Ioe, a ou ulavale i taimi o aoga Tusi Paia, ia e sasa au ia ma aumai au faanofo i lalo. Fai mai ia te au, -vaai oe atalii, o oe lava le tamaititi e pito i sili ona malovalea lea e i ai i le taimi lenei. E lua lava ituaiga malo o le tagata, o le malo tiaa, ma le malo lea. Na ou fai atu loa i le faifeau, se i faamalamalama mai po o le a le eseese? O le malo tiaa, e tumau lava lou faatuatuga i le mea ua e silafia e lelei mo oe mo le atunuu, ae o le isi la malo lea, a e alualu e toe foi, ia ona afaina ai laia.

Lau Afioga i le Minisita, tumau ai laia i le malo tiaa lau Afioga, ina ia tumau pea le tatou Tulafono lea e i ai, ina ia fai pea lafoga a faifeau, ia e faatupe ai a tatou mataupu lea. Ae i ai le fesoasoani e fia avatu, e masani ona ou alu atu i le Ofisa o Tiute e totogi tiute, ioe, e 4 itula e sau ai le vaalele mai Niu Sila i Samoa, ae 12 itula e kilia mai ai le freight mai le Ofisa o le Tiute. Ia a faapefea ona sau le vaalele e 4 itula ae 12 itula e fai i totonu iinei? A o le isi fesoasoani, sa ou fesilisili lava ia i latou e i luma o le Ofisa o Tiute; Po o a latou mea e faatalitali, ae tai fia ni a latou tiute o faatalitali? O lea e nonofo ma tupe i fafo i i, ua fia ave i totonu. Ou te talitonu e \$1miliona i le \$2miliona, ae o faapea, o faapea, toe o faapea uma le aso. A o le tupe lea e nonofo ma tagata nei i fafo, o lea e fia o i totonu ma fia oo i le bank, ma fia oo i le malo.

O lea lau Afioga i le Minisita, se i tau dedicate ifo lava le galuega lea i nisi pe a faapea ua le maua se avanoa o i latou, ina ia vave ai le tupe maua e oo i totonu i le Matagaluega ma oo i le bank, e tele lava le fuafuaga o i ai. Ae taatia atu i ina i lau Afioga aua o lena e te silafia, o lena foi e te lua faatasi ma le Minisita Lagolago, ia o ia foi e filemu lava le uso ae lelei lava si ona manatu, ioe.

O le Minisita mo Aoga, Taaloga ma Aganuu, o lea o le a tulai mai le tatou Pacific Games, ioe, ia sili atu i lo isi Pacific Games ia na i ai, leaga sa ou i ai, o au sa ou tago present mo medals i tagata foi na o malo, ioe. Vaai lelei ia tulaga lena, ia e aoga, o le lelei ia, ia maua se tatou tupe maua, aua ne i maua le mea lea na tupu muamua, e uma ae ae leai se tupe e maua. Aua e talitonu lava le agaga, o lena e i ina lava le tofa ma le faautaga.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O lau uo le Minisita mo Faatoaga ma Faigafaiva, o oulua ia o loia ia o le tatou vasega lea sa i ai i le taimi lenei, o lea ua matuai aoga lava i le taimi lenei, ioe. Afai foi ua tetele atu, o lea ou te malamalama uma lava i le tulafono lea i ai, ae i ai lava taimi e tatau ai ona faamalamalama atu, lau Afioga i le Minisita mo Faatoaga ma Faigafaiva, ia alofa mai i lou itumalo, e fia maua ni iliafi, iliafi e taili ai i lalo laau o lo o faalavelave i luga o le auala ma isi mea faapena, ia aua ua leai ni mea e fai ai a matou faatoaga, ae mafai ona fai i tamai mea laiti ia.

Ia o le a taumafai atu e faauma atu se faamatalaga i lenei aso. Oi lau Afioga i le Minisita o le MPE, malo lava. Ae na ona avatu o se fautuaga, se i toe tilotilo ifo lava i le Matagaluega lena, po o i ai sina a latou tupe maua, ou te le iloa pe faapefea ona maua a latou tupe maua, te i ua avatu tupe maua a isi vaega ia faatupe maua a latou, ae ou te talitonu, e tatau lava ona sue pea se latou seleni. Ia na ona faataatia atu i ina.

Ona ou oo mai ai lea i le Minisita mo Fesootaiga, Faamatalaga ma Fesootaiga Vavave Faaneionapo. Ia e tele lava le galuega o lo o feagai ma oe uso, ae taumafai ia maua, ae taatia atu i ina o lea lava e le i maua. Na ona ou faapena atu, a o lea e i ai i ina ma le Afioga i le sui usufono mo Faleata Sisifo, ia fesoasoani ifo i le Afioga i le Minisita, ina ia vave ona maua le tatou mataupu lena.

Ma le faaloalo lava lau Afioga i le Fofoga Fetalai, ua uma se manatu. O lea o le a malolo foi i lenei aso ma faalogologo i le auuso, ma le faaloalo lava, faafetai.

**FOFOGA FETALAI:** Malo saunua i le Afioga i le sui usufono mamalu. Ma o le avanoa foi lenei e tuuina atu i se isi sui usufono o le Palemene e fia saunua.

Se i tulai mai le sui usufono mo Gagaifomauga Nu.3.

**Afioga FAAULUSAU ROSA DUFFY-STOWERS (Gagaifomauga Nu.3):** Faafetai. E faatalofa atu i lau Afioga i le Fofoga Fetalai, faapea foi le Afioga i le Palemia, le Sui Palemia ma le paia o le Kapeneta, Minisita Lagolago faapea foi sui usufono mamalu o le Palemene.

E faatalofa atu foi i Faauluuluga o Matagaluega a le Malo ma Faalapotopotoga Tumaoti faapea Samoa ua potopoto i le Maota. Le afioga i le Failautusi ma le Sui Failautusi ma le paia o le Matagaluega. Ia e faatalofa atu foi ia Samoa o lo o faafogafoga mai, aemaiase foi o le itumalo ou te sau ai ia Gagaifomauga Nu.3. E faatalofa atu i le paia o le Aufaigaluega e faapea foi si ou nuu i Aopo i le paia o Aiga le Falelima o le Saeseese ma lau fetalaiiga Pao, ia faapea foi le susuga ia Penaia ma le faletua, faapea foi ia Sosene ma le faletua. Ia faafogoga maia se i taumafai atu sina manatu aua le matimatiga o le Tala Autu o le Tupe o lo o talanoaina nei.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ae lau Afioga i le Fofoga Fetalai e momoli tele le faamalo ma le faafetai i le Afioga i le Minisita o Tupe, aemaise ai foi o le Faauluuluga a le Matagaluega o Tupe ma le paia o le Matagaluega, i le galuega fita o le tuufaatasiga o le Tala Autu o le Tupe. O lo o maitauina e lou sui usufono le taumafaiga e aoa mai ia vaega eseese ina ia mafai ai ona tuufaatasia se vaegatupe aua le faamatuuina atu o auunaga eseese mo le mamalu o le atunuu. E maitauina le matua faatauina tele o le vaega lea o compliance i vaega eseese sectors o le Malo, ina ia o lo o i ina le isi vaegatupe e ao ona aoina mai, aemaiase foi o isi vaega ia o lo o mataituina e le Matagaluega o Tupe, ina ia mafai ai ona aoina mai ma koleti uma mai mea ia ia ina ia mafai ai ona tuufaatasi aua le taumafaiga o le Tala o le Tupe. Ae e momoli atu ai le faamalo ma le faafetai.

E faapea foi le Matagaluega o Tupe Maua, o lo o maitauina pea le alualu i luma o le taumafaiga a le Matagaluega o Tupe Maua i le aoina mai lea o lafoga, ae e ao lava ona faatauina foi lava e le Maota lenei i taumafaiga a Matagaluega eseese a le Malo ma Faalapotopotoga Tumaoti, ona o latou lea o lo o vae ma lima i le taumafaiga o le maua o tupe e faatino ai ia atinae o le tatou atunuu.

Ia ona oo atu ai lea o se faamatalaga foi i nai talosaga e tuu atu i lau Afioga i le Taitai o le Malo. Ia na ona faataatia atu i ina, ae o lo o i ina lava le tofa e faapena ona liuliu ai se manatu. E agai tonu la le tulaga i le Matagaluega lea o Aoga, malo lava faafetai mo le taumafaiga a le Matagaluega o Aoga i le faatinoina o le pitolaau lea o le aotauina o alo ma fanau o lo tatou atunuu. Ae na ona faataatia atu i ina o lo o maitauina e lou sui usufono ia tausaga taitasi o lo o maua ai le tupe faameaalofa foi lea o lo o faamatuuina mai mo Missions Schools po o Aoga a Ekalesia. Ma e talitonu foi lava o lo o loa foi le silafia, ua tausaga foi o tautua Aoga a Ekalesia eseese i le aotauina o alo ma fanau i totonu o lo tatou atunuu. Ma o tupe foi o lo o faamatuuina mai, malo faafetai i le pule faasoa. Ae e talitonu, e le o taitai ona gafataulimaina ai totogi o faiaoga o lo o aoaoina alo ma fanau i totonu o aoga a ekalesia; ma o i ina foi o lo o agai atu i ai se faamatalaga. E tatalo atu ai ma le agaga faaaloalo, pe le i oo ea i lenei vaiatau o le soifuaga o le tatou atunuu, ua 56 tausaga talu ona tutoatasi, pe le i oo ea i se taimi ua alagata ai ona silasila ifo le Malo, ae avatu loa ia faiaoga o aoga a ekalesia e tuufaatasi i le pay roll a faiaoga a le Malo? Ona o lenei tulaga oka se faigata o totogi o faiaoga aemaise ai foi i le faamalosiaga o totogi o faiaoga i aoga a le Malo, ia ua faaletonu ai foi ma aoga a ekalesia i le taumafaiga a ekalesia e tau taofiofi a latou faiaoga, ona ua siitia tele totogi o faiaoga a le Malo, ae o lo o maualalo lava ia totogi o faiaoga o aoga a ekalesia. O se lagona na ona faataatia atu i ina ma faaloolomaau atu ai ina ia mafai ai ona liuliu ane i ai le tofa, pe le i oo ia i lenei vaiatau, e faapena ai ona totogi e le Malo ma faiaoga o tatou Mission School ua leva ona tautua i le aotauina o alo ma fanau.

Ia le Afioga i le Minisita mo Galuega, Felauaiga ma Atinae Eseese....

**FOFOGA FETALAI:** Tulai mai le Taitai o le Malo.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e taua tele le manatu lea ua aumai. Ma ou te faamalo foi i le sui usufono, o le ituaiga tofa lea e fau ai ia faiga faavae a lo tatou Malo. E le o nofonofu ekalesia ma aoga ia i tua o lo o uunai mai pea le Malo ina ia faatino le mea lea. Ma e i le tulaga o le maua tutusa e fanau a Samoa o le fesoasoani lea, e tatau lava ona fai, ma e ou te matua ioeina lava le fuafuaga lea i le fautuaga lea ua aumai, o le fautuaga foi ua leva ona faatalanoaina e le Kapeneta i le tele o taimi e talatalanoa faasamasamanoa ai, o le agaga tonu lava lea, ina ia faalaugatasia ia fanau a le atunuu. Aua o lea mea o aoga a faaekalesia e le mafai ona tapunia, po o le a lava le taugata, e le mafai e ni ekalesia ona tapunia ona e faataua tele e taitai o ekalesia le i ai pea o aoga nei e aoaoina talitonuga e faapitoa lava i le ekalesia, mo le faaaauaina pea o le malosi o le soifua faatuatua, o le Aso Fitu po o le Mamona, po o le Katoliko, po o le Metotisi po o le EFKS, e i ai lava ni nai eseesega laiti e ao ai ona faaaauu pea aoga nei, ae ao foi i le Malo ona ave le fesoasoani. O le ala lena e ala ai ona fai pea le fautuaga, fai pea, fai pea, fai pea e le Minisita o Tupe Maua, ina ia saili auala uma lava esesese e maua ai tupe a lo tatou Malo ina ia faatino le mea lea. O lea la ua outou silasila, ua siitia mai i le \$6miliona i le \$13miliona tuufaatasi uma lava mea uma ia tulaga e fesoasoani atu ai i aoga nei. E le gata i aoga a ekalesia a o aoga tumaoti, aua o le tulaga lava ia na faavae ai le fesoasoani lea, sa na o aoga a ekalesia, ae peitai ua tatalo mai foi ia i latou ia, e tele foi le aoga o aoga tumaoti ia, ae i ai faafitauli, o le faafitauli la, ia o lena ua silafia, a faatulaga atu ia lafoga a le Malo ae teteesi. A o le agaga tonu lena, o le faasoa, o le faasoa e le Malo e fai le tulaga faamalosi faaletulafono, e aumai ai tupe mai e e tetele a latou tupe e faasoasoa atu i ai latou e le lava seleni, ae auala atu la i mea ia, o mea ia ua e sau tonu ai lava. O lea la ou te tulai atu ai ou te faamalo, e talosia e faapea le lagolago a tatou uma lava i totonu o le Maota lenei i taumafaiga i sailiga tupe ia e fai e le Minisita o Tupe Maua ina ia maua ai le agaga lea e avatu ai ia le fesoasoani lea i aoga. Ua uma foi la ona ou lauga ai i le isi foi sauniga faale-Ekalesia na aumai ai le mea, ia na ou fai ai lea, aua tou te popole, a fua i le faasologa lea e sau ai mai le 1983 na o le 50,000 a o lea ua oo i le 6miliona o lea o le a....o lea ua tatou talanoa nei e \$13miliona, o lona uiga e le toe mamao, pe toe 50 tausaga ia ona tatou oo loa lea i ai, pe a leai ni tagata e teteesi. Ia o le talosaga lena ia te outou, ia taumafai foi e lagolago mai ia galuega o lo o taumafai i ai le Minisita o Tupe Maua, e le o ni mea a au o mea a le Minisita o Tupe Maua.

Ia manuia tele le tatou Fono.

**FOFOGA FETALAI:** Ia malo faafetai. Tulai mai le sui usufono mo Gagaifomauga Nu.3 e saunoa.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Afioga FAAULUSAU ROSA DUFFY-STOWERS:** Faafetai i lau Afioga i le Fofoga Fetalai, malo lava faafetai i le saunoaga a le Afioga i le Palemia e tusa ai foi ma le mataupu na laga. Na ona faapupula atili lava si vaega ua misi ia te au i le vaega lea i aoga ia a Mission School, e 24% le aofaiga o le faapaseneina o le aofaiga o faiaoga o lo o aotauina ai i Mission School, a o le private e 6%, ia a o le Malo e 70%. Ia e agai la le faamatalaga foi lea e na o sina 24% lava a Mission School na e toe faaopoopo ifo i ina i le Pakeki a le Afioga i le Minisita o Tupe, ia ona kava laia lea o totogi o tatou faiaoga o Mission School.

Ia ona faaauau atu lea i le Minisita mo Galuega, Felauaiga ma Atinae Eeseese, le pulega o felauaiga ia le LTA. O lo o maitauina lava e lou sui usufono o lo o tulai mai pea faalavelave ia i luga o le auala e aafia ai pasi e pei o le faalavelave lea na tupu i le masina lea na tea, oka le faatauvaa o le mea na tulai mai. Ae avatu se lagona faatauvaa i lau Afioga i le Minisita, pe le oo foi i lenei vaitau pe le silasila ane i se faiga ina ia mafai ai ona aoaoina avepasi, aemaise a avepasi, e le aofia uma ai foi avepasi, ina ia matua fai lelei lava se course, a training course e aotauina ai i latou nei e le gata o le faatinoina o le latou galuega faa-avetaavale, a o le iloa ma le malamalama lelei, simple things like commonsense, a alu atu lava o la e leaga taofi o le pasi a le tamaloa e ona taavale ae alu ai lava, ae tatau ona fai i ai i le tamaloa e ana le pasi o lea e leaga taofi o le pasi. O le faalavelave matuia lava na tulai mai i Saipipi i Savaii, ae o se faalavelave e mafai ona avoid, ae la e le i mafai ona faatino le vaega lea ona o lo o maitauina e lou sui usufono, o le 1 lava o le aoaoina o avepasi. Faamolemole e le aofia uma ai avepasi i se faamatalaga. Lau Afioga i le Minisita, pe mafai ona e silasila ifo i ai se i vagana ua issue se certificate foi lea e faamautinoa ai ua e agavaa e ave le pasi, ia ona mafai loa lea ona ave le pasi. A o ou i ai lava la i le vaega lea o pasi, o isi lava pasi, oka e...

**FOFOGA FETALAI:** Ia se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Dr. Sailele Malielegaoui:** Lau Afioga i le Fofoga Fetalai, e taua lava le mataupu lea o le ala foi lena o lou tutulai atu, o lea e saunoa le sui usufono i mea ia o taofi. O le mea moni lava, se e le o taofi e faaletonu ai taavale, o le maua lava o lea taavale fai mai o taofi, lavea lea taavale fai mai o taofi, o le mea lava lea e tasi o taofi, ae le o taofi. O la e lelei taavale, a o le taua ia o le mataupu lea ua e aumaia, masalo e oo foi i leoleo e le o faamalosia le mea lea o le silasila, ave i luga i le mauga ae faamatala i tagata nei e mafai ona taofi le taavale i kia, o le mea lena na ala ai ona fai kia a papalagi. A o le see mai luga i le fa, e toe taofi atu ua le mafai ona o le sese o kia ia e o ai.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le mea la lea, lau Afioga i le Minisita, se i fai ane i tatou vaega ia e siakia, tusa lava pe na o le kia e o e ao i ai le kia tasi, kia lua, tolu, fa, ona le toe lavea ai lea o se taavale alu faavalevave, e le iloa e le avetaavale faaaoga kia. Na ala ona fai e le papalagi kia e fesoasoani ina ia paleni le taofi ma fesoasoani i le taavale i taofi, ma le taofiga o taavale e faaaoga ai kia. O le mea lea ua ala ai ona ou tu atu, aua o le taimi lenei o la e faalogologo uma mai lava tagata i le tatou Fono, aemaise lava mea nei o le aufaipasi ma le aufai taavale laiti. E suesue ane lava, e tuuai lava, leaga le taofi, leaga le taofi, leaga le taofi, ae le o le taofi la e leaga. O le faalavelave, o le mea lava e vaai atu e le tatau ae tuu lava i le fa, ia alu loa i le atoa e toe taofi atu ua le mafai. A o le mea lena e ala ai ona faaaoga le kia ina ia paleni lelei le kia ma le taofi, ona lelei ai lea. A o le mea lea o le alu alu i le atoa ae toe taofi atu le taavale i taofi ua leaga ua alu i le atoa ona tei lava lea ua leaga atu ai ona o le faavalevave o le avetaavale e faaaoga kia. A o lea la ua e laga le mataupu lenei, a o la e faalogologo mai avepasi ma avetaavale uma lava, sole, ia vaavaai a outou kia.

**FOFOGA FETALAI:** Malo faafetai. Ia se i tulai mai le Minisita mo Galuega, Felauaiga ma Atinae Eseeese.

**Susuga Hon Papaliitele Niko Lee Hang:** Lau Afioga i le Fetalai, na ona toe fia faaopopo i le saunoaga a le Afioga i le Palemia, e fia faatauina lava le saunoaga a le sui usufono i le tulaga lava lea o le talanoa i taofi ae le talanoa i avepasi aua o le mafuaaga lava o avepasi. A o lea e faalogologo mai le LTA, a maea loa ua pasia le Tala o le Tupe, ona amata loa lea i le vaiaso fou ni aoaoga mo avepasi, ina ia tatala se aoaoga faapenei aemaise avetaavale, so o se avetaavale lava. Ae faamamafa lava i avepasi ma aveloli aua o latou e faaeteetegata ia le faafoeina o taavale ia. Ma le agaga faaaloalo.

**FOFOGA FETALAI:** Malo faafetai. Ia se i tulai mai le sui usufono.

**Afioga FAAULUSAU ROSA DUFFY-STOWERS:** Faafetai lava i lau Afioga i le Palemia, faapea foi le Afioga i le Minisita mo Galuega o lea ua tali mai lata mataupu lea, ae toe faaopopo atu la i ai. Ia lavalava mama lelei le avepasi, o tulaga faapea. Ia ma le isi lava vaega lau Afioga i le Minisita, o pasi ia ou te talitonu a aumai mai fafo e aumai o la e regulate lelei lava le pu o le pasi, a o le mea lea ua fai ai nei tauvaga a isi pasi, ua tauva i le pu o le pasi. A o le mea la ua tupu ai, a faapea la e alu lata taavale i autafa o le pasi a o la e i ai se loomatua vaivai, a, i totonu o lata taavale ae ee le pu o le pasi, e te i lava ua pe ai ma le fatu o le loomatua, na ona ee lava o le pu a le avepasi, oka se tele.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ou te tatalo atu ai i lau Afioga i le Minisita, o ituaiga mea lava ia ou te talitonu au ia, o au o le tagatanuu o Samoa o lea e aafia ai ou lagona ma mea uma, afai e aafia ai ou lagona, ou te talitonu e aafia foi lagona o le mamalu o le atunuu. Ma e moni ai le saunoaga a le Palemia i mea nei o taofi a le avepasi. E i ai le faalavelave na ou aafia ai i o i Savaii, na sau lava le pasi mai tua alu i le isi itu tipi le left side o le matou taavale lea e turn right ua le mafai la ona overtake ina le matou taavale, alu atu loa faapea i i oloia ai loa le matou taavale, ae fai mai le tala a le avepasi, e leaga taofi o le pasi. Na matou o loa lea i le tamalao e ana le pasi, matou o atu, ia na matua fasi faamoamoa ai i ina e le tamalao e ana le pasi ona o la e iloa e le tamalao o la e lelei taofi o le pasi, a o le faavalevalea o le avepasi lea na ala ai ona lavea le taavale, tulua lava.

Ia o nai motugaafa na o ou lagona ma manatu i lenei taeao, ae e lagolagoina atoa e lou sui usufono le Tala Autu o le Tupe. Ia faamanuia mai le Atua i le Fonousu a Samoa.

**FOFOGA FETALAI:** Malo faafetai. Ia tulai mai se isi sui usufono e saunoa. O la e tele le avanoa mo tatou sui usufono. E i ai le eseeseega foi o le tatou Fono lenei, o le tatou Fono lenei ua tele ina malamalama i mataupu ia tatou te Fono ai. E faigofie lava ona tatou see loa i le tulaga o le finagalo o le Malo.

Ia, se i tulai mai le sui usufono mo Vaisigano Nu.2.

**Afioga TAPULESATELE MAUTENI TAMASONE METULI II ESERA (Vaisigano Nu.2):** Faafetai atu mo lou avanoa, a o lea ua maitau atu foi i lenei taimi ua tau faatutugata le Maota nei. Ae faafetai atu i lau Afioga i le Fofoga Fetalai o le Fono Aoaofaitulafono o le Palemene a Samoa. E faatalofa atu foi i lenei itu i le Afioga i le Palemia, Sui Palemia, Minisita o le Kapeneta faapea foi Minisita Lagolago. I lenei foi itu o le Maota i le mamalu i alii ma tamaitai faipule. E faatalofa atu i le Afioga i le Faamasino Sili ma le Ofisa o Faamasinoga, tainane le Failautusi o le Fono ma le Ofisa, Faauluuluga o Matagaluega ma Faalapotopotoga a le Malo ua mafai ona aafia i lenei taeao, le mamalu o lo o sasao nei, susuga i faiaoga aemaise o fanau.

Tulouna le faafofogaaga O Le Ao Mamalu o le Malo Tutoatasi o Samoa ma lana Masiofo, faapea le Sui o le Fono a Sui Tofia ma lana Masiofo, tainane le tapuaiga a Samoa i ona paia ma ona mamalu mai mauga tetele seia paia mauga iti.

Ae tainane le faafofogaaga a le Motu i Sasae, le tapuaiga a le Aufaigaluega paia a le Atua o lo o faanonomanu aua se manuia mo Samoa aemaise si ou itumalo o Vaisigano Nu.2.

Lau Afioga i le Fofoga Fetalai, o le a agai loa se faamatalaga e tusa ai ma le Tala Faatatau Autu o le Tupe 2018/2019 ua i lumamea nei, ma e laiti lava nai motugaafa e fia faaleoina.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Lau Afioga i le Fofoga Fetalai, e muamua lava ona faafetai atu mo le galuega maeaea a le Afioga i le Minisita o Tupe ma le lagolago a le Pule Sili foi ma le Matagaluega aemaise foi e sa fesoasoani i le faatinoina o manaoga moomia mo lenei Tala Faatatau Autu o le Tupe 2018/2019.

Lau Afioga i le Fofoga Fetalai, e maitauina le finagalo manino o le Afioga i le Minisita, o lenei Tala o le Tupe, e faavae i faaiuga ma filifiliga faigata, ma o le sini autu o lenei Tala o le Tupe pei ona ia faailoa mai, o le filifiliga toa. O le filifiliga toa, ia tatau ona sao le filifiliga i vaega e tatau ona ave i ai le faamuamua i le atiaaina o nai o tatou tagata ina ia mafai ona tali atu i manaoga o le mamalu o le atunuu aua le fausia o se lumanai manuia o Samoa.

Lau Afioga i le Fofoga Fetalai, i le tulaga i aoaoga, e lagolagoina malosi e lou sui usufono le faataua ua aveina mo aoga amata e pei ona faailoa mai. Ma e faafetai atu i le Minisita o Tupe aemaise le Minisita o Aoga, le Pule Sili foi ma le Matagaluega mo lea fuafuaga moomia ma le taua. E i ai le tulaga e ese le taua ai ia te au o le aoga amata. Lau Afioga i le Fofoga Fetalai, ia e i ai si ou atalii sa aoga i le aoga amata lea i Porirua, sa ia aoaoina ai le pese lotu foi lea a le EFKS, Faafetai i le Atua. O le tulaga la ua tulai mai, afai le matou lotu nei, e musu lava le tama foi e usu e se isi pese o matou lotu. Fai le lotu nei, faafetai i le Atua, oo atu i le lotu taeao i le afiafi a taeao, faafetai i le Atua, oo foi i le lotu talatu taeao, o le faafetai foi i le Atua. O le tulaga la lea e taua ai lava ia te au le finagalo ua i ai ma le fuafuaga o le taumafaiga lea o aoga amata. E i ai foi le talitonuga ua manino mai i finagalo afai tatou te taumafai i le tulaga lea ina ia agai uma a tatou fanau i le aoga amata, e vave foi ona iloa ma maua ai le tomai o le tamaitiiti aua le tapena atu mo aoga mauualuluga.

Lau Afioga i le Fofoga Fetalai, o le tulaga lea i le mea lava nei o aoga amata, e i ai se manatu foi lea pei ona taumafai mai le Matagaluega...

**FOFOGA FETALAI:** Ou te faauilavea i le saunoaga matagofie a le sui usufono mamalu mo Vaisigano Nu.2 ona o lea ua tatou toai taunuu i le tatou malologa masani, ae ou te faamalulu atu o le a faaauau le saunoaga pe a tatou taliu mai i le tatou malologa masani. Ou te faasilasila atu o le a faataatia ese Galuega a le Fono Aoao mo lana malologa masani. Faafetai.

*Na faataatiaese Taualumaga a le Fono Aoao mo lana malologa masani i le itula e 10:44 ma toe faaauau i le itula e 11:25 i le taeao.*

*Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2017/2018 ma le Tulafono Tau Faaofi o le Faatatauina o Tupe 2018/2019.*



19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoaofa Fautulafono.

Ou te manatu ua i ai foi le suiga o le faasiliga malosi ua mafai ona maua e faaaauau ai le tatou galuega.

E faia le malologa o saunoa le sui usufono mo Vaisigano Nu.2, ou te tapa ma le faaaloalo lau Afioga i le sui usufono mamalu e tulai mai e faaaauau le saunoaga.

**Afioga TAPULESATELE MAUTENI TAMASONE METULI II ESERA:** Faafetai i lau Afioga i le Fofoga Fetalai, ou te tulai atu ma lou ava. Ou te manatu ua sao i alo le taumafataga ma le faasiliga malosi a le Maota nei.

Lau Afioga i le Fofoga Fetalai e faaaauau atu se faamatalaga i le tulaga lea i aoaoga. Na ona se i toe agai laititi lava i le tulaga lea i aoga amata, e i ai le talitonuga foi lea pei o le tulaga lea e i ai faamautu mai le 4 tausaga e amata ai ia le tamaitiiti aoga. E i ai le talitonuga foi lea pei o le tulaga lea e i ai e faamautu mai le 4 tausaga e amata ai ia le tamaitiiti aoga. E i ai le manatu foi lea e aua le taofia i le 4 tausaga lea e ave pea le avanoa, lau Afioga i le Minisita mo Aoga le Faauluuluga foi ma le Pulega, e ave pea le avanoa i nai tamaiti i lalo ane le 3 tausaga ma tulaga faapena. Atonu e i ai lava molimau foi ia e le o se tulaga le lelei lea tulaga a o se tulaga lelei mo le agai i luma.

E i ai foi le manatu e....

**FOFOGA FETALAI:** Lau Afioga, pei e faitau eseese Tutuila ma Ape pei o le upu e fai i le usuga a ....Na ona ou toe fesoasoani atu i le sui usufono mamalu ona o le Tulafono Tau Faaofi o Teuteuga o le Tulafono o Aoga 2018, o lo o faapena ona taatia se i maea le Tala Faatatau Autu ma le Tala Faaopoopo. E i ai le manatu o lea tatou te talanoaina le tulaga o le Tala Faatatau ma le Tala Faaopoopo o le tatou tamaoiga o le tatou Tupe. Na ona fesoasoani atu ina ne i maumau le taimi o le sui usufono, ae tulai mai le sui usufono e faaaauau le saunoaga.

**Afioga TAPULESATELE MAUTENI TAMASONE METULI II ESERA:** Faafetai lau Afioga, o le a aveese ai se faamatalaga, ae pei e i ai le mafuaaga na mafua ai ona taumafai atu, ae o le a fai mea faalogo i lou fofoga.

O le tulaga e uiga i le soifua maloloina, e i ai ia nai vaega ia ae avatu pea le faafetai i le Minisita mo le Soifua Maloloina, e muamua o le tulaga lea i avanoa foi ia e avatu i fomai mo falemai i tua, aua pei o le tulaga lava lea o lo o fai ai si tau faaletonu. Ae faafetaia lava galuega uma, i le tulaga i mea ia o vailaau ma fualaau, e tatalo atu pea e moni lava ae o lo o i ai lava ia nai lape laiti, e le gata i lea o tulaga foi ia o taavale e faaogaina, e i ai lava taavale o faalavelave ina ia mautu lelei le faatinoina o ia tulaga.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E i ai foi le manatu foi lea i tulaga faapea foi lea mo le faatinoina o galuega, e foliga mai lava e tumau lava le finagalo o le Malo mo le tuufaatasia o auaunaga ia e lua, ia ae o le tulaga lava lena. E moni lava e foliga mai e tele ni tausaga foi e tau faatino ai, ae pei o le manatu lava lena i lau Afioga i le Fofoga Fetalai, aua e le talitalia i ai le soifua maloloina foi o gasegase o nai o tatou tagata, ae o faatinoga ma galuega faatino e tataua ona taumafai pea e tumau ia le lelei.

E avatu foi lau faafetai i le Afioga i le Minisita i lau fuafuaga foi e pei ona iai o le a i ai pea se fomai nofomau mo le falemai lea i Sataua, ia atonu e le faigofie foi, afai o le tulaga lea, e i ai lava lou talitonuga pei ona e saunoa i le taimi ua fano, o le a i ai lea tulaga.

**FOFOGA FETALAI:** Malie le sui usufono o lo o saunoa, se i tulai mai le Minisita mo le Soifua Maloloina.

**Afioga Hon Tuitama Talalelei Tuitama (Minisita mo le Soifua Maloloina):** Lau Afioga i le Fofoga Fetalai, e faafetai atu i le uso mo le laga o mataupu ia ma taulagalaga i mea e silisili ma mea taua mo le itumalo. Ae na ona ou tali vave atu ne i faasao i ai se taimi o le sui usufono mamalu, ia o tulaga ia o lea o lo o agai i ai fuafuaga a le Matagaluega.

Ma e lelei pea ona ou faailoa atu, o le tulaga i le fomai, ua tuai nei ona fai se faaiuga a le Matagaluega, ona e tataua lava ona i ai se fomai e tumau ma e tau mamao ina ia faigofie ai ona vaaia foi lea itu lena o Sataua. Ae o le amataga o le tausaga nei, lea sa matou faatalanoa ai le afioga ia Vaai, ona o lea sa faaauuala mai ai le afioga ia si alii Siamani foi lea e tou te faipaaga i o i Sataua, ia lea na aumai ai le tou ambulance muamua, peitai ona o le 1 manino lelei o aiaiga mo le ambulance lea, o lea na auala mai ai i luga o le vaega fuimu, ia ma o la ua i ai nei, o lea la ua toe malilie mai ia le fuimu e aumai, ae ua ave ai le faamatalaga, e tuu ai pea i le vaega fuimu, o lo o tele foi le aoga o le vaega lea tineimu e fesoasoani foi i faalavelave faafuasei e manaomia ai ambulance lea o lo o agai ai valaau a le tele o le mamalu o le atunuu i le talafatai i Apia nei, ia vave atu ai ona oo atu ai se fesoasoani i mea tau ambulance. A o lea la ua polomisi mai foi la outou paaga lea le fomai lea na outou faifaiamea, o le a aumai lava le ambulance foi lava ia mo Sataua. O lea la e faatali nei se i taunuu mai. E le gata i le na, o lea foi o lea foi o le a aumai ai ma le fomai mai Siamani e fia faigaluega i o i Sataua.

Ia o fuafuaga la ia o lea e faatalitali ai nei le Matagaluega i lona faatinoga, ia a o la e malamalama lelei le afioga Vaai i tulaga ia o matou sa talano ai i se taimi o le amataga o le tausaga nei. O le mea lea e faamafanafana atu i le sui usufono mamalu, ia onosai laitiiti, aua le popole, o tulaga lava ia o lea e silasila i ai le Matagaluega ia ma o le mea e tataua ona fai.

O le faamalamalama lea ma le faaloalo tele.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**FOFOGA FETALAI:** Malo faafetai mo le faamalamalamaga. Tulai mai le sui usufono mo Vaisigano Nu.2 e faauau le saunoaga.

**Afioga TAPULESATELE MAUTENI TAMASONE METULI II ESERA:** Faafetai atu i lau Afioga i le Fofoga Fetalai, faafetai atu i lau Afioga i le Minisita, e pei e faaleo atu lava pei ona i ai foi lou finagalo na faaalua foi i le ta feiloaiga, faafetai lava.

E faauau atu se faamatalaga lau Afioga i le Fofoga Fetalai i le tulaga lea i le Matagaluega o Faatoaga ma Faigafaiva. E momoli atu le faafetai i lau Afioga i le Minisita ona o nisi foi o vaega laiti sa taumafai atu ai, o lea ua mautu ia matou pole fagota ia o le moana, ia o lea foi ua uma ona toe faatalanoa i le Pule Lagolago foi o lo o tauaveina ia lea tofiga, e le toe mamao ona maua atu lea o pole fagota ia mo uta, e manaomia tele lava ia lea tulaga ona o le toatele lava o le aufaifaiva ia tau faigofie i uta ia a o pei o tai, e na o vaega e maua ia vaafagota lelei. E i ai le talitonuga o nai fuafuaga ia a le Matagaluega e aoga tele, e le gata i le tausiga o le soifua maloloina a o le tamaoiga o nai o tatou tagata. E faafetai atu foi i lau Afioga i le Minisita ma le Matagaluega, e ui lava ina e le tele se faitauga i le tulaga o le niu isi o matou itumalo ma lena foi tafa o le motu, o lena o lo o maitauina lava ona o lo o aafia faatasi lava tatou i le tulaga leaga lea o le manu ainiu.

Ona oo mai lea o se faamatalaga lau Afioga i le Fofoga Fetalai i le tulaga lea i o tatou auala galue. E mafai foi ona faaupu le tele o auala galue ia, o auala foi o la e nonofo ai o tatou tagata, e pei o le isi foi lena manaoga e moomia mo le faatinoina o galuega a le Afioga i le Minisita mo Galuega ma le Matagaluega. E i ai lava le manatu sa ou avatua muamua foi le tulaga lea, e i ai lava le manatu i nai itumalo e i ai foi lo matou itumalo, e le faapitoaugafa se faamatalaga ae e maouta ia fanua, e manatua lava ia aso ia pei sa i ai se vaegatupe sa faaagaaga mo le teuina o auala galue, peitai ane i lenei foi vaitaimi ma le maitau, ia o suiga lava o le tau ma tulaga o i ai, o lea pei e agai i ai se manatu, e a pe a taumafai ia e faaavanoa mai se meafaigaluega po o se masini, pe taitolu taifa i le tausaga ona teu ai a tatou auala galue. E faigata ia i nuu ia ma alaalfaga ia e maouta ia fanua. Po o le a lava se faiga lau Afioga i le Minisita o Tupe, ae silasila ane i ai, pe mata e mafai ona faatino ia tulaga. O le tele foi o tatou auala ia, auala galue po o auala ia e ese mai le main road, e le faapea e talitua limaina e se isi le tulaga lea o le faata o auala ia. Silasila foi, e le o se tulaga foi lele e faapea e mautu mo ni tausaga se tele. E pei la o le manatu afai e mafai ona faatino lea tulaga, ia e talosaga atu ina ia mafai ai ona teuteu a tatou auala ia.

Lau Afioga i le Fofoga Fetalai, e tautala atu pea i le Afioga i le Minisita mo Faatoaga ma Faigafaiva....

**FOFOGA FETALAI:** Se i tulai mai le Taitai o le Malo.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le taua ia o le finagalo lea ua faaalua i le itu lea o le teuteu o auala galue, ona e i ai taimi e uma ai ona fai le auala, ia ona taatia ai lava lea ua le o ane le nuu e faamama, ona tupu mai loa lea ua sosolo mai totonu le fue, ma amata ai loa ona talepe le auala galue. E sao le faaaliga a le sui usufono sa i ai le tulaga faapena. Sa ave tupe i nuu e o ai e teu a latou auala galue. O tupe nei na o se mea foi lele e faaosoa ai le agaga galue. E i ai la le fonu a le isi nuu na lipoti mai ia te au, ua fonu le nuu ona faapea lea o le pulenuu, ua iloa le sao, a le toe maua loa ni a tatou tupe, aua tatou te toe o e toe teu le tatou auala galue. Ou aamia loa, o le a alii lau faamatalaga lea na fai? O le fesoasoani a le Malo, e faavae i luga o le tulaga foi lea amatamea, ae lafo atu i le pulenuu e faa-fonu le nuu ona o lea o taulelea e teu, aua e le o se mea faigata. Ia e fai atu lau faamatalaga ae pei e faalii le pulenuu, ae ua ou faalogo e faapena foi ma isi pulenuu. Ia ona ou fai loa lea i ai, ua iloa la le mea, e ala ona o atu le Malo e fai le mea lea mo outou, ona o le tou le o ane e fai, a o lea la ua aliali mai, ua outou mumusu e tou te o e teu le tou auala ona o le le avatua o le tupe. A o ai lea e faaaogaina le auala? O outou lea e faaaogaina le auala. O le mea la lea, o le a ave lau fautuaga e faamuta le tupe lena aua ne i toe avatua. O le mea lea ou te maua na ona uma lava ona avatu o le tupe ae lipoti mai ae fai ai inugapia, e tusa o tupe e avatu e tufa e fai ai inugapia.

Lau Afioga i le Fofoga Fetalai, e taua tele le tatou auai i fonu a pulenuu a tatou nuu, fonu ia i Aso Gafua, ave se tuualalo i ai, e tasi lava le aso e o ane ai taulelea e fai le mea lea uma, e faigofie tele. O le isi ituaiga faiga, o le faatonuina o tagata ia aua o fanua ia e alu i uta, o fanua o aiga. O le a la le mea e tau o atu ai fua taulelea ia ae le o ane aiga latou e faamama o latou lumafale ae fai ma asiasiga a le nuu le o atu e siaki po o faamama ona faasala lea. O lena e i ai le malosi faalenuu e fai ai mea ia, a o le mea lea ua tupu, a tatou agai tele i mea ia ona foliga mai lea, we are spoon feeding our people, a? Ua pei ua faalagolago uma mai lava i le Malo galuega e fai, a o mea ia e tatau ona agai i ai tatou Sui o le Malo, na o le alu atu alu atu o nei alauni, ae le o faia a latou galuega.

O le fesoasoani atu lena, e oo foi i mea sa matou o ai nei i Savaii, na matou o tatala auala ia, ona ou faailoaina lea i nuu nei, a outou silasila mai, o le mafuaaga lea ua matou masii mai ai, e le gata ina tilotilo i le tou auala po o a mai a o a mai le tou galuega ae matou o atu e siaki uma atu ma isi nuu, e maua ai manatu fou i le tulaga e avatu ai pea fesoasoani i lea nuu ma lea nuu, ma matou iloa ai le tulaga o lea e i ai lea nuu ma lea nuu. Ia ona ou fai loa lea i toeaiina, o lea la ua matou omai ma le Kapeneta e tilotilo i mea nei e fai, ina ia aua ne i matou faalagolago i faamatalaga. Le Kapeneta, e tasi lava le Tulafono lea e galulue ai, e galulue faataulelea, o le uiga o lea mea, o le tu i luga ma savali, ae aua le na o le nofonono i i i le kesi ma faaluelue ai, ae tu i luga ma savali ma vaai i mea e tatau ona fai. Ia ona post loa lea o le fesili, o le a le mea lea ua matou vaai i ai?

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le maketi aupito sili lea ona tele e tele atu i lo Upolu. A o le a le mea lea e tuu ai, aua e tasi lava le fua e iloa ai e matou po o a mai le atinae o faatoaga. O le a la le mea lea matou te vaai i ai i le maketi lea? Na o laulau piliaki ma le anoano o laulau e faatau ai bongo a tamaiti. A o fea ea ia ni fua o faatoaga o lea e faatau i ai mea ia le galuega lenei? Ia ona alu lea o le asiasiga i o, ia ta alu atu, o le tele o isi mea, na o togafuafua ma togafau. A o le fautuaga foi lea e ave i nuu, se tuu ia nei mea tuai tou te omai ai, o le tofi mai o pulenuu o toeaiaina ua pulapula lagoto ua le mafai ona o i uta, tofi i ai mea o matai la e talavou, o matai galulue e o e faatoa le eleele. A o le tuu i ai o mea o toeaiaina ua pulapula lagoto, na o le pau lava le mea lea e tulai mai ai, o le ao o le alauni lea e avatu i i e \$250 ea i le lua vaiaso, ona alu lea nofonofo, a alu atu asiasiga ae fai mai o la e ua sola i uta e galue ina ia le mafai ai ona fai se feiloaiga ma Sui o le Malo ma isi officials e o atu.

Lau Afioga i le Fofoga Fetalai, o le taua lena o le mataupu lea e laga mai e le sui usufono, ou te tulai atu ai e toe faamanatu, e i ai le tatou tiute o tatou o faipule, e lelei le fai ma tatou o i tua i nisi Aso Gafua tatou te auai se i tatou matamata i mea a Sui o le Malo la e fai, po o o i uta e fai mea ia, aua o mea ia, o latou mea tonu na e tatau ona fai.

**FOFOGA FETALAI:** Malo faafetai. Ia ua manino le tulaga lea pei ona malele le Palemia ma o le mea tonu lava lena o la e tupu. E lelei lava foi le faafofoga mai tatou afioaga ma nuu, o lea e tatou te nonofo atu ma fai le tatou fono o taitai o le atunuu a o lea tatou te iloa ma malamalama i le mea o la e tupu. Ia, e aoga e faamalamalama ai i nisi foi sui usufono e taua lea vaega, ae aoga le saunoaga faamalamalama a le Malo e tuuititia ai foi nisi saunoaga a sui usufono ma le toe tauasa mai o le ogasami lea a o lea ua i ai le faamalamalama a le Malo.

Malie le sui usufono a o le i tuu atua le avanoa e saunoa ai, ou te tapa ma le faaaloalo lau Afioga i le Palemia mo se lafo i tatou itula faigaluega.

**LAFO MO LE SUIA O ITULA FONO**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ou te tulai atu ma le agaga faaaloalo e faatu le lafo, *Mo le suia o tatou Itula Fono e faapea, amata i le 9:00 i le 1:00 i le aoauli, ona tatou malolo ai lea, ona toe usuia ai lea o le Fono a le Palemene mai le ta o le 3:00 i le ta o le 7:00 ma malolo ai. O le mafuaaga o le tuuina atu lea o taimi ia o le 1:00 i le 3:00 ia tau fai ai ni galuega a sui usufono mamalu o le Palemene, ia ona tatou toe faaauau ai foi lea i le agaga. Se o le vave lava ona pasi o le tatou Tala o le Tupe, o le vave foi lena ona tatala atu seleni ia e faagaioi ai tatou galuega.*

O le talanoa atu lea ma le lafo lau Afioga.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

*Faaluaaina e le Sui Palemia ma le Minisita mo Pisinisi ma Alamanuia.*

*Na faamaonia le lafo.*

*Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2017/2018 ma le Tulafono Tau Faaofi o le Faatatauina o Tupe 2018/2019.*

**FOFOGA FETALAI:** Ia, ou te tapa le sui usufono mo Vaisigano Nu.2 e tulai mai e faaiu mai le saunoaga ua maea foi le taimi o le sui usufono mamalu.

**Afioga TAPULESATELE MAUTENI TAMASONE METULI II ESERA:** Faafetai atu i lau Afioga i le Fofoga Fetalai.

O le a le toe agai se manatu i le finagalo faaalua e le Palemia, a o si mea laitiiti lea talosia ia e faataga mai e fai atu ai se faamatalaga ona o le tulaga e lavea ai mea o kia. O le tulaga lea lau Afioga i le Minisita, e toe avatu pea se talosaga e tuu mai se avanoa mo tatou taavale ia e faaaoga i faatoaga. E i ai lava le manatu o le saisaitia o lo o saisaitia ai ona o le Tulafono foi a le Malo ma le LTA e i ai tulaga faapena i le tausaga o taavale. E i ai lava le manatu o lena e i ai Tulafono ma aiaiga e mafai ona faatino ai le tulaga lea mo le aafiaga o le siosiomaga, aua pei o le tulaga tele lena o lea e i ai manatu ia e faafaigata ai ona faatino lea tulaga. E moomia tele pei lava foi ona talanoa muamua atu i le tulaga lea i taavale o lo o mafai ona faatino mai e aiga e le o talafeagai mo faatoaga. Pei o le tau soso atu lea i le vaega lea.

Lau Afioga i le Fofoga Fetalai, e avatu le faafetai tele i le Minisita mo Galuega, Felauaiga ma Atinae Eseeese i le lagolago foi ma le Pule Sili faapea le Pulega o le Suavai, o lea ua mautinoa lau Afioga ua manuia la outou sailiiliga lea sa faatino foi isi o matou nuu i Sataua. E le faapea foi o se mea na o Sataua, e le lavea uma ai le itumalo. E i ai foi le maitau ma le faalogologo atu o le a faamanuiaina uma lava e tau mai i le isi itu i le mea foi o lo o afio ai le Minisita o Faatoaga. E tatalo atu i lau Afioga i le Minisita e faaauau ia ona faataunuu fuafuaga pei ona i ai le faatino o se fale o le pamu atoa ai ma le eliina ma le tanumia o tatou paipa foi ia ia soo nai nuu uma ia ina ia oo atu i le lotu a tamaiti. Aua o lea ou te maitau o le isi foi talanoaga ia oo atu i le lotu tamaiti ua mautu pei o le lotu a tamaiti o le tausaga na tea nei. Ae i ai le talitonuga o lea ua mautu foi sou finagalo ma le Pulega o le Suavai e faatino le tulaga lea mo le soifua maloloina o nai o tatou tagata.

E faafetai atu foi i le Malosiaga Faaletise ua manaia lava si o matou itumalo, ae tatalo atu pea e toe avatu nisi moli, e moomia lava nei mea o moli aua le feoai i le po o tagata ia maua le saogalemu aemaise foi o taavale ma tulaga faapena.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le a faauma atu lau Afioga i le Fofoga Fetalai. E avatu ia le faafetai mulimuli i le Minisita o Tupe, o le tulaga lea e fia avatu ai se manatu e faasino lea mo tatou fanau lea ua oo mai i luga i aoga maualuluga ia, o fanau lea e aotauina ina ia maua ni avanoa faaaprenitisi e oo atu ai i ni galuega foi nei a le Malo po o ni galuega a le aufaipisinisi. O lea lava e maitau atu o lea e i ai le tupe lea e faaagaaga lea e ave i le MCIL, ia atonu o nei tupe ai o ni tupe mo le taimi lea ua e faigaluega ai, lea ua fai ai lau faaaprenitisi. A o nai aoga foi nei lea e maitau atu lea e i ai le Don Bosco lea e i ai le latou aoga lea mo le aotauina o tamaiti mo le tapenapena faa-Aperenitisi, pe le mafai ona maua sina fesoasoani. o le manatu lau Afioga i le Fofoga Fetalai i le tulaga lea, a tatou maitau, o nei faafitauli e le na o tatou o lea e tulai mai ai, e faapea foi i nisi atunuu, e oo lava i atunuu tetele e agai faapea agai i isi pito, ae oo ane i le taimi e moomia ai e leai se palama, leai se kamuta. E pei o le tulaga lena e tatalo atu ai i lau Afioga i le Minisita o Tupe.

Lau Afioga i le Fofoga Fetalai, e lagolagoina e lenei sui usufono le Tala Faatatau Autu o le Tupe 2018/2019. Soifua.

**FOFOGA FETALAI:** Malo faafetai. Malo saunoa i lau Afioga i le sui usufono mamalu. E maitau atu o lo o tulai mai se tasi o sui usufono mo Falealili.

Tulai mai lau Afioga i le Gafatasi, sui usufono mo Falealili Sasae.

**Afioga FUIMAONO TEO SAMUELU TEO (Falealili Sasae):** Faafetai i lau Afioga i le Fofoga Fetalai mo lou avanoa. E manatu o lea ua matu fau aua le tautega i le paia o le Palemene nei aemaise foi o le taligasua i le Afioga i le Palemia, le Aiga Kapeneta aemaise foi o lau Afioga o lo o faatautaia le Fono, ua maua foi se matou faasiliga malosi. O upu masani a le atunuu, a faufaupupue galu feai o le sami, ona faailomala lea o peau o le Matasaua. Peitai, o lea ua lio matagivale ma ua to i tua Apolima ua tino le soifua ua ala ai ona tatou feiloai fialia ua malualii ai le seuga i lenei taeao. A o se faafogafoga tapuai foi a Lana Afioga Mamalu, O Le Ao o le Malo lau Afioga i le Tuiaana aemaise foi o Sui o le Fono a Sui Tofia i le Afioga i le Alo o Tuiaana Sagate, ia po o le Afioga i le Tapusatele o le Alo o le Tupu Tafaiifa o Salamasina.

E momoli foi le faatalofa i le Tafatolu Faafetauagai o le Faigamalo, aemaise le faatalofa i lau Afioga o le pao ma le vavao o le Maota lau Afioga i le Fofoga Fetalai. E le toe taea i sau faamatalaga paia o le atunuu aua e manatu o Samoa o le ia e ivi lasi, e le toe tau paopaoina faatupe o muli o taulafoga, ia pe toe tau tapue foi faapuou ua mafuli, aua o upu o Samoa ua taoto a o se alaoo.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ae ou te tulai mai lava e faaali le agaga o le fiafia, le agaga o le faamalo e tuuina atu ai le lagolago o lenei itumalo, i le Afioga i le Minisita o Tupe e tusa ai ma le Tala maeaea o le Tupe ma le saunia lelei. E le mafai foi ona faagaloina i latou o Faauluuluga o Matagaluega aua e pei o latou nei o lo o lima ma vae i ai ia galuega faatino o le Malo ma lelei ai ia le tamaoaiga.

Tulouna ia le Maota tauave i Tiafau, o le Maota e utuutu ai le salefu e saili ai le tofa, a o le utaga e faufau ai le Malo aemaise o le faufauina o Tulafono aua le nofo lelei o ona tagata. E faatomua lau faamatalaga e faapea atu e talia ma le atoatoa le Tala o le Tupe ma e lagolagoina, ae na o ni nai tuualalo, ma nai faamanatu i Afioga i Minisita.

E i ai le lagona ua tele le tagisa o sui usufono e 49 ia 50 sui usufono o le Maota Fono, ia tau ma le Minisita o Galuega e tau faasoasoa. O auala galue ma auala o atinae tetele a le Malo, ae ou te manatua lava, leai o oe lava o se lelei, e te faasoa ma le atamai e te faasoa ma le potu, i le mea o lo o manaomia e tatau ona fai.

A ou tilotilo i lenei itumalo o le tasi nei o itumalo o lo o tu malos i le itu tau faatoaga, ia o le talosaga lava lena o lo o taoto i ou autafa o lau Afioga i le Minisita o Galuega, e le gata o auala e alu i totonu o afioaga, e amata mai i Sapoe ma Utulaelae, ae se i tau faauma le tatou auala i Salani e na o le 30mita lea na faata, ae o lo o faatalitali seia faauma le loaloa o le auala seia atoa lona faatamilosaga. Ia aemaise ai o le auala e alu i uta i Siuniu, ia e oo mai i le taimi nei, a afio lau Afioga, ia ua tau le sao le pasi e alu i uta, ia ona o le 1 lelei o le auala.

E toe avatu i ou autafa ia tatou auala foi ia o auala alo mo taimi o faalavelave faafuasei. O na auala alo e faaaogaina foi o auala galue, ina ia mafai ai ona atinae pea le tamaoaiga e ala i fua o faatoaga, ma uunaia pea ia faifaatoaga ina ia mafai ona latou toto le talo, o le ufi o le taamu ma so o se vaega, ia aua o lea ua lelei ia tatou maketi mai fafo.

A silasila lau Afioga i le tulaga o lo o i ai le maketi i le taimi nei, ua amata ona tau leai se tatou talo. O upu moni lava lena. O le faapea mai ua tele fua o faatoaga ae ua leai se maketi, ia ou te tau atu e sese lena tala. Ua i ai maketi ae ua le mafai ona taulimaina maketi. Ia a le lelei la le faatoatoa lelei i le taimi lenei, o lona uiga la e alu alu lava sioti ia le tatou talo mo le auina atu i fafo ia aemaise foi o le mataiaia o le atunuu.

O le vaega e fia fesoasoani atu ai e piiama i se finagalo i le taimi ua sola o se tasi o sui usufono, i galuega faatino a le Matagaluega, ia e na o se tuualalo, pe a le mea e le toe tuu faatasi ai le PUMA ma le Ofisa o le Matagaluega. O lea e maitauina e pei e foliga e duplicate a latou galuega, ae o le taimi e alu ai, e fai o luga ia i mea e manaomia, ae o le isi vaega i lalo ona tatali ai lava lea, seia umi lava le process lea ona fai. Ia ae na o se tuualalo atu lava faapena a talafeagai ai, ia e manaia ae toe tuu faatasi le vaega lea.



19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ona ou oo mai lea i le Minisita mo Alamanuia ma Leipa, e pei ona ou fai atu, e le umi lava se faamatalaga. Ou te talitonu o lo o i ai lisi ua uma ona faamatuu atu i ai latou e galueaina, a o le tuualalo, afai o i ai i latou o i ai lisi e le o galueaina, aua le maimaua le taimi e tuu ai pea i ai, ae tuu i ai se tagata e mafai ona galueaina lisi, aua le atinae o le tatou Malo. Aua o le maitauina o le tele o lisi, na ona maua lava o le lisi, ona tuu tuu ai lea o le fanua, e le galueaina, ae o lo o fia saili ia ni fanua o latou o lo o nofo taulata mai i le taulaga e galulue ai, o tagata e fai faatoaga ma tagata fai atinae, ina ia faaoga lelei ia eleele o le tatou Malo.

Ia o le isi itu faamolemole lau Afioga i le Minisita, o lea ua sii le tau o le tatou moa ma isi o vaega tuuaisea. O nisi vaega o oloa lea ua i luga le tau, ae o le fesili, pe le i tau ane i lou finagalo, se i toe sii ane ia le tatou minimum wage. Ua fai si umi o taatia le tulaga lea, ia ae alofa foi i le mamalu o le atunuu o lo o faigaluega i le tulaga lea ma le level lea. Afai e le gafatia ona faatau o se pauna moa o le afiafi, ia e oo mai i le taimi lenei, ua le fia faigaluega o lona uiga ua agai loa i le vao e atinae le faatoaga. Ae pe le alagataua ona toe silasila ane, pe le tataua ona toe sii laititi ia si a tatou minimum rate faamolemole. Ia...

**FOFOGA FETALAI:** Ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ia o lo o i ai pea i latou o lo o gafa ma le itu lea e silasila i le maualuga ma le tulaga foi o le vasaga o mea nei o totogi e le gata o totogi o tagata togiaso, ia faapea foi ma totogi o le aufaigaluega atoa a lo tatou Malo.

O lo o i ai lava la ia le latou faautautaga tataua, ia ma le faatofalaiga le mea tonu lea e agai ai le sui usufono. E le faigofie le galuega o lo o feagai ma latou, ona a oo loa ina tagofia mea ia, e tataua ona vaai i le tulaga aoao ma le tulaga lautetele o i ai le tatou atunuu e le gata i totonu o le Malo, ae faapea foi i ai latou i tua, ina ia vasaga lelei. E le mafai ona galo ia te au ia le isi taimi na faataoto ai ia ona o le maualalo tele o totogi o tagata o le Malo, lea na siitia ai le 40%, ae le mafai e tupe a le Malo i lona taimi, o lea ou te talanoa atu i le 2006, 2007 ma le 2008. O le taimi lona o lea sa spread out, o lona uiga sa fai faasolosolo ona ua leva ona i lalo ia totogi o le aufaigaluega a le Malo i ona tulaga uma lava. O le ala lona o lea na maualuga tele ai le siitaga ia, ina ia tau faapaleni i le Malo ma le Private Sector latou ia i tua.

A pe a manatua le taimi tonu lea foi na fai ai le tetee foi lea a foma, ia e le i maluelue le Malo ona o lea ua taotoga i le vasaga o totogi, ae sa tele lava le faitioga na aumai i le Malo e i latou i tua. Ua afaina uma a latou pisinisi, ae pau lava le mea sa taumafai i ai le Malo, se i tau tuu tuu mai ina ia i ai se paleni, ina ia taofia ai le mea lea o le tuua o i o galuega a le Malo ae tiai ae o i tua.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ia pei la o le tulaga lena, e lelei foi le laga o mataupu ia, lea ua tulai atu ai, e le o momoe le vaega lea. Ae o le a faapea foi ona valaau i ai po o fea o i ai ia le latou galuega faifaipea, aua a fai lava o la e latou te iloa o la e taoto lava i le lautuatonu, ia ona faapena foi lea ona fuafua mai lava e latou le taimi ma le aso e silasila totoa i le toe fetuunaiga e tataua ona fai.

**Afioga FUIMAONO TEO SAMUELU TEO:** Ia faafetai, o lea ua manino le faamalamalama a le Malo. Ia ona oo mai lea o se faamatalaga i le Minisita o Faatoaga, manatu e manaia ia o le asiasiga lea sa faia ma togi atu i tua i nuu. E tai afe tiapula foi lea a le taulealea po o le matai. E i ai le lagona e manaia ae toe siisii laititi i luga, ia faaopoopo ai ma ni ona tau i ina ia saga uunaia ai pea ia le aufaifaatoaga, ina ia toto ia tatou talo. Ia o le talosaga vaivai, o lea e taumafai le tatou Matagaluega e tineia le manu ainiu ma vaega faalafua ia. Ia e moni lava foi na i ai le polokalame lea o le aoina o le manu ainiu, ae e le o iloga ona tuutuu i ai taimi o nuu ma afioaga, ona o le au tilotilo foi i le tau.

O le faigofie, manaia ae tufa atu i tua iliafi, e o lava latou ina ia faafaigofie ona saili le manu ainiu ma faatamaia, ae ua maua ai ma ni meafaigaluega e fesoasoani tele i le atinae o faatoaga, ma lou faaaloalo lava.

O le Minisita mo Fesootaiga, Faamatalaga ma Fesootaiga Vavave Faaneionapo, e laititi lava si faafitauli i si ou itumalo, e nenefu ala ata, ia aemaise foi o nisi o alaleo foi lea masani e i ai vaega e matua le ola ai lava. A faapea e alu atu se siakiina foi lea, ia e manaia le toe e fia matamata nisi vaega o le itumalo i lakapi, e ui foi lava ina faaletonu ia tatou au ae fia matamata pea i ai.

Lau Afioga i le Minisita mo Aoga, Taaloga ma Aganuu, masalo o se vaega lea pe mafai ona tagai ane e talanoa atu i le Pule o le tatou Iunivesite. O lo o i ai ia tatou alo ma fanau o lo o aoga i Iapani, o le mea o lo o tupu o lo o i ai ia le feteenaiga tele lava ona e ese le faamalamalamaina o le tulaga iinei ae le i malaga o tatou tagata ia i fafo, ese le mea la e tupu i fafo. O le mea la e tupu, e toatele i latou ua drop out ma le aoga, ia ona toe saili loa lea o pasese e toe foi mai ai i aiga, ae e le o malamalama foi aiga i le mea la e tupu i fafo. O le toatele o latou o la ua toe fund e i latou ia latou aoga, pe afai ae lusi le vaega lea o sikolasipi, ona o le vaega muamua o le sikolasipi lea e faapea e tataua ona pasi le faa-Iapani. A uma la le term muamua e le pasi, o lona uiga ua lusi le sikolasipi, ia ona meme ai lea o le tamaitiiti po o le teineitiiti aoga i Iapani, ae e le o iloa atu e matua. Faamolemole lau Afioga pe mafai ona tagai totoa ane i lea vaega.

Ia faafetai i le Minisita mo Tagata Tafafao Maimoa Mai Fafu, ioe, e tele se taimi sa tatou asiasi atu ai i auala o ni turisi a nai o matou itumalo, ia ma lau faamatalaga sa e saunoa mai e aua le popole o le a fai. Ia peitai ane lea ua uma le ono masina ae saunoa mai, e sili lava le talanoa i le Minisita o Galuega e fai ou auala.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ua maimau atoa ai le penisini sa faaalua, ua sese ai ma le Minisita na faaalua e asiasi i lea vaega ae ui i lea, o lea ua faafofoga mai le Minisita o Galuega, ia o auala o nai turisi o le itumalo, o le tasi lea o alagatupe. A lelei le auala e alu agai ai turisi, maua foi le toatele o le autafafao, ia maua lena tamaoaiga e faaopoopo i a tatou tupe maua.

Ia aemaise foi o nisi o vaega o le pitonuu nei o Salesatele i lona vaega o le itu i Sasae, e laitiiti e le atoa se 20mita, ia lea ua maua atu e le o i i le Minisita mo Punaoa Faalenatura ma le Siosiomaga, ia afai o e faafofoga mai, e fia fai se taligalu a le nuu lea faamolemole, si o matou pitonuu o le nuu lea e na o le 30 lava mita le umi o le taligalu e manaomia, ona e fai si maupuepue ma maualuga o le isi vaega o le aai, ae pau lea o le vaega ua tau aafia ai le elelee ma afaina ai ma le alatele faamolemole.

Ia faaii mai lea o sau faamatalaga, ia manuia tele lau Afioga i le Fofoga Fetalai, ia saga tului e le Atua lou malosi, ia aua le faafoega o le Fonousu a Samoa. Ia maua foi le soifua laulelei le Afioga i le Taitai o le Malo, le Sui Palemia aemaise ia Minisita o le Kapeneta, ia aemaise foi ia latou lagolagosua i le galuega. Manuia foi le Itu Agai, o lo o agaia ia le tatou Malo, ia ola foi le matou Taitai, i le suafa o Iesu Keriso, amene.

**FOFOGA FETALAI:** Malo faafetai le saunoa i le Afioga i le sui usufono mamalu o Falealili i Sasae. Malo malele mo mataupu aanoa aua le itumalo, ia malo faafetai. Amuia foi le itumalo o faafogafoga mai.

O le a tatou see atu i le sui usufono o Siumu, tulai mai lau Afioga i le sui usufono mamalu o Siumu e te saunoa.

**Afioga FAALOGO IOSEFA SOPI (Siumu):** Faafetai i lau Afioga i le Fofoga Fetalai mo le avanoa, ia e faatalofa atu foi i le afio o lau Afioga i le Taitai, Sui Taitai, le Aiga Kapeneta, faapea lena itu. Ia e faatalofa foi i lenei itu le vaega o lo o agaia ia le tatou Malo. E faatalofa atu foi i Faauluuluga ma Pule uma o kamupani, ia aemaise ia Faauluuluga o Matagaluega a le Malo.

Ia e avea foi lenei itula e faatalofa atu ai i Lana Afioga Mamalu, O Le Ao o le Malo, le Sui Ao faapea Samoa o lo o faalogologo mai i lenei itula.

E avea foi lenei avanoa e faatalofa atu ai i si ou itumalo o faafogafoga mai i lenei itula i le Susu o Faafeagaiga o lo o outou nonomanu aua se manuia o le tatou itumalo, o le paia lava lea ia Sa Asomua ma Aiga e Lua, Tuuu ma lo outou Aiga Sa Tuuu, Falelua o Tulafale, Fofoga o le Alataua, Utaileuo ma le faletolu. Ia o paia na o lo tatou itumalo, ia tapuaia maia ae o le a fai se sao o le tatou itumalo i lenei Tala o le Tupe 2018/2019.

E muamua ona avatu le faafetai i lau Afioga i le Minisita o Tupe mo le tapenaga o lenei Tala Faatatau o le Tupe, faafetai foi i le Faauluuluga o le Matagaluega ma i latou uma sa gapatia aua le tuufaatasiga o lenei Tala o le Tupe. E tau eseese ma faauigaga ma le sui usufono lea mai Savaii i le Tala o le Tupe. O lau ia faauigaga o le Filifiliga Toa, a o ia o le Filifiliga Toa. Ia faafetai tele mo lea vaega.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E lua lava vaega o le Tala o le Tupe ou te faafetai ai i lau Afioga, o le vaega muamua, o lo o i lalo pea o le 50% le tatou foreign gets foi lele mai atunuu i fafo. E molimauina o le fa lenei o tausaga o lo o i lalo lava o le 50% lea tulaga. Faafetai tele i lau Afioga.

Ia ma le isi tulaga, faafetai e leai se tax e siitia i lenei tausaga faaletupe. E to lou pulou i lea tulaga o lo o tusia i lalo o le Tala o le Tupe i lenei tausaga. E momoli atu ai le agaga faafetai tele i lau Afioga. O ou mama na.

Lau Afioga i le Minisita mo Aoga, Taaloga ma Aganuu, atonu o le tele o mea o le a toe lau atu, o mea sa avatu muamua, ae na ona toe faamanatu atu lava, e tuitui atu ma toe tuitui, a o i ina, tatala maia le faitotoa. O le tulaga lea pei ona silafia e lau Afioga sa malaia le faleaoga o lenei itumalo, ua maea ma ua maua maua le tupe e tau amata ai, ae o lo o tau sailiili lava se tupe e faalava ai ia lava le faasoa a lau Afioga, ia tuu maia sina vaega e fesoasoani ai. Pe le o le taimi foi lenei ua tatau ai loa ona fai le ta malae aua ua malaia le faleaoga, ou te iloa ua tatau loa ona oo le faasologa i le malae lea.

Oo atu lau faasologa i le Minisita mo Faatoaga ma Faigafaiva, faafetai tele i lau Afioga ua toe o se aga nei ona faataunuuna lea o le mea tosovaa po o le fish ramp lea a le matou itumalo. E silafia foi o lenei itumalo e tele le aufaifaiva, atonu o se taimi pe le o toe mamao atu ona faatino lea o lea tulaga. Ia, ae talosaga atu i le manu ainiu, po o le a le mea e le matua faamamafa ai, fai se campaign a le atunuu ato ina ia latou silafia e ogaoga le faafitauli ua tulai mai ona o le manu ainiu. Atonu pe tolu, fa ni sui ua laga lea mataupu a o le lona tolu foi lenei ona ou lauga i le Palemene lenei sa ou taua lava le manu ainiu. Se i e alofa ane lau Afioga i lea vaega. Faafetai i le pole fagota, o la e ua molimauina e le itumalo ua i ai le pole ua mafai ona oo i ai faigafaiva i lenei itula. Faafetai tele i lau Afioga.

Lau Afioga i le Minisita mo Galuega, Felauaiga ma Atinae Eseeese, faafetai o lea na oo atu lava lau asiasiga i nisi o matupu sa ou oo atu ai foi i lau Afioga i le alavai lea ma nisi o auala i tua i le itumalo, ae na ona tuitui atu pea i auala galue se i tagai ane i auala galue o lenei itumalo, ma auala e lua o lo o i uta i Vailima i le pitonuu lea e tau o Siumu 2 lau Afioga, se i tagai ane i le auala lea, ua faaleagaina ua tau le oo ai ni taavale laiti i tua e momoli pasese ma tulaga uma faapena. E pei o le tele ia o nai vaega o lea e fia taua i le lauga i lenei itula.

Lau Afioga i le Minisita mo le Soifua Maloloina, faamalo i le galuega foi o lo o fita ma lau Afioga i lenei vaitaimi i le tuufaatasiga lea o vaega e lua. Ou te iloa e le o se mea faigofie le tuufaatasiga, ae o lo o taumafai pea lau Afioga i lenei itula aua lea matata.

Lau Afioga i le Fofoga Fetalai, e na o le pau ia o nai manatu o lenei usugafono e momoli atu ai le faafetai tele i lau Afioga, ma ia manuia le Fonousu a Samoa i lenei itula. Faafetai.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**FOFOGA FETALAI:** Malo faafetai i le sui usufono mamalu mo le itumalo o Siumu. Malo saunoa. Ua oo mai le faasologa i le sui usufono mo Safata Sisifo. Tulai mai lau Afioga i le sui usufono mamalu.

**Afioga LEAANA RONNIE POSINI (Safata Sisifo):** Lau Afioga i le Fofoga Fetalai, e fia faamauina foi le faatalofa atu i lau Afioga aemaise foi le Afioga i le Palemia, le Kapeneta faapea foi Minisita Lagolago, aemaise foi o le tapuaiga a Samoa, aemaise foi o lou itumalo i le Aiga Satunumafono. Ou te manatu o le a avatu ia se manatu o lenei itumalo e uiga foi i le Tala o le Tupe ua folasia nei i totonu o le tatou Palemene. E faamuamua atu se manatu i manaoga o lou itumalo ona agai atu ai lea o se manatu i manaoga lautele o lou itumalo i auala ia i totonu o lo matou itumalo e amata mai i Vaiee seia paia Salamumu. O auala uma ia o lea e silafia e le Minisita mo Galuega, o lo o i ai uma lava auala ia. Ua avatu foi talosaga, ia na ona toe faamanatu atu i lau Afioga i le Minisita, aemaise le auala lea e i Lotofaga faamolemole lau Afioga, o le auala lea e agai mai Lotofaga seia tau mai le mauga lea o Fiamoe, o le auala lena ua ou tau i le auala lena, masalo a sao mai, tasi lena auala puupuu e tau i tua i lou itumalo. Ae le gata i lena o laufanua na e i ina, o le matua lelei lava o mea tau faatoaga e i ai. Ou te iloa la a tau i ai le auala lea ma sosoo atu le auala lena lau Afioga i le Minisita, e le gata i le feoaiga o le mamalu o le atunuu, a o le tulaga o faatoaga o le a faaleleia i lea tulaga.

O le isi itu o nai moli auala i si o matou itumalo, e tele lava nai moli ia e fia moomia se malamalama i le po aua lava le feoaiga a le mamalu o le atunuu.

Ia lau Afioga i aoga tulaga lua i le matou itumalo lau Afioga i le Minisita, e le o se faafitauli ae ua leva foi ona tatalo atu i tulaga o faiaoga e le o lava tulaga o faiaoga e i ai, ou te talitonu o lena e faamau e lau Afioga le tulaga o faiaoga ma tulaga faapena, aua ou te talitonu o i tonu lava e i ai le faavae o le aoaoina o fanau o aoga tulaga lua. O le ala foi lea e taulagalaga ai o matou manatu aua o le faavae lea o le ola aoaoina o tatou fanau. E momoli atu foi le faafetai i le matou kolisi a le matou itumalo lau Afioga i le Minisita, o la e ua i ai le faaopoopoga o nai faiaoga la e ua i ai ae le gata i lea o le toe faaleleia o matou faleaoga.

Ou te faafetai i le Afioga i le Minisita mo Faatoaga i le toganonu lea na ta talanoa ai foi ma lau Afioga o lea ua i ai le kamupani lea o le a tulei atua le nonu foi lea aua ua tau fati foi le matou itumalo e toto le laau, ae o la e ua i ai le maketi lea e ave i ai le nonu lea, faafetai o lea ua faalogologo mai le itumalo e toe toto le nonu lea aua foi se isi itu o le tamaoiga o le itumalo. Ou te faafetai atu ai i lau Afioga i le Minisita mo Faatoaga.

O taligalu ia o le matou itumalo lau Afioga i le Minisita mo le Siosiomaga, ia, o lea ua leva ona tatou feiloai ma lau Afioga i le taligalu lea o Sataoa faapea foi ma se vaega o Saanapu, ia, o lea lava e talitali atu, na ona toe faamanatu atu i lau Afioga le tulaga o taligalu ia.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le isi mea lau Afioga i le Sui Palemia po o le Minisita mo le Siosiomaga i le itumalo lea o matou i Safata, masalo o le isi lea itumalo e tele ai le togatogo, o i lea e tele ai le ia pe i ai ni nai polokalame foi nei faalauiloa e lau Afioga i le Minisita pe faalauiloa pe faaatili ai ma faataua e tagata uma mea ia o togatogo faamolemole. E le gata foi i lea pe fai ni nai mea foi nei e agai atu ai le au turisi, e le gata la i le faataua o le togatogo, ae agai atu foi turisi e matamata i ai, aua ou te talitonu o togatogo ia e i lo matou itumalo e pito tele lava ia Samoa i lau lea maitau.

O le isi mea lau Afioga, se o le matou nuu ma le matou itumalo e tele ai le mea lea o le fugafuga, e i ai le kamupani lea na o atu e ao mai, ae ua maitauina ua agai atu foi le Matagaluega lea o le Siosiomaga taofi foi lea. Ae sa ou tofu i tai i le aau o le matou itumalo, e matua mafiafia le fugafuga la e i ai, pe le taumafai e tau faamanifi foi lele ae toe faatupu le mea leaga e tupe lelei foi le mea. Ae pei e tatalo atu i lau Afioga, pe tuu mai pea se avanoa e tatala ai pea le aoina o le mea lea o le fugafuga lea aua e i ai kamupani ia e o atu e matua tupe lelei lava le tulaga o le fugafuga lea.

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e taua tele le mataupu leni, e faamalo foi i le sui usufono na laga. Sa tatala le fugafuga e i ai le tausaga na tatala ai, e le i umi lava ona tatala ae le toe maua le fugafuga i isi nuu ona toe taofi ai foi lea. O le faamatalaga ua ou maua, toe lava o Samoa le atunuu o atunuu uma o le Pasefika o lo o maua pea le fugafuga ma mamao, ae tatala loa, e le atoa le tausaga ae matua leai lava ma se mea e toe maua, ona e maoae lava le manaomia e faleaiga i fafo. O le mea la lea o lea e faataua e le Matagaluega o Faigafaiava e le tele ni ogasami o Samoa. E le atoa le tausaga e le toe vaai e se isi ni fugafuga, o ni mamao ma mea uma lava, ae lelei lava le taofiofi pea o mea ia o le tatou siosiomaga e tua pea i ai tatou nuu. O le ala foi lena e tasi o lea ua taofia ai ele Kapeneta le mea lea o le niu e toe toli faasoloatoa, aua o le tagata lava ia, o le mea lava lea e manao i ai le tagata, na o ia lava, selfish, e manatu faapito lava na o ia lava, a o le Malo, e i ai le vaaiga lautele e puipui mea ia ina ia aua ne i alu alu ona motu lea. E tele naunau lava mea o kamupani e omai e fia tuuapaina le suaniu. Ma o le taimi e faatino ai le mea lena, e le toe vaai Samoa i se popo. A avane ai na mea e i ai taimi ia na usu ai nei le fono i Malua ua tai \$5 le tau o le niu, ua toli moto ifo lava i lalo niu ona o uiga lava ia faalenatura o le tagata e manao vave ina ia faaoga i le taimi leni, ae le vaai mamao mo a taeao. O le Malo la lea e i ai le vaaiga mamao ina ia taofiofi ai mea ia mo le tatou atunuu. E oo mai nei lava o fai mai le isi tagata ia te au, ua e vaai i le sami o Manono i aso ia o tele le loli ma mea faapena, o le manino ia. Ae vaai la i le tele o le vaega ua pefu, aua o mea ia latou te faaogaina mea ia.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Lau Afioga i le Fofoga Fetalai, o le mea lea ou te faafetai ai i le Matagaluega o Faigafaiva, o le latou matafaioi lena o latou lea e o i fafo ma vaavaai i isi atunuu o le Pasefika na ona omai lava o le au Iapani ma le au Saina kilini uma lava ave, e maua mai le tupe, e oo atu i le vaiaso lea ua leai se mea ua uma le tupe, ae toe o atu i tai, ua leai ni mea o toe maua i tai e tua i ai o tatou nuu.

Lau Afioga i le Fofoga Fetalai, e pei o le toe faaopoopo atu lena, ae taua lava le faamanatu mai a le sui usufono, ae o lo o maua ai ma le avanoa faamatala atu ai ia mafuaaga taua o le taofiofi o le Afioga i le Minisita aemaise ia i latou o lo o faafoea le Matagaluega.

**FOFOGA FETALAI:** Malo faafetai. Masalo ua manino lea vaega o le itu a le Malo e silasila mamao, silasila mamao aua le manuia lautele o ona tagata.

Tulai mai le sui usufono e saunao.

**Afioga LEAANA RONNIE POSINI:** Faafetai i lau Afioga i le Fofoga Fetalai, e faafetai foi i le Afioga i le faamalamalamaga a le Afioga i le Taitai o le Malo, ia o tulaga lava na o lea e agai i ai, e faapena foi so matou manatu, ae pei o le tau faamanifia o le mea...ae pei ua tele tele na ala ai ona ou tau afea le tulaga lea.

Ae faafetai tele i lau Afioga i le Minisita mo le Soifua Maloloina, e talitonu lava o lea e faatalitali mai lava si o matou itumalo, e talitonu i le faasoaa lau Afioga, e i ai se taimi ona faatino lea o le falemai faaitumalo i totonu o lo matou nuu o Saanapu.

Ona oo lea o sa matou tala i auaunaga lautele o lo tatou Malo lau Afioga i le Fofoga Fetalai, ona faapea lea o le faamatalaga i lau Afioga i le Minisita mo Aoga, Taaloga ma Aganuu. E fia agai lava se tala i le tulaga lea o pili o le tatou Iunivesite, e toe fai ai se tala ona o le tatou Iunivesite e 3,200 ma ona tupu tagata na lesitala i le tausaga lenei, o lea e i ai le Tulafono o le tatou Iunivesite foi lea e lima loa vaiaso ona tutuli lea o tamaiti e le toe...o lau faitau lea na ou saili atu e 80 ma ona tupu tamaiti na tutuli, mai totonu o le 80 ma ona tupu tamaiti lea lau Afioga e i ai tamaiti e toetiiti lava atoa le totagiina o latou pili, ae i ai foi e matua le totagia lava a latou pili. O le naunautaiga foi lea o lou manatu lau Afioga, a tuli nei le tamaitiiti lea i le lua vaiaso, e lua vaiaso faatoa toe maua le pili ona toe sau lea, o le tele ia o le taimi lea ua tiai ai le aoga, e tele foi le avanoa e fail ai le tamaitiiti lea e toe sau i totonu o le faleaoga. E le gata la i le toe totagi atoa o le pili e toa agai mai ai, ae toe faaopoopo le 10% pei se faasalaga lea o le tuai ona totagi le pili. Ou te talitonu lava e le afaina le mea lea o le le totagia e sue atu le lima vaiaso, e le i ai ma se mea ua totagia, ae ua ou maua tamaiti foi ia ua toe o atu ua faaletonu a latou aoga, ona o le taimi lea na tutuli ai.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le uiga o lau tala, ia pe i ai se isi faiga a lau Afioga i le Minisita e toe fai agai i ai le tulaga lea. O tua foi i o tatou aiga i tua, e le tutusa uma ia le tamaoaiga o aiga. E i ai foi nai aiga o lea ou te maitau i tua i lo matou itumalo, ia o le tamaitiiti lea o lea e faamoemoe e faaeaina le aiga e sao mai totonu o le Iunivesite ia ma faaea ai nai o latou matua ma o latou aiga. O lea e tatalo atu ai i lau Afioga i le Minisita, se i e silasila totoa ane i ai lau Afioga.

Lona lua lau Afioga i le Minisita, pei foi ona ou taua i le Fonotaga tausaga talu ai, se i silasila lava lau Afioga i le tuueseeseina o le tatou Aoga lea o le Matata Eeseese ma le tatou Iunivesite....

**FOFOGA FETALAI:** Malie le sui usufono, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, a o le i see ese le sui usufono, e i ai le mea faapena na tupu i le isi tausaga, na taofi ai e le Iunivesite tamaiti i le mea lea o le tuai na totogi a latou pili, ia ma matou feiloai ai lea ma le Iunivesite le Pulega, le iloa po o ua valu ea tausaga talu ai, ona faamatala mai lea o le mafuaaga ua ala ai ona faamalosi lea lea. Leai o le mea na galo, ia o lea la ua talosaga mai matua e toe tatala le avanoa, e i ai nai matua na oo atu ia te au na mafua ai ona ou taloina le fono, le fono faapitoa a le Kapeneta na valaau ai le Pulega o le Iunivesite. Ona fai mai loa lea o le Pulega o le Iunivesite, ua faalua ona ave i ai le avanoa, ia ma o lea o le a tapuni loa o le a fai suega ma e le mafai ona toe tatala le avanoa, aua a tatala le avanoa, ona faapena na o le tasi lava le taimi na tatala ai ona faalua loa lea e faalua suega, ona o le itu lava lea i matua pei e manatu faatauavaa i le totogiina o pili a le fanau e alu seleni i isi mea, a o tatou o Samoa o le faafitauli lava lena. Na umi lava le matou fetufaaiga na faia i totonu o le potu a le Kapeneta o faauliulito lava le finagalo a le Pulega, o lea ua lua suega ona o le mea lava lea o le le totogia o pili. Ia ona ave loa lea o le fautuaga a le Kapeneta, o le a le mea na le faia ai se isi suega faapitoa e tatala le avanoa. Fai i le a? Fai i le taimi o le faaiuga o Tesema agai ia Ianuari, a o le taimi lena o lea o le a malolo ai matou. Ona fautuaina loa lea o le Kapeneta, o lea sa tasi le suega mo latou e tausisia le totogi o pili, o lea la ua lua, faatolu loa, ae toe tatala le avanoa. O le tala a isi na omai ia te au, se i alofa le Malo, o la sa maua tupe ae ua fai ai mea o faalavelave.

Ia o le fautuaga lena o le tuualalo lena a le Kapeneta na ave i le Pulega o le Iunivesite, e tupu lava mea ia i Samoa nei, e ave lava le tupe e faamuamua i isi faalavelave ae tau le manatu mamafa seiloga ua faapea mai le Iunivesite, ua tapuni, ona faatoa laga loa laia, oi e le o le mea moni la le mea lea. O lena la na tolu ai lea o suega i le tausaga lena, ae toe ave le avanoa i matua e talia ai ia pili ia.



19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le uiga lea ou te avatua, e i ai lava matua e maua lava pili, ae i ai le mea foi lea o le ave muamua i le isi mea ave i le isi mea, aemaise lava pe a tasoo mai oti. E manatua foi o le taimi lea e tasoo ai oti ae o le taimi foi lea e tapuni ai ma taulaga, a. O le masina ea lea o Novema ea, a? E tapuni ai taulaga ma alofa. A o foi lea o le e fai mai le Iunivesite, o lea o le a tapuni, ia faatoa laga loa matua manatua pili. Ae le o se mea e fou, ua atoa le fia masina o faamanatu mai e le Iunivesite, pili, pili, pili. Ia o le upu la na ave i ai e le Kapeneta, sole, manatua outou o Samoa, e faapea e tou te le o faia mea ia o lena foi tou te faia, outou o Samoa. Le mea lena o lea e fai e matua la. Tuu pea le avanoa ae malilie, faatolu a outou suega i lenei tausaga, ae toe fai le isi suega mo latou ia e tuai ona totogi pili.

O aso sa ou aoga ai, a atoa le lua vaiaso ua tuli foi au e le matou aoga, ia ou alu atu loa sau fesili i le isi vaega lena, matuai ou le iloa se tali. Ae ou fesili atu i le...o le a le taimi na fai ai mea ia? Le taimi tonu lava lea na tuli ai oe. Sa tupu foi la i lo matou taimi, tupu uma lava ia tatou. A o le mea lea e fai fai lava agai i ai, o le ave o le faamuamua i faalavelave o oti, o saofai, ia o taulaga, ia ma alofa, leaga o le taimi tonu lava lea e fai ai mea ia. A o le aoga o le...o le ala o lou tulai atu, pei e aoga si au agiagi ia e faalogologo mai ai ia matua, aua o le mea nei e le o se mea pei o se oti, o le oti o le mea e tupu mai loa, e le iloa pe tupu mai nei, agai loa lou aiga e fai le oti, ona e tilotilo atu loa i le oti lea, oka, oka, oka, oka, pe luaselau faifeau lea e i ai, e tofu uma lava ma le sua. Ia uma loa ia le oti, ia fesili atu, o totoe la se tupe mo le totogi o pili o tamaiti? Ua leai se mea ua alu uma i i. O le mea lea e moomia ai le i ai o le faautautaga tatau o le commonsense, ia i ai foi se commonsense i matua e vaai i mea ia, o mea ia e eseese mamao ma le oti. O le oti e tupu faafuasei, a o le pili e tolu, fa masina o tautau mai e Iunivesite pili, pili a fanau.

Lau Afioga i le Fofoga Fetalai, o le mea lava lea e tupu ia tatou, e sese le mea o lo o ave i ai le faamuamua.

**FOFOGA FETALAI:** Malo faafetai. Ia se i tulai mai le sui usufono ai ua manino lea vaega.

**Afioga LEAANA RONNIE POSINI:** Lau Afioga i le Fofoga Fetalai leai o lea ua manino lava le saunoaga a le Palemia o tulaga lava i le soifuaga ma tulaga faapena, a o le matou lea tuualalo atu leaga o le matou faitau foi lea o le lima o vaiaso talu ona ae le aoga ia ona faamuta lea. O le matou tatalo, e a pe a tuu i le vaiaso lona sefululua, se i vagana le vaega foi lea e matua le totogia lava pili, ia ona faamuta lea i le vaiaso lona lima. E fai atu o le vaiaso lona sefululua, o i ina o le a muta ai le tulaga o aoaoga ona oo lea i le vaiaso lea e tau o le study week, ia e le mafai ona le totogia, aua o lau sailiiliga o la e totogi uma lava pili. Na o se tuualalo atu lea lau Afioga i le Minisita a o lea ua manino le saunoaga a le Palemia, ia manino atili ai le mataupu.

Lona lua lau Afioga i le....

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**FOFOGA FETALAI:** O le a ou fesoasoani atu. O la ua manino le saunoaga a le Palemia i le vaiiliu lea, aua o tatou tagata e ese le faigata, ioe, e tutusa uma lava tagata na fai e le Atua i le faatusa o le Atua, e tasi lava le mea e eseese ai o le tofamamao. Ia e silasila i ai i le itu lena, aua e tatou te fiu foi e taumafai atu, ia afai o le faiga lea e tatou te taumafai foi lea e faamatanana o tatou tagata, ia ona limataitaiseseina ai lea, ae lelei le matimati mai o le saunoaga a le sui usufono mamalu.

Tulai mai le sui usufono e faaauau mai le saunoaga.

**Afioga LEAANA RONNIE POSINI:** Lau Afioga i le Fofoga Fetalai ona oo mai lea o sa matou tala pei ona taua le aoga lea o le Matata Eseeese o lea e i lalo o le tatou Iunivesite. O le matou foi lea tatalo i lau Afioga i le Minisita, e le tasi foi le lua ni sailiiliga ma tulaga faapena i tulaga o tagata foi na aumai ai a latou fautuaga aoaoina i le tulaga lea, pei o tulaga ua aveese mai ai le tatou aoga faa-Matata Eseeese.

Lona lua lau Afioga o le tatou aoga lea Faafofomai lea e i ai i i le tatou Iunivesite, se i toe silasila totoa ifo i ai lau Afioga i le tulaga lea e i lalo o le tatou Iunivesite foi lea o le Faculty of Medicine. Pe le o alagataua aua o lea e taua maua i isi au sailiiliga, a tuu foi i le tulaga, o lo o i ai nai lavelave o lo o i ai i totonu o le tatou aoga lea Faafofomai. Pe le o se tulaga e toe fai ai se isi tulaga e toe faamaoti ai ia le tatou tulaga lea o le tatou aoga Faafofomai lea.

E momoli lau faafetai i lau Afioga i le Minisita ona o le Faalapotopotoga lea a le SQA. I lau maitau i le Faalapotopotoga lea e faafetai atu ai i lau Afioga, le Pulega ma le Matagaluega, ona o le latou sailiiliga lea o tatou aoga faaauau nei, aua o tatou aoaoga faaauau nei lau Afioga e aumai lava latou tusi pasi ma aumai a latou faailoga e fai, ia pei ua avea le SQA latou te sailiilia uma tulaga ia, po o ausia agavaa o tusi pasi nei, ana leai ia le tatou Faalapotopotoga lea, o lea foi e maua i i lea foi sa maua ai le tulaga maualalo o le tatou Matata Eseeese i le tulaga o aoaoga faa-Matata Eseeese, ona o le le lava o mea e faatino ai ia aoga a tamaiti, ia ma faatupe ai e le SQA le tulaga lea. O le mea lea e momoli atu ai le faafetai i lau Afioga i le Minisita i le tulaga o le Faalapotopotoga a le tatou SQA ua i ai nei.

Lona tolu lau Afioga se o le tatou lakapi lea o le Super Nine lau Afioga i le Minisita, po o le tatou lakapi lea o le Super 9 aemaise lava ia Au a tamaiti foi lea e i lalo o le 20 tausaga, e tau sailiili atu, o le tele o Au nei, ua tasui pepa fanau a tamaiti, ua faalaiti foi lele ia pepa fanau a tamaiti, ae pei o lea e matou te saili atu, e mafua mai i aoga, e mafua mai i aoga e tasui ia pepa fanau a tamaiti, ae saili atu i tai i le fale pepa fanau, o la e faatoa maua mai aso fanau sao o tamaiti. Ae pei e mafua mai e tausaili atu tamaiti nei, e mafua mai i aoga lea e latou te faia le mea lea o le faalaiti o tausaga o tamaiti, ae ia o e taaalo i a latou Au foi ia au lakapi ia e fai ma taaloga eseese. O lea e fautuaina ai lau Afioga i le Minisita, se i saili ifo lava aoga na e faia le tulaga lea lau Afioga.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ona oo mai lea lau Afioga i le Minisita mo Galuega, Felauaiga ma Atinae Eeseese. E momoli atu le agaga faafetai i lau Afioga i le Minisita, ona e matou te talitonu o lau Afioga o le tasi lea Minisita o le fatu o lo tatou tamaoaiga ona o le tele o galuega o manaoga foi o sui usufono o le Palemene i mea e mananao ai.

Lau Afioga o lau maitau i le afa lea na tea nei o Gita, na ou vaai i ai ou te faafetai i le Faalapotopotoga o le Malosi Faaeletise i le tele o le latou galuega ma le tele o galuega na faatino e le EPC na vave ai ona toe ola ia le eletise i totonu o lo tatou atunuu. Ou te talitonu foi ou te au i le mea lea o aiga ia e pei e mumusu e tipi i lalo a latou laau aua le....e oo mai la i le taimi lea e tupu ai se afa, ia ona faaleagaina ai lea o tatou....e tatau pea ona faamamalu pea le tatou Tulafono o aiga ia e mumusu e tipi i lalo a latou laau. O lau maitau lau Afioga i le vaitaimi lea o le afa, lea na ou vaai i ai i konekarate ia na omai e fesoasoani i le tatou EPC e fai ai le faaleleiga o tatou ina ia vave ona toe mumu, o lau tau maitau i ai lau Afioga, e pei lava ou te tau maitau atu e le o lava le tulaga o le saogalemu, safety o tagata faigaluega. E talitonu lava e tuu atu i lau Afioga i le Minisita, e tatau ona fai ni aoaoga konekarate ia mo le saogalemu safety o tagata faigaluega. Na ou tutu i le isi aso i poumoli sa fai i tua, pe faafa ona taumafai le tama e ae i luga o le apefai, pei e le mafai ona alu i luga pei e lilia le tama faigaluega lea. O le uiga la o lau tala aemaise lava le matata lea, e na o le lua lava minute ia ua uma le soifua. E matua taua lava i lau maitau e le gata la i le faatinoga o ni aoaoga mo le saogalemu o tagata faigaluega, ia ma siaki foi konekarate nei po o lava meafaigaluega, aua a lava meafaigaluega, o le lelei foi lea o le faatinoga mo le saogalemu o a latou galuega.

Ia, e momoli atu le faafetai i le pulega lea o le Samoa Shipping Services ua tele avanoa o tatou tamaiti ia e agai i fafo, aua ou te talitonu o le tasi lea lumanai o tatou aiga o tatou alo ma fanau lea e o i luga o vaa lea e o agai i fafo i le tulaga e maua ai le tamaoaiga o le tatou atunuu aemaise o aiga taitoatasi o le tatou atunuu e maua ai lumanai o tatou fanau.

E momoli foi le faafetai i le kamupani lea o le Samoa Shipping Corporation, lea ua ou taamilo atu i le atu Aleipata ua faamagoto le tatou vaa lea sa ou lauga atu ai foi. Ae talosia o fai ni mea faailoilo foi nei o ni pole aua o ituaiga nofoaga na e tele le ia e agai atu i ai.

Lau Afioga i le Minisita, i le tulaga lea o le maritime, o lea sa maua sa fai le audit a le maritime, le international maritime organisation i le tatou administration lea e i ai i le taimi lenei, o lau tatalo ma le tuualalo atu i lau Afioga, ia faatumauiina pea le tatou tulaga lea o le IMO i le white list foi lea a le IMO i le tulaga lea o le faatumauiina o le tatou maritime, ona a afaina tatou i le audit lea, o lona uiga o le a faaitiitia foi avanoa o tatou tamaiti e agai atu ai i vaa. O le mea lea e tatalo atu ai i lau Afioga i le Minisita, se i e silasila totoa ifo i ai lau Afioga.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ona ou oo mai lea i le Minisita o le MCIL, lea foi na taua e se tasi o sui usufono i le mea lea o le Aperenitisi, e saili atu lava pei na o le fitu matata la e fai aoaoga nei faa-Aperenitisi a ua tupu Matagaluega ma matata eseese i totonu o le tatou atunuu, o le matafaioi lea a le MCIL o le o e sailiili totonu o Matagaluega ma short courses foi nei e faaleleia ai agavaa o tagata faigaluega ona agai lea i le training providers e latou te faia aoaoga ia, a o lea e tau maitau mai le 1972 e oo mai i le aso, pei na o le 7 aoaoga faaaperenitisi lea e i ai a o lea ua tele isi matata ua tataua ona siitia i ai le tulaga lea tau aoaoga Aperenitisi.

Ia, e momoli le faafetai i le tatou kamupani vaalele lea o le Samoa Airways, e talitonu foi ua i ai taimi e tietie ai i le tatou vaalele, e tutusa lelei lava ma isi vaalele ia e agai mai. Ou te talitonu foi la e ola a le tatou kamupani o tatou lava tagata, aua e tele le mamalu o le tatou atunuu e femalagaai i Niu Sila ma Ausetalia, o le faaogaina o le tatou vaalele, e le o se vaalele a se aiga po o se nuu, o le vaalele a le tatou atunuu e tofusao uma i ai le tatou atunuu.

Ona ou oo mai lea i lau Afioga i le Minisita mo Faamasinoga ma Pulega Tau Faamasinoga, faafetai tele lava i lau Afioga i le Minisita ona e maitau ua tele le suiga o Faamasinoga. Na pau lava lea o si mea o le tulaga lea o le mediation, le soalaupulega, ona e tele nisi aiga pei e latou te le maua le taimi o tusi valaau e avatu i le faamasinoga ae faatoa latou maua i le aso lea ona agai atu ai lea. Se i e silasila ifo i ai lau Afioga i le Minisita, pe le maua se avanoa e toe tuu atu ai ia latou e faaali ai nai o latou manatu, leaga e i ai isi aiga faatoa latou maua le faaaliga lea ae ua oo i le aso e fai ai le faamasinoga. E tuu atu i lau Afioga i le Minisita le tulaga o le taimi lea e faatino ai le soalaupulega.

Lau Afioga i le Minisita mo Tina ma Tamaitai, Atinae o Nuu, Afioga ma Agafesootai, faafetai lava mo le faaauauina o le polokalame lea pei ona taua e nisi foi sui usufono i le tulaga lea o le tatou ie Samoa po o le ietoga, lea foi e avatu ai le lagolago a lenei nuu o le itumalo i le polokalame lea. Faafetai tele i lau Afioga i le Minisita mo le faaauau pea o le ietoga po o le ie Samoa. Na pau lea o lau faafesili lau Afioga i le Minisita, o le tatou komiti lea ua i ai le sui usufono ma sui o nuu taitasi ia o lea ua maua pei ua tau toatele ifo lava, pe i ai se taimi e aafia atu ai ma lenei itumalo ma tulaga faapena, ae matauina lava le tulaga lelei o ia komiti, e tele foi le latou sao mo le atinae e le gata i totonu o itumalo, a o afioaga foi ma alaafaga i totonu o pulega ma tulaga faapena e fesoasoani i totonu o pulega a nuu.

Ona ou oo mai lea i le Matagaluega o Leoleo, e momoli atu lau faafetai tele i le Matagaluega o Leoleo ma le latou galuega faatino lea e i ai nei. Faafetai tele mo le mamalu o le tatou... Ae o le tulaga foi lea i ofisa o leoleo i tua, e ese le manaia o le mea lea o le i ai o nai aso foi nei e fai ai ni latou poloka foi nei mo taavale feafioai i luga o auala.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

A o nisi foi taimi, o le taua ia o latou cones lanumoli lea e tu i le moa o le auala po ua lava a lena pe leai lava ni leoleo ae tau mai i ina o la e i ai nai cones na e tau mai ai foi lea o la e i ai faailoilo lea e tau mai ia oe ua tatau ona faalemu lau taavale, a o le taua ia o le galuega lea a le Ofisa o Leoleo.

Ona faaiu atu ai lea o se matou tala lau Afioga i le Fofoga Fetalai, e momoli atu le faafetai tele i le Afioga i le Minisita o Tupe, ona o le tapenaina o le Tala o le Tupe, le Afioga i le Ofisa Sili ma le Matagaluega e talia lelei e lenei itumalo le Tala o le Tupe. Ia manuia tele lau Afioga i le Fofoga Fetalai. Manuia le Fonousu a Samoa. Soifua.

**FOFOGA FETALAI:** Malo faafetai saunoa i le sui usufono mo Safata i Sisifo. Ma ona o lea ua tatou tulalata i le tatou taimi malolo e vavae ai lenei aoauli, e i ai le manatu o le a tatou toe amata i le itula e 3:00 seia paia le itula e 7:00 pei ona faatuina mai e le Taitai o le Maota le Afioga i le Palemia le lafo mo le faaluaina, ina ia tatou taunuu ma malolo i le itula e 1:00 i le aoauli nei ma tatou toe amata i le itula e 3:00 seia paia le itula e 7:00.

Ou te faasilasila atu ua tolopo nei Taulumaga ma Galuega a le Fono Aoao Faitulafono seia paia le itula e 3:00 i le aoauli.

*Na faataatiaese Taulumaga a le Fono Aoao Faitulafono i le itula e 12:53 i le aoauli ma toe i le itula e 3:00 i le aoauli.*

*Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2017/2018 ma le Tulafono Tau Faaofi o le Faatatauina o Tupe 2018/2019.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoao Faitulafono.

Malo faafetai i le paia o le Palemene ua mafai ona toe faaauau ia le tatou galuega.

E faia ia le tatou malologa ua faapena ona maea le saunoaga a le sui usufono o Safata. Ia ma ua avanoa foi le Laulau ma lumamea o le Palemene, e tulai mai se isi sui usufono e faaauau le saunoaga.

Ia tulai mai sui usufono mo Faasaleleaga Nu.4.

**Afioga PESETA VAIFOU TEVAGAENA (Faasaleleaga Nu.4):** Ia e muamua ona ou faafetai, faafetai i lau Afioga i le Fofoga Fetalai, maua le avanoa o lenei itumalo e taumafai atu ai foi se sao aua le Tala o le Tupe ua faataatia.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E faatalofa atu foi i le paia maualuga o le Maota i lenei itula o le aoauli, le afio o lau Afioga i le Fofoga Fetalai, ia afio foi lau Afioga i le Palemia, le afio foi i le Afioga i le Sui Palemia ma le mamalu o le Kapeneta, aemaise foi le afifio o sui usufono mamalu uma o lenei Palemene. Ia le tapuaiga foi i Faauluuluga o Matagaluega a lo tatou Malo, ia faapea foi le tapuaiga O Le Ao Mamalu o le Malo ma le atunuu atoa. Ia ae avea foi lenei avanoa e faatalofa atu ai ma momoli atu ai lau faafetai i si ou itumalo i le latou foi tapuaiga.

Lau Afioga i le Minisita o Tupe, ia afai o lea e faafogafoga mai lau Afioga, ia e momoli atu le faamalo ma le faafetai. Ua manino ma malamalama foi i lau faasoa, ia e talitonu lava e le tau fesiligia e lenei itumalo, ua e masani foi i mea tautupe i le taimi o e galue, auauna ai foi i taimi o tupe a lo tatou Malo. Ia faafetai mo le Tala o le Tupe i lenei tausaga, ia aulia atu le tausaga fou.

Ae muamua ona ou oo atu i lau Afioga i le Minisita mo Aoga, Taaloga ma Aganuu. Lau Afioga i le Minisita, faafetai o lea ua tele lava ina faalogologo atu ma le totoa, o lea o le a taumafai e tau tuueseese le Apprentice ia ma le tatou Iunivesite. Ae o le talosaga ma le tuualalo a lou nei sui usufono i lau Afioga, e ese le taua o le lagolago ma le fesoasoani mai o le Malo o Ausetalia i le tatou faa-Aperenitisi.

O lea ua tele ina iu lelei le tele o aoga a alo ma fanau i nisi o matata. Ae e i ai le mea lea e tupu, e moni lava la o lea ua iu mai alo ma fanau a le atunuu ma faailoga ma tusi pasi, ia ae atonu e le o atoatoa. E le o atoatoa le tomai e faatino ai galuega ia po o matafaioi ia. O lona uiga, e tatau lava ona toe silasila lau Afioga i le Minisita i se talosaga i le Malo o Ausetalia ina ia oo mai se tasi e aoaoina i tulaga o mea tau safety. O safety o se matafaioi lea e sili ona ave i ai le faatuatua ma le faamuamua a se atunuu. O lea sa saunoa se tasi o sui usufono i le taimi ua sola, ua tele faalavelave ua tutupu i luga o galuega, e mafua mai i le lelava tapena o le tagata faigaluega. E mafua mai la i le tulaga lea, ona o le tele o nai o tatou tagata faigaluega ia e iu mai pe maua lava i le potu masani, e le o atoatoa i ai latou le faatinoina o tiute ma matafaioi. Atonu o lea ua lelei mai o i le faleaoga na aoaoina ai, ae o le alu atu la lea i luga o le field, e faatino le galuega, e pei o i lea e tulai mai ai le faalavelave. Ma e tatau foi ona silasila totoa le tatou Malo, e tatau lava ona ese le Matagaluega o le Safety Department, e tatau lava ona ese. O le Department lea e sili ona ave i ai le faataua leaga o le ola ma le soifua o le atunuu ma tagata faigaluega uma, lelei le latou vaavaaiga. So o se galuega e amata, e amata muamua lava e le Safety Department ona tulaeleele i le mea o le a faatino ai ia galuega tetele. A le pasia, e mafua le l pasia, e le o saogalemu le faatinoina o ia galuega. Afai foi a ua faatino ia galuega, e i ai i lea Matagaluega taimi e asiasi atu ai i le galuega. Afai e le o malupuipua, e i ai latou le paoa ma le malosiaga, latou te taofia ai lea galuega.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le ala la lea ou te lagolagoina ai se tasi o finagalo faaalua analeila, ona o le ese o le taua o le tulaga lea, ioe, ina ia iu mai le tamaitiiti aoga o le teineitiiti aoga mai le Aperenitisi, ua le gata ua sau ma le malamalama faamatata eseese, ae sau i luga o le field ua iloa savali, ua iloa faatino le galuega. E le i amata le galuega ae ua na iloa le mea e tatau ona fai muamua, o seevae faigaluega, hard hatch, safety line, o mea faapena e puipuia mai ai le tele lava o nai o tatou tagata, e iu mai loa i uta, ia leaga o lea e pei o lalo i le field lea e galulue ai, e me i loa i luga o le isi scales, po o le fia o fogafale e galulue ai, o le puipuiga la lena e sili ona faigata. O lona uiga, e tatalo atu i le Afioga i le Minisita, toe silasila ane lava pe maua se fesoasoani, e moomia i latou e i ai le tomai faapitoa e aoaoina ai le safety lea i galuega, leaga e eseese ituaiga galuega, eseese e le tutusa. O le mea lea e tatalo atu ai i lau Afioga i le Minisita i lea vaega.

Lau Afioga i le Minisita mo Tupe Maua a lo tatou Malo, e momoli atu lau faafetai i lau Afioga. E to lava lou pulou i lau Afioga, ua ou manatua ai le upu foi lea, e te faia lava e oe measili ma e manumalo ai. O le Tulafono lea na tele ai le mau nusipepa, tala o nusipepa ma le aufaasalalau, faafetai i lau Afioga, faafetai i lau Afioga. Ma e tatou te moomia ia le tatou Tulafono ina ia lagolago, ioe, o le ala lea e ala ai ona momoli ai lau faafetai i lau Afioga ina ia faigofie ona talia e tagata uma.

Lau Afioga i le Minisita mo Galuega, Felauaiga ma Atinae Eseese, ia lenei avanoa matagofie e momoli ai lau faafetai ma le faafetai o si ou nuu i Asaga. O le vaiaso na tea nei na afifio atu ai le tatou Malo, ia e faaali ai foi le faafetai ma le agaga fiafia o nai afioaga o si o matou motu i Salafai, i le agalelei ma le lagolago ma le fesoasoani a le Malo, ua mafai ona faatino ai nai auala.

O le auala o si ou nuu, tasi lea auala ua leva ona ou talosagaina. Sa ou le manatu lava i lena taimi e talosaga ona o se auala galue, o la e faafofoga mai lou nuu, le paia o le Aiga Sa Matafeo ma le mamalu ia Sala Patu. Ina ua aafia le tatou atunuu i le tsunami lea e le i mamao atu i nai tausaga, e tupu le mea lena o lea e fono lou nuu o Puapua, o la ou te i ai i le fono. Ae muamua taunuu atu taavale e lau atu ai lou nuu lea, e o i Samalaeulu ma Patamea e api ai, ona ua maua le faamatalaga ua aafia ia si o tatou motu tele nei i Upolu i le tsunami. E sau la le warning, ae lea ua tetei lou nuu o Puapua, a o lea e fai le fono i luga o le sami, e pei o le agaga lena e momoli atu ai lava le faafetai i lau Afioga i le Minisita.

O Asaga, e 90% o le nuu lea e taamilo ai le vaitafe i tua, lea o le vai lava lea e sau tau i Lano. Ae masalo po o le 15mita mai paepae o fale ma maota o Asaga, e tau i le sami. O le ala lena e momoli ai le faafetai i lau Afioga Papalii ma le faafetai a si ou nuu, ona o lenei auala faaola, ioe, lenei auala laveai, e mafai ai ona o ese vave lou nuu mai mala faalenatura ia ma afa ona o le lata tele o si ou nuu nei i le sami. O le agaga lena e momoli atu ai lau faafetai i lau Afioga.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O lo o i ai se talosaga i lau Afioga, ia o lea ua atoatoa ia auala a si ou nuu ma lou itumalo e momoli ai lau faafetai. Ae toe tasi lava le auala lea ou te talosaga atu ai pea e amata mai lava i le la Paeaiga ona tulai mai ai faalavelave, o le auala sima foi lea lau Afioga i Lano. Atonu foi ua taua le asiasi atu ma afifio atu o le Malo, ma silasila i le tulaga lea ua i ai, ua sau lava le sami ma alu i uta, sau lava le sami ma alu i uta. Ia ona o le tulaga foi ua i ai le suiga o le tau i lenei vaitaimi, ia ua tele lava le afaina.

E tatalo atu ai lava i lau Afioga i le Minisita, se i silasila ane lava, ia e le o se auala e na o si ou nuu o lo o faaogaina. O le auala lea o le alatele a lo tatou Malo e aoga i le Malo, e aoga i tagata e tafafao mai fafo ma le atunuu atoa. Ia aemaise ai le feagai ai o nai ou nuu nei ma aoga, ia aua a oo lava ina tafe le vai lea, ia e le mafai lava ona o nei tamaiti i le aoga. O le mea lea e momoli atu ai le faafetai tele ona o talosaga ua tuuina atu i lau Afioga.

Ia ma le talosaga mulimuli i lau Afioga, ona o le ala lea e le i fai ai se faaiuga a le Matagaluega a le LTA, le main road lea e alu atu i Saina e agai i le malae vaalele. Sa ou fesiligia se tasi o kamupani, pe fia lane o le auala, ae fai mai e lua. Ae silasila foi lau Afioga i le Minisita, i le faatupulaia o le aumaia o taavale i totonu o le tatou atunuu, ua tele le taavale afi ua ulufale mai i totonu o le atunuu. Ae pau lava lea o le auala o lea o lo o feagai pea ma le tulaga e tai pei o tulaga ia o le taumafai atu e malaga atu aua atunuu mamao po o le motu o Salafai, a o lona lave, a oo lava ina umi atu le que o taavale nei, poloka ai lava auala.

O lea e tatalo atu ai i lau Afioga i le Minisita, pe le mafai lava ona faaopoopo se isi lane e tai pei o se emergency lane e faatatau lea a aumai ia maliu po o mai mai le motu tele o Salafai, po o Apia nei foi, ae o lea e i ai se lane e mafai ona alo i ai. Aua a oo foi ina vaeane le paia o le Maota, aua a oo foi ina toso atu masini nei lolo uumi foi nei, e poloka, poloka, poloka. O le tuualalo lava i lau Afioga, ia pe fai auauai i lenei Tala o le Tupe, pe alu atu gata mai i i Tuanai, o le isi tausaga soosoo, soosoo, ae la e taua, e le toe i ai se isi tulaga e toe talepeina ai le auala e faaopoopo se isi lane. Ia o le mea lea e avatu ai lava le tuualalo i lau Afioga i le Minisita, ia ona o le tatou auala lea, ona o lea ua tele lava le taavale e lau mai totonu o le tatou atunuu.

Lau Afioga i le Fofoga Fetalai, ua uma foi se manatu ma se sao o lenei itumalo, e momoli atu ai le faafetai tele mo le avanoa. O le matou tatalo, ia maua pea lou soifua maloloina, ia maua pea lou malosia aua le faatautaiga o le Fonousu a Samoa aemaise foi o le Palemene, faapea foi i le Afioga i le Palemia ma le Kapeneta aemaise foi o sui usufono uma o le Palemene ma le tapuaiga a si o tatou atunuu. Ia, o se manatu vaivai lea o lenei itumalo. Ia manuia le Fono.

**FOFOGA FETALAI:** Malo faafetai saunoa i lau Afioga i le sui usufono mo Faasaleleaga Nu.4 malo saunoa, faafetai. Ua avanoa foi mo se isi sui usufono e tulai mai e saunoa.



19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E manaia lava ona felafoai, e manatu foi i le taua o le tatou taimi, o lea ua tatou faaopoopo o tatou itula fono ona o le tatou galuega e manatu foi le Taitai o le Malo ma le Kapeneta e ao ona vave pasia le tatou Tala o le Tupe ae se i see atu le Kapeneta i o latou faiva alofilima o le faagaioi ma faatino atinae aua se manuia lautele e le gata i o tatou itumalo a o le tapuaiga a Samoa. Ou te vaai atu o tau oli mai le sui usufono mo Aana Alofi Nu.2, ia po ua sauni pe leai ae manaia ona felafoai. Ia, tulai mai le sui usufono mo Aana Alofi Nu.2.

**Tofa ILI SETEFANO TAATEO TAFILI (Aana Alofi Nu.2):** Faafetai i lau Afioga i le Fofoga Fetalai, e ui lava ina ou te le i sauni, ae leaga e faigata, o le valaauina o le mea taua lea. Ou te tulai atu ma le ava ma le migao tele e fia faaogaina ai lenei avanoa e avatu ai se sao o lenei foi itumalo o Aana Alofi Nu.2 e tusa ai o le Tala Faatatau o le Tupe 2018/2019 e pei ona taoto i le Laulau a Fono nei.

Ou te muamua ona ou faatulou i le paia o le Maota Fono o Samoa, o le maota e teu ai le tofa i le auafamau ma moegalafo o upufai aua se manuia lautele o Samoa ma ona tagatanuu, i le afio o lau Afioga i le Fofoga Fetalai, o le tofa o lo o teu malu ai upufai o le Fono Aoaofaitulafono o Samoa. Afio lau Afioga i le Palemia, afio lau Afioga i le Sui Palemia, afifio le Aiga Minisita faapea Minisita Lagolago. Liliu mai i lenei itu o le Maota, le afifio o Taitaifono o Komiti Faa-Palemene, Sui Taitaifono, faapea foi sui usufono mamalu o Komiti taitoatasi, o paia na ma mamalu o le Palemene o Samoa. A o lenei itula, ou te faatalofa atu ai i le alofaiva ai o lau Afioga i le Failautusi o le Fono Aoaofaitulafono faapea le aufaigaluega a le Ofisa o le Fono, le tapuaiga i Faaululuga o Matagaluega a le Malo faapea Faalapotopotoga Tumaoti faapea foi le sao o le aufaasalalau ma le aufai nusipepa o lo o faasalalau lenei Fonotaga, talofa talofa lava.

E faatalofa atu foi i le faafogafoga tapuai a Samoa, i le tapuaiga a Lana Afioga Mamalu, O Le Ao o le Malo, lau Afioga Tuimalealiifano ma lau Masiofo, faapea foi lau Afioga i le Sui o le Fono a Sui Tofia lau Afioga Le Mamea Ropati Mualia ma lau Masiofo. O le paia lava lea aua Tama ma Aiga, Aiga ma Tama, le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti. E le faagaloina foi le tapuaiga a Auauna a le Atua o lo o faapea ona faafaletulua ma faafalelemalu i so o se tulimanu o le atunuu aua le tauasuina o le Ipuvai o le Ola aua Samoa ma ona tagata.

E le faagaloina foi i lou nei sui usufono le tapuaiga mamalu a si ou itumalo pele o Aana Alofi Nu.2 i le nofo a Faafeagaiga ia Nofaalii ma Leulumoega, o lo o faapena ona faanonomanu aua si o ta itumalo, le paia o si ou nuu o Leulumoega, le paia ia Sooaemalagati ma alo o Tamaalagati, maluu mai Alipia le Matuanatogi, le mamalu i le Faleiva ma lou Faletuiaana na e tautua vaatele aua Aiga e fa ma laau na faufau, le nofo a Too ma Aana na Saeseese.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Liliu mai i si ou nuu o Nofoalii i le paia i le afio o le Aiga Satuala o le Aiga Faalagilagi, afio Taimalieutu o le Fofoga o le Aiga Sa Tuala, Susu le Matua o le Aiga Sa Tanuvasa, le nofo a Matafale e fa o le Aiga Sa Tanuvasa, le mamalu i le nofo a ituaiga i le Faleaana faapea foi le Faleaana i Gagae faapea o la Tapaau ia Tauti ma Malaitai. Ia tapuai maia ae se i fai se sao ia Manuvao aua le Tala o le Tupe ua faapena ona taoto i lumamea e pei ona i ai lenei aso.

Lau Afioga i le Fofoga Fetalai, a o le i agai se faamatalaga i le Tala o le Tupe, e manatu ma talitonu o le laolao lelei lenei e toe faaleo atu ai ma toe faamanatu ai nisi o manaoga ua faapea ona taoto i totonu o ofisa o alii Minisita e fitoitonu i ai le talosaga e pei ona talosaga ai le Minisita o Galuega, faafetai o lea ua tafa ata o tauleleia i le talosaga a si ou itumalo mo se vaitaumafa mo e o lo o alaala i le pito i uta. O lea ua oo atu le vai i gauta o le Ualesi i gauta o le pitonuu o le Fofoga Fetalai. Faafetai aua o lona uiga e oo atu i le faaiuga o le tausaga ua oo atu i tua o Nofoalii ma Leulumoega. Faafetai foi i lau Afioga i le Minisita mo le tofa ua ae, o lea o le a faapea ona oo atu le faasoa a le Malo i si ou auala e pei ona ta talatalanoa i ai.

Lau Afioga i le Minisita mo le Soifua Maloloina, o lou uso a sui usufono mai Aana, o lau lauga mulimuli sa ou tatalo atu ai mo se ambulance mo le falemai i Leulumoega. Faafetai i lau Afioga o lea ua maua tala toeitiiti lava maea ona fausia le ambulance na fau faapitoa lava mo le ta itumalo ma le ta falemai. O le tulaga o lo o i ai le falemai i Leulumoega, o lea ua manino i le folasaga a lau Afioga i le Minisita le tofamamao a le Malo o le a le toe mafai ona faaogaina Leulumoega o se falemai po o se main center ae o le a faaoga o se health center ona ua vaapiapi ma le lava le eleele, ae o le a tagai le Malo i se isi vaega e faapena ona fausiaina ai. Ae na pau lava le tatalo a lou sui usufono, se ua manaomia lava e le falemai se galuega toe faaleleia ma toe lipea. Aua e le o po malae o lenei falemai e tumu lava faasoloatoa mai lava i le ao e po o faapena ona tumutumu i gasegase.

Lau Afioga i le Minisita mo le Siosiomaga ma Punaoa Faalenatura, o lo o taoto le talosaga a si ou pitonuu o Vaialua mo se taligalu, a ua tuanai atu le Afioga i le Minisita sa i ai o Faamoetaulua, o le taimi lena sa avatu ai le talosaga a si ou itumalo, ou te le iloa la po o ua alu ese le Minisita lea ma aveese po o taoto ai lava i le ofisa le talosaga a si ou pitonuu o Vaialua. Ae tau ina toe faamanatu atu, e maua le fesoasoani, e tele le maa i gauta o le matou nuu, ae pau le mea e manaomia o ni loli ma ni masini e lau ifo ai i tai e fausia ai le taligalu.

Lau Afioga i le Fofoga Fetalai, e tele lava nisi o manaoga, ae pei lava ona matou fai atu, e alu lava le afiafi lenei o tolaulau ma faamalaulau, ae ua faapena ona faamaumau e ala i tusitusiga ma o le a faapena ona faaoo atu i Minisita e fitoitonu i ai i lenei talosaga pe le o lenei tausaga pe le o le la tausaga, ae talitonu o i ina le utu a le faimea i le faasoasoa a le Malo mai lea taimi i lea taimi.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ia ua na o le pau lena o se manaoga ma se manao o si ou itumalo o Aana Alofi Nu.2, a o lenei itula, o le a agai se faamatalaga i le auga o aute o le aso. Lau Afioga i le Minisita o Tupe, e ioe lava ma talitonu e le o se galuega faigofie le galuega i le tau faasoasoaina o le tamaoiga o si o tatou Malo i le utiuti ma le lava, ae paga lava lea e tele lava le tagisa o le atunuu mai lea taimi i lea taimi. Faafetai e le gata i lau Afioga i le Minisita ae faapea foi Matagaluega sa faapena ona fitaituga aua le tapenaina o le Tala o le Tupe 2018/2019. E lagolagoina e lenei sui usufono ma lenei itumalo le Tala o le Tupe e pei ona taoto i lumamea. Faafetai lava i lau Afioga i le Fofoga Fetalai.

**FOFOGA FETALAI:** Malo faafetai. Ia e le tau faafuluina le saunoaga a le sui usufono mamalu mo Aana Alofi Nu.2, e agai tonu lava i mea o lo o faapena ona manaomia aemaise o le atinaeina o le itumalo ma faamau foi le lagolago malosi i le Tala o le Tupe ma faapena foi ona toe faamanatu mai nisi o mea sa faapena ona taoto i ai talosaga i fatia ua sola. E maitau atu e le mama foi i le Kapeneta le latou faiva alofilima o le faasologa o manaoga o lea itumalo i lea itumalo. E momoli atu le faafetai i le saunoaga a lau Afioga i le sui usufono mamalu.

Ia, ua maua foi lenei avanoa mo se sui usufono e fia saunoa. Ia, tulai mai le sui usufono mo Falealili Sisifo.

**Tofa AUMUA ISAIA LAMEKO (Falealili Sisifo):** Lau Afioga i le Fofoga Fetalai, faafetai mo lou avanoa i lenei itula. A o le i faia se faamatalaga i le Tala Faatatau Faaopopo o le Tupe 2017/2018 ma le Tala Faatatau o le Tupe 2018/2019, e muamua lava ona ou faatulou atu i le paia o le Maota nei aemaise le faafofogaaga a Samoa o lo o faafofoga mai i le Alaleo 540AM. E muamua ona ou taina le vaiafei ma ou vaisausauina ou paia Samoa e amata mai i le Taisamasama o le Tuimanua seia paia le Lualoto i ou sa ma faiga, o paia faatalalelei, o paia faalemalo, o paia faaleaganuu, o le a taoto faamaene o tailoloto leaga e faigata Samoa o le atunuu ua uma ona tofi, o paia lava mai le vavau seia oo i le faavavau, o le a le oo foi i ai sau faamatalaga.

Avea ia lenei itula e faatalofa atu ai i le paia o si ou itumalo o Falealili, aua e tasi lava lo ta gafa, i le nofo a Faafeagaiga i Ekalesia e fia o lo o tauasuina le Ipuvai o le Ola. O le paia lava lea ia Alaalagafa ma la oulua nofo a Tulafale ma le Tauagaeseese ia te oe Falealili. Faamalo le tapuai. Faamalo le tatalo, ae tapuai maia se i fai se manatu o si o outou sui usufono aua le paia o le ta itumalo.

Ou te faatusaina le Tala o le Tupe lenei, le Tala Faatatau Faaopopo ma le Tala Faatatau Autu o le Tupe i le soifuaga o le Faola i le lalolagi, sa oo i ai se suesuega faatalanoa pe sa faaogaina mo Ia lava, ae peitai sa matua galue o Ia ma le naunautai ma le filiga e le fiu mo le faolaina o le fanau a tagata ua leiloa.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le ala na Ia uia na uia mai le falepovi i Peteleema seia oo i Korokota, o le ala lava lea o le faafiti o Ia ia te Ia lava, e le i tau saili foi o Ia ina ia faasaoina o Ia mai galuega mamafa ma galuega fita. Fetalai mai lea o Ia, o le atalii o le tagata e le i sau o Ia ina ia auauna atu tagata ia te Ia, ae na sau o Ia e foaiina atu Lona ola e sui ai tagata e toatele. O le matou mau lea e faatatau i lenei Tala o le Tupe ina ia tatou auauna atu ae aua ne i auauna mai o tatou tagata ia i tatou. E le aoaia e Laupua Tamafaiga, e le aoaia foi e le matapia le manaia, ae na o se fautuaga e taatia atu i le Malo aua le alualu i luma o le tatou atinae. Fai mai se tasi o tagata iloga i le auaunaga faale galuega, human resources, a tofia oe e avea ma taitai, e lua mea e ao ona vaai taulai i ai i le taimi e iloilo ai po o se faatalanoaga o se avanoa. Muamua, o le a le taunuuga o le faatinoga? Result. Pe faapefea ona e auauna atu i tagata i le taunuuga o le faatinoga.

I lau vaai taula la i ai i le Tala Faatatau Faaopoopo o le Tupe, e momoli ai le faamalo i le Malo e tusa ai ma le vaegatupe o lo o ave i le auaunaga o le soifua maloloina. O i o lo o ave i ai le faamuamua lea ua mafai ona faamatuu ese se tasi o vaegatupe ina ia mafai ona faatau mai ai masini mo togafitiga, ae le gata i lea o le faatauina mai o vailaau ma fualaaui mo gasegase ina ia faapena ona faatinoina le tautua i tatou falemai faaitumalo. Atonu o lea ua taatia i paga le lafo a Lualemana, lea ua faataatia e le Minisita o Tupe i lana saunoaga autu i le Tala Faatatau Autu o le Tupe 2018/2019, ma o le manulauti o lana saunoaga o le faasoosoa tatau o seleni ina ia ausia se tamaoaiga mausali. Ia faasoosoa tatau seleni ina ia ausia se tamaoaiga mausali. O le a le uiga o lea mau? Ia tatau ona sao le filifiliga a le Malo e ave i ai le faamuamua. Ma o le faamuamua la o le Tala o le Tupe lenei, ia faamuamua lava le Matagaluega o Aoga ma le Matagaluega o le Soifua Maloloina.

Ona see mai lea i le Matagaluega o Aoga, o le Tala Faatatau o le Tupe lenei, o lo o faatulagaina ai le siitaga o tupe faaalu a le Matagaluega o Aoga e tusa lea ma le 2.63%. Ma o se fiafiaga i lou sui usufono, ona o lea ua faatulaga mai le faamuamua i le Ofisa o Aoga, aua a aoaoina le fanau ma faatupulaia le malamalama ma le faitau tusi o le fanau i aoga tulagalua faapea foi aoaoga i kolisi ma le iunivesite, o le a faapena ona manuia si o tatou atunuu. O le isi vaega taua, ia faatupulaia lo tatou tamaoaiga i taaloga a le Pasefika lea e talimalo ai si o tatou atunuu.

E avea foi lenei avanoa e momoli atu ai le faafetai ma le faamalo i lau Afioga i le Minisita o Aoga, le Ofisa Sili o Pulega, Asiasi Aoga, susuga i Pule o Aoga tulagalua ma kolisi, aemaise le loaloa o le aufaigaluega ma le komiti o aoga i totonu o si ou itumalo e tusa ai ma le galuega taua ma le auaunaga ua mausali. Faafetai i la outou tautua, e le i fausiaina Roma i se aso se tasi.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O lea e i ai le fuafuaga faapea i le lumanai e tuufaatasia ai le aoga lea le school of medicine ma le OUM po o le Oceania University of Medicine. I lau vaai i ai e i ai itu e lelei ai le tuufaatasia, ae peitai i lou manatu, e ao ona fai muamua le accreditation a le faculty of medicine a le Iunivesite Aoao ina ia mafai ona sueina ai laisene po o suega o aoga faaauau po o post graduate training a i latou e faauuina mai le faailoga faafomai mai le NUS. O le OUM o se tasi lea o aoga faafomai a le Oceania ua uma ona fai le accreditation agai le Malo o Amerika, ma a iu mai le tagata ma le faailoga faafomai, e mafai ona sue ai le suega o aoga faaauau post graduate training i Ausetalia, Niu Sila, Kanata ma Amerika. Ma i lou talitonuga, ua talia foi e le Aoga Faafomai i Fiti. O le aoga o le aoga faaauau lea mo fomai ina ia mafai ona tuuitiitia ai le paketi, o lo o faaaluina i taotoga nei, o lo o ave ai e le tatou Malo i Niu Sila ma Initia, ma o le a mafai lava e alo ma fanau a le tatou atunuu ona vaaia ma fai taotoga, ma o le a tuuitiitia ai le seleni lea e faaaogaina i tausaga uma e tusa lea ma le \$6miliona. Mai le vaegatupe ua tuuina atu i le Iunivesite Aoao o Samoa ua atagia ai le faaitiitia tusa ma le 8.1% mai le vaegatupe o lo o i ai nei, ma e talosagaina lau Afioga i le Minisita o Aoga, ina ia tagai po o le a le mafuaaga ua tuuitiitia ai lenei vaegatupe tele e \$1miliona mai le paketi a le NUS. Po ua le ausia nisi o polokalame na fuafuaina, po ua le tusa foi le auaunaga sa fuafuaina, ae pe mafai ona tuuina se vaegatupe tusa ma le 10% o le miliona lea i se tupe faasikolasipi mo i latou o lo o i ai manaoga faapitoa ma i latou e maaleale lo latou tamaoaiga ma ia faia foi ni aiaiga e agavaa i ai, ma atonu o le a mafai ona foia le faafitauli lea e tulai mai i le le totogia o pili aoga.

Matagaluega o le Soifua Maloloina ma le Auaunaga Faa-Soifua Maloloina. Atonu o lea ua tatou silafia ma iloa le manulauti a le Malo o lo o i ai nei i le toe tuufaatasia o le Matagaluega o le Soifua Maloloina ma le Auaunaga Faa-Soifua Maloloina. I le Tala Faatatau Autu o le Tupe lenei o lea ua faatulaga mai ai le tupe faaalu a le Matagaluega o le Soifua Maloloina ma le Auaunaga Faa-Soifua Maloloina e 15.6%. Ma o se fiafiaga i lou sui usufono, ona o lea ua faatulaga ai le faamuamua o le Ofisa o le Auaunaga faale-Soifua Maloloina. O se tasi o auaunaga e auauna atu ai fomai ma tausisoifua ma komiti tumama mo tatou falemai faaitumalo ma falemai tutotonu i Upolu ma Savaii. Ma ou te matua lagolagoina lea siitaga ina ia mafai ai ona faatino le auaunaga faa-24 itula i le fitu aso o le vaiaso.

Ou te talosagaina lau Afioga i le Minisita o Auaunaga Faale-Soifua Maloloina mo se fomai. I le taimi nei, o lo o i ai le fomai o lo o asiasi atu i le falemai faaitumalo i Poutasi, na o le tasi le aso e mafai ai ona alu atu e faaoga, e talosaga atu ai pe mafai ona tuu i ai ni aso se lua ina ia tuuitiitia ai le agai mai o itumalo ia latou te faaaogaina le falemai lea amata mai Falealili, o Siumu faapea foi se vaega o Safata.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E momoli atu ai le faafetai ma le faamalo i lau Afioga i le Minisita, le Ofisa Sili o Pulega o le Matagaluega o le Auaunaga Faa-Soifua Maloloina, e tusa ai ma la outou tautua, ae le gata i lea o fomai, o tausisoifua ma komiti tumama, ae le gata i lea, o le mamalu lautele o le tatou atunuu o lo o faapea ona tautuaina si o tatou atunuu.

I le Matagaluega o Galuega, Felauaiga ma Atinae Eseeese, atonu o lea o lo o i ai se siitaga o tupe faaalu e tusa lea ma le 13.2%. Atonu foi o i lea o le a saofaga ai se tasi foi o talosaga i fono ua tuana'i, lea sa ou talosagaina ai le faaleleia o auala ia e alu i matou aoga tulagalua i Saleilua ma Poutasi. E talosaga atu ai ma le agaga faaaloalo i lau Afioga i le Minisita, pe ni a fa i sou finagalo pe i ai sina avanoa i lenei tausaga se i faata ai, aua silasila lau Afioga, o le auala lava lea e tasi e agai atu i Saleilua o lo o toatele foi i latou o lo o nonofo ma aumau ai. Ae talosaga atu ai ma le agaga faaaloalo se i alofagia mai lata talosaga atu faamolemole.

O le matou auala galue i Poutasi, atonu o lena ua silafia, o le auala galue lea e i tafatafa o le fale inisia i le va o Saleilua ma Poutasi, ma le auala galue lea sa suaina i le Tsunami, tasi lena o auala e leai se vaega ua faataina pe faaleleia. I le matou nuu i Vaovai, ua uma ona faataina le auala galue i le Paeaiga ua tuana'i, ae talosagaina faamolemole le konekarate lea e faaleleia auala i le agai i tai, e pei lava o lea ua uma ona ou tilotilo ua amata ona tau sua, ae le mailoa po o le mea o le a fai pe na ona sua lava toe faataataatia ai. Se i silasila ane faamolemole pe a faapea o le a faataina le auala lea, e lelei lava le logo mai faamolemole o lo o faapena ona uia i taimi uma, ae leai lava se galuega o faia i ai.

O le matou nuu i Matautu, tasi lea o nuu o lo o taulamua i le polokalame a le aufaifaatoaga i le saofaga lea e 1,000 tiapula a le matai. Ia, tasi foi lea nuu sa ave i ai se fesoasoani a se tasi faipisinisi o lo o aveina le talo i Niu Sila, le Ah Liki Investment, na latou suaina ai se vaega o le auala lenei ina ia mafai ona uia e taavale, e le gata i le faipisinisi lea a o tagata foi o si o matou nuu ona e fai si tele o maumaga o lo o faaogaina ai le auala lenei.

O le matou nuu i Tafatafa, atonu o lea sa saunoa se tasi o ou uso i le matou asiasiga ma le Minisita mo Tagata Tafafao Maimoa Mai, ia na ona toe faamanatu atu lava. I le taimi lenei i le matou nuu o Tafatafa, e fa turisi la e i ai, o le turisi muamua, o le Maota o Maa, o le turisi lona lua o le Vaiula, o le turisi lona tolu o le Brenda ma le turisi lona fa o le Taito Galu. Ia pei o turisi na o lo o faaoga ai, a o le taimi nei, atonu lava e oo le fuafuaga a le Afioga i le Minisita o Galuega mo le faataina. A le faataina foi, ua lava a na o le tanu ina ia faigofie le feoi o le mamalu o si o tatou nuu ae le gata i lea o tagata maimoa tafafao mai i Samoa. O si o matou nuu i Malaemalu, e talosagaina lau Afioga i le Minisita, e i ai le auala fou i le punavai lea e faaigoa po o le mataaga fou lea e faaigoa o le Punaotala i Malaemalu. O le taimi nei, ua uma ona tanuina e le matou nuu i Malaemalu le auala e alu i tai i le oneone, ae o lo o talosagaina nisi vaega o lo o faapena ona toa ai le suavai e manaomia ai le fesoasoani.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ma o le taimi lenei, o lo o i ai le polokalame a le Matagaluega o le Siosiomaga mo le faasaoina lea o le togatogo, ma i lau tilotilo i ai, toetiiti uma le polokalame lea. O le auala galue o si o matou nuu lea i Malaemalu i tafatafa o le falesa Metotisi i Malaemalu e le i i ai foi se galuega ua faia i ai.

I lo matou nuu i Satalo, ua maea ona valitaina le auala galue i le Paeaiga talu ai. E toe talosagaina lau Afioga, e i ai le auala lea o le Tsunami lea sa suaina i le 2009, lea o lo o faaaogaina i le taimi nei. Sa suaina foi e le pisinisi lea a Ah Liki Investment le auala lea ina ia mafai ona faaaogaina e tagata.

Ona oo mai lea i le matou nuu i Sapunaaoa, ua maea ona valitaina le auala galue i gauta o Sapunaaoa, se i vagana le auala galue o lo o ui atu i le matou pitonuu i Piu ma le ala tuloto i le matou pitonuu o Faleulu e faaaogaina e fanau aoga agai i le matou aoga tulagalua i Sapunaaoa. E manaomia sina galuega, a le tanuia ina ia mafai ona tanuina i taimi uma.

Ia, le paia i lo outou Toafa, Tuiloma ma Taituuga o manu o le tuasivi e fagota i tai e lua, Maelopa ma Leavasa, Tootoo o le aava, afio lau Afioga Patea o le alaalatama ma le usoalii faapea le lotoifale o le Manusamoa, ia o nai manatu na e faatatau i vaega e pei o lo outou finagalo i le fonousu a le tatou nuu. Ia o lea ua uma ona faaleo, ae i ai nai vaega ia e fia oo i ai lau faamatalaga.

O le suavai ma le eletise, e talosagaina lau Afioga i le Minisita, aemaise le Pule Sili o le Pulega o le Suavai ma le Malosiaga Faaeletise mo le faaaauaina atu o le suavai ma le eletise i le mamalu o si ou itumalo ua nofoia auala galue e amata mai Saleilua seia paia Sapunaaoa. E i ai se tasi auala laupapa lea e i le va o Saleilua ma Togitogiga, e talosaga atu pe le mafai ona silasila i ai le Matagaluega. O le taimi nei o lo o faaaogaina se tasi o vaega o le auala laupapa, pei sa soa e se taavale le auala laupapa lenei, ae a oo foi la ina pa le vai lea e i Togitogiga, ua amata ona aia lalo o le auala laupapa. O le mea la e popole ai, ne i te i ua alu alu aso ae leai se galuega a le Matagaluega e faia i ai ae te i ua motusia ai le feoaiga i le isi foi itu o le tatou motu i Upolu nei. O lea e talosaga atu ai i le Afioga i le Minisita ma le Matagaluega se i silasila ane i lea vaega.

O le Matagaluega o Faatoaga ma Faigafaiva. O faigafaiva, faafetai mo le polokalame mo le faasaoina o le figota, aemaise foi o le faasaoina o togatogo. Na o le tasi a lau talosaga sa avatu i tausaga ua tuanai e faatatau lea i le fausiaina o se uafu le tumau, temporary wharf na faapena ona taula ai vaafagota lea o lo o faaaogaina e si o matou afioaga i Poutasi. Ae le gata i lea, o le faatinoina lea o le mea foi lenei e toso ai vaa. Ia manatua foi o i lava i Poutasi o lo o faafesagai ma le motu lea ua faaigoaina o Nuusafee. I le taimi lenei, o lo o faaaogaina e turisi le taimi lenei i le o agai i le motu lenei ae leai se uafu e faaaogaina e taula ai vaa i tai. E talosaga atu ai i le Minisita mo Faatoaga ma Faigafaiva i lea vaega.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

I le tulaga i polokalame a le Minisita mo Faatoaga ma lana Matagaluega i lou itumalo, e momoli atu le agaga o le faafetai ma le faamalo e tusa ai foi ma galuega e tele ia aua foi ia le faateleina o meaai taumafa i totonu o si o tatou atunuu.

Le Matagaluega o Pisinisi Alamanuia ma Leipa, ia e avea foi lenei avanoa e momoli ai lau faafetai lau Afioga ia Tuatagaloa o le toosavili, o ki o le Malo, afioaga i Poutasi ia e tusa ai foi ma le fesoasoani o le galuega nei o le RSE, auina atu ai alo ma fanau, e le gata i le itumalo o Falealili, a o isi foi itumalo o lo o tu lata mai e pei o Lepa, Lotofaga ia ma Siumu faapena ona autovaa i le polokalama lea o le tauina o le apu, lea o lo o faamanuia ai si o matou itumalo. Faafetai mo le galuega, faafetai foi mo asiasiga, ua faatoateleina ai ia alo ma fanau, ia ina ia faia le tautua lea, o le galulue i atunuu i fafo, ae lafo mai tupe i aiga Samoa.

O le tulaga i le Aperenitisi e pei ona taua e se tasi o faipule o Safata i Sisifo, e pau lea o le vaega o lo o matou talosagaina foi le vaega lea, e toe tilotilo i ai le Aperenitisi. O se tasi o matata o lo o faapena ona toatele tagata mai fafo e faigaluega ai iinei Samoa, o le domestic work, o galuega ia e faale-lotoifale nei i Samoa, ae leai se vaega o taua ai se polokalame faa-Aperenitisi e mafai ai ona aoao ia o tatou tagata, e faafaigaluega ai i le tulaga lea o le domestic work, ia ona faapena lea ona tuutiitia tagata mai fafo e faigaluega ai i Samoa, ae maua le avanoa e faigaluega ai ia o tatou tagata i galuega ia faa domestic work po o le galuega faale-lotoifale i aiga e fesoasoani ai i Faalapotopotoga Tumaoti, e talosagaina lau Afioga i le Minisita, silasila ane pe i ai se fesoasoani o le fai o isaraelu, ma le sosaiete o le koko Samoa, ina ia mafai ona faagaioioia ia sosaiete aua le auina atu o fua o faaeleeleaga mo maketi i fafo.

O le Matagaluega mo Tupe Maua, lau Afioga i le Minisita, e momoli atu lau faamalo ma lau faafetai, lea ua taua i le Tala o le Tupe o le a fausiaina se fale mo le masini faata mo oloa mai fafo, ae le gata i lea, e talosagaina foi lau Afioga mo se faata, masini faata mo le tatou malaevaalele lea faavaomalo, ina ia faapena ona siakiina ai nisi o oloa o lo o auina atu i fafo, pe le o avatu nana atu ai foi ma nisi o tatou tupe, i fafo atu o Samoa.

O le Matagaluega o Punaoa Faalenatura ma le Siosiomaga, ia e talosagaina lau Afioga i le Minisita, le Afioga i le Sao Faapito, taligalu mo le matou nuu o Saleilua ma le nuu o Iiili i le pito o tai, aemaise le taligalu lea e i le va o Sapunaoa ma Salesatele o i ai le vai lea, e manaomia la le taligalu e taofia ai ia le elelele ua amata ona ufitia e le sami.

Ia oo mai lea i lau Afioga i le Fofoga Fetalai, ia e momoli atu lau faafetai tele i lau Afioga i le Fofoga Fetalai, faapea le Failautusi o le Fono Aoao, ia aemaise ia le aufaigaluega mo le tautuaina o sui usufono mamalu o le Palemene, ia manuia lau Afioga i le Palemia, mamalu o le Kapeneta aemaise le Fonousu a Samoa, ae ou ola i le alofa ma le agalelei o le Atua, soifua.



19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**FOFOGA FETALAI:** Malo, faafetai, manaia le saunoaga a le sui usufono e o sao lava i mea e manaomia e le itumalo, i lo le o fua i isi vaega, ia ae aumai sao lava o la e mataitu ia le Malo ma faamaumau ma avatu i ai ia le latou faamuamua. Malo faafetai le saunoa i le sui usufono mamalu.

Ia ma o lea foi ua avanoa le nofoa, le Laulau o le Palemene mo saunoaga a le sui usufono. Ia maitau atu o la e tau oli mai lena itu le sui usufono o Gagaemauga Nu.2, le alii matua o lea itu o le Maota. Gagaemauga Nu.2 tulai mai lau Afioga i le sui usufono mamalu.

**Tofa Hon FAASOOTAULOA PATI TAULAPAPA (Gagaemauga Nu.2):** E muamua lava ona ou faafetaia le alofa ma le agalelei o le Atua, mai le taeao seia oo mai i le afaiafai lenei. Ou te faafetai atu i lau Afioga i le Fofoga Fetalai, le Sui Fofoga Fetalai, avea ai au ma tofa taumolimoli aua Aliielua, Maopu ma Sa Peseta ma Usoalii, mamalu ia te oe Saleaula ma lau Faletufuga. E molimoli atu ai le agaga faafetai, i lau Afioga i le Palemia, Afioga i le Sui Palemia, le mamalu o le Kapeneta, e momoli atu le agaga faafetai.

E pei lava o lenei itumalo, e faamaoni lava ia lona talitonuga, amuia e le vaai, ae talitonu i mea e fai. O le mea foi lea e talitonu ai le sui usufono lenei, pe fai atu ni mea e manao ai le itumalo pe leai, e pau lava le mea lea e taupolepole ai, e pei ua laaloo le faaso a le Malo, lea e matamata atu le Pule, Saleaula ma lona itumalo. Ia ae ui i lea, leai e le tetena ai, e goto le la ae toe oso foi, e talitonu foi le faamoemoe, o lo o soifua le Atua. O le Afioga i le Palemia, ia e faamaoni lava ia le Afioga a le Atua, o tofi uma lava, e mai i le Atua. Faafetai i lau Afioga i le Palemia i tulaga o le faafocina o lenei Palemene, faafetai i le Kapeneta. E momoli atu le agaga faafetai o lea ua tini taunuu le uto e pei ona tatou alo mai ai i le amataga o lenei tausaga, seia oo mai i le ituaso lenei i le talanoaina o le Tala o le Tupe.

O le mea lea e momoli atu ai le agaga faafetai, i galuega maeaea, i le talitonuga e te le faia faapito ia se mea. O lo o faapena ona e vaavaai totoa i le tulaga tau atinae o Samoa ma ona tagata. O le Tala i le Tupe ma le vaavaai atu i ai, ua matua talia atoatoa e lenei itumalo. E le o le tele o le tupe, e le o le laitiiti o le tupe, a o mea e faatino mai. O le mea lea e momoli atu ai le agaga faafetai i le Kapeneta i mea uma o lau faaso. E momoli atu ai le agaga faafetai o lenei itumalo e ui lava ina tau maua tala i le ala, ua amata ona lotelotea le itumalo lenei i le tulaga o tuaoi ma le.....ae le popole ai. E le po pea se nuu, pau lava le mea i le itumalo lenei o le tatalo, ia ulufia le agaga o le Taitai o le Malo ma le Kapeneta, e i ai se taimi toe sui, toe sui, fai. Ma e ou te talitonu lava e leai lava se mea e le mafaia.

O le mea lea e momoli atu ai le agaga faafetai, e le tau laulauina atu ni mea e mananao ai lenei itumalo. Na pau lava le mea lea ou te talanoa atu ai i lou itumalo, Saleaula, Salamumu ma matua, o la ua uma ona ave ia tou manaoga i le Afioga i le Minisita o Galuega ma Atinae Eeseese.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ou te talitonu o la foi ua uma ona ave ia la foi ua uma ona galue ai le agaga i le faiga o a tatou auala. O la foi ua alu atu le asiasiga a le Minisita i tatou auala i Salamumu ia ua matua leaga lava le auala. Ae o le tele ia o tagata turisi la e oo i ai i lea mea. E faapena foi ia si a matou auala i Savaii, ia o lea e faauma atu ai i lau Afioga i le Minisita, ia na ona ou.....ou te le tauanauina ia e na o lau lava tatalo, ia agalelei ia tatou galulue faatasi.

O le manaoga o lenei itumalo, o le mea lea i lau Afioga i le Minisita o le Soifua Maloloina, ou te le iloa po o oo i ai lou mafaufau pe leai. O le matou falemai, e oo atu i ai tagata ua maliu, ae alu atu e fiu e sue le teine fomai e le o i ai, e mamao tele i uta. O lea e tatalo atu ai ma le agaga faamaualalo lava, ia e alofagia ia mafai ona talanoa si o matou itumalo, o la foi e le iloa po o ai le aiga la e.....a uma nei le faamasinoga e toe foi lava le falemai i le mea lea sa i ai muamua, a leai foi, ia aumai e tu i i Saleaula i le mea lea i Savaii. Ae tatalo atu ma le agaga faamaualalo ina ia faapena foi ia ona tulaga e faapena foi i le Afioga i le Minisita o Aoga. O lo o moomia foi ia le tulaga i faiaoga. E na o le matou nuu lava la e faiaoga ai lava ia o matou tagata, pe tefa le tauala ia nisi faiaoga e pei o le agaga lea sa mafaufau pe fai se lauga pe leai, ia ae faafetai lava i Minisita uma lava, aemaise lava ia le Minisita lea o Tupe, o le taofiofi ia i tupe faaalu i Matagaluega. Ia ae o le a faapefea la ona fai galuega? O le mea lea e talosaga atu ai ina ia alofagia. Avatu se tupe se i fai ai le faleaoga o Saleaula la o le a malepe ae le i.....o le mea lea e tatalo atu ai ma le agaga faaaloalo, ina ia faasalafa lau vaavaai mamao, i nuu o lo o moomia lau fesoasoani i le tou Kapeneta ma tulaga i le...

O le mea lea e tatalo atu ai e ui lava ina e le i faataunuina le faamoemoe o le Afioga i le Palemia i le mea lea o le fetuunaiga o si o matou nuu lea o le a tauave ia Salamumu, ae e te silafia ea o le nuu Pule le nuu lea o Saleaula. O le mea lea e talanoa atu ai ma le agaga faaaloalo, e moni e tatou te talie i ai, ae e le malie. Ua tou vaevae ola ia lenei.... O le mea lea, lau Afioga i le Fofoga Fetalai, e leai lava ni.....ae na o lou valuvalusia o aa o le fau.

O le isi mea lea ou te talanoa atu ai, o le mea lea e matou te i ai ma le Afioga i le Fofoga Fetalai, sa folafola mai lava i ia tausaga o le mea e fai ai atinae lafumanu. E tataua ona i ai ni vai, ia e oo mai nei ua 20 tausaga o la e lava e leai ni vai. Ae lea la ua ou vaavaai atu, e talosaga atu ai i le Afioga i le Minisita o Falepuipui, o la ua ou vaai o la ua fai tane la ua i ai, e tai muamua atu se paipa i lau pa povi lala.... O lau talosaga vaivai lea, ia alofa mai le Atua e faamuamua au povi ona mulimuli lea, e faamulimuli povi a le Fofoga Fetalai. O lea lau talanoa atu lea ma lou faaaloalo, ia manuia le Fono i lau Afioga i le Fofoga Fetalai.

**FOFOGA FETALAI:** Malo. Faafetai, faafetai ia o saunoaga a le aumatutua, e faapena e tuusao lava. Ia malo saunoa i le sui usufono e pei ona faatoa mavae atu nei le sui usufono mo Saleaula.

Ia, ua avanoa foi le Palemene mo se isi sui usufono e fia saunoa.

Ia tulai maia lau Afioga i le sui usufono mo Alataua Sisifo.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Afioga ALIIMALEMANU ALOFA TUUAU (Alataua Sisifo):** Lau Afioga i le Fofoga Fetalai o le a sou finagalo po o le a amata au ia le matou Komiti Tupe pe a ua leai nisi? Faafetai.

**FOFOGA FETALAI:** Ia manaia le lui a le Taitaifono o le Komiti o Tupe. Ia ma e ou te manatu o le tulaga lena, e toe tauanau gata loa le paia o le Palemene tulou le faafofoga tapuai mai o Samoa, ia ona lafo loa lea i le Komiti o Tupe.

Ia e ui i lea, o lea ua tulai mai le sui usufono o Faasaleleaga Nu.2, ia tulai maia ia le tootoo o Fuifatu, e saunoa.

**Afioga PAU SEFO TAUMATA PAU (Faasaleleaga Nu.2):** E faatalofa atu i lau Afioga i le Fofoga Fetalai, faatalofa atu foi i le la itu i le Palemia, o tamaitai ma alii Minisita o le Kapeneta, faapea foi Minisita Lagolago. E ao foi ona ou afe atu i le tapuaiga a le atunuu faapea foi si ou itumalo o lo o faalogologo mai, i le afioaga o le Aiga Sa Malietoa faapea foi si ou nuu, Leilua ma le Tuulima, faapea foi Sa Alaalatoa ma le la Toalua, Tuilagi ma Namulauulu ma le Maopu Tufuga. Ia tapuai maia se i ave se tatou sao e agai tonu lava i le Tala Faatatau Autu o le Tupe.

E muamua lau folasaga i se mau ua leva ona ou nofo ma au e tusa ma le 40 i le 50 tausaga. Sa masani ona ou feaveaia le isi toeaina, ou te mafuta tele i toeaia i taimi a o fai foi si tamai taavale e tau atiae ai se lumanai o le aiga. O le masani a le toeaina a faapea ou te aumaia i le isi pa pia, o le toeaina ua matua po ua 70 tausaga. A uma ona ou ave ona faapea mai lea o le toeaina, a ou vaai ia oe, ua ou moomoo. O le manaia ia o lea faaupuga. Sa ou nofo lava ma... e tele ni tausaga sa ou nofonofo, na oo lava i le taimi sa ou fesili ua ou vaai atu ua pulapula lagoto le soifua o le toeaina ne i te i ua le faamatalaina mai ia te au. Fai mai, a e vaai, a e faia se galuega fai ma le totoa, fai fai ia lelei ma le faamaoni, ona fua mai lea i ni fua se tele e te fiu e faaoga.

O le a ou agai i le Tala o le Tupe e pei ona aumai, ma ua manino foi ma malamalama le saunoaga a le Minisita o Tupe i le aso ua sola. A ou vaai i le 2016/2017, 2017/2018, 2018/2019, e leai lava se suiga o tatou tupe maua masani, e faapena foi tatou tupe faameaalofa mai. E laitiiti lava nai siitaga toe palasi mai le isi piriota i le isi piriota. E faapena foi tatou tupe faaalu i Tala o le Tupe lea e tolu ua mavae atu aemaise lena Paeaiga. Ona ou mafaufau lea, o lona uiga ai na o le pau lava ia o tupe maua pe i ai nisi tupe maua e siisii mai lea piriota i lea piriota, ma tatou tupe faameaalofa, ai lava na o le pau ia o tupe e faameaalofa mai lea tausaga ma lea tausaga. E le tele foi la, o lona uiga e leai ni tagata po o ni atunuu o maua mai ai nei vaegatupe, a o se tupe tele lava. O lona uiga, po o le a lava le mau a le Minisita e faapea mai, ia tatou taumafai tatou te tagiilima, e sao, ou te matua faasaoa lava lea vaega.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Maumau pe ana faapea tatou te tagiilima ae faaitiitia mea tatou te mananao i ai, ae le mafai lava tiga ona tele tupe tatou te maua mai ma tupe i le lotoifale, ae le mafai ona vavaea o tatou manao ina ia faalelei le tamaoaiga o si o tatou atunuu. O le mau foi lea a le Minisita o Tupe, e ese le lelei, faasoosoa tatau ma faaaoga tatau. E pei foi ona ou avatua, o le tala lea a le tamaloa, a e fai ia lelei, a e faia se galuega, fai ma siaki, aua o nei tupe tatou te maua, afai e leai se siitaga tele, o lona uiga o lea e tumau lava. O lea lava e tumau tupe nei mai le isi piriota i le isi piriota. O lona uiga e tatau ona siaki pe i ai se mea e agai i ai nisi tupe, aua e i ai lava masalosalo. E pei lava o se alavai foi lele faapea lava oe o lena e te taumafa ai na o oe, ae i ai lava le taimi e iloa ai e le isi tuaoi, vaai le vai lea, vaai la e vili mai le isi tatou paipa i tua ae ona faapea lea, ona alu lea i ina, ona iloa ai lea ua vaivai le sau o le tupe. E faapena sou naunau e tautino atu, e ao ona siaki, siaki ia taofia ai lea mea, pupuna ae lea mea sau faapea mai ua a, ua faaaoga i fea tupe. O lona uiga e atagia mai, e le o lelei le siakiina mai o tatou alagatupe lea e sau, pe i ai nisi mea po o mitiia ae i fea, a o lea lava tatou te faapea, ona o le mau lea e avatu lau Afioga i le Fofoga Fetalai. O lona uiga, o lea e tumau lava tatou alagatupe ia, e tai pei foi o le tupe lea e faameaalofa mai. Ae ou te iloa ana tetele ni tatou atinae lelei, ou te iloa foi o le a tetele ni e alolofa mai o Malo i fafo i le tatou atunuu.

Tatou see la i le faaaogaina; O le manao ia e le uma, ma ou te talitonu o le atunuu lena o le atunuu o manaoga, e tele mea tatou te mananao ai, e atiae aiga. O le manaia o atinae, e leai se aiga e le atinae. O le faaaogaina o le faasoosoa o le tupe, aua o lea e aumai e faaitiitia, o le faasoosoa o tupe, ia, e lafo atu lava i le Afioga i le Taitai, le Palemia ma lana vaega e faasoosoa tupe. O matou o le mananao, e le gata o le matou mananao ae faapena foi ona latou mananao. O lona uiga, e tatau foi la ona fuafua le manao aua e fiu lava le Afioga i le Minisita o Tupe e saili le tupe, ae a tatou mananao lava, e le mafai ona faamalieina. E tatau foi la ona fai fuafua. Ona ou aumaia lea o galuega ina ia fai faalelei. Aua a fai lelei galuega, atonu o le a faaitiitia ai le faalelei. Ioe, o se galuega foi lea pe fai ua lelei, pe tolu tausaga toe faalelei. Atonu o le vaega lea e ono taofia ai le soona faaalu o le tupe. O lona uiga, e pei foi ou te aumaia mea o auala. Afai nei la auala e lelei, atonu pe atoa le 10 tausaga o lelei le auala, e le toe alu la se vaegatupe e toe faalelei, faalelei ma faalelei le vaega lea. Ona ou aumaia lea o galuega, aua o auala galue ou te faalogo lava e fai soo, aua o le 20 lena o tausaga e le i i ai lava se auala galue i lo matou itumalo a o lo o faalogologo mai le Minisita. O auala galue, na pau lava lea o le taimi e fai ai auala galue, ma na pau foi lea o le mamafa o taavale ma masini e o i le auala lea, ae a uma loa, na o taavale lava pau fa lau Afioga e o ai. Masalo o le nuu lea e i ai le auala lea pe na o le toaono lava tagata e fai taavale, ae le umi lava le auala leaga, faalelei, leaga, faalelei.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O lona uiga, e mafua mai i le l lelei o le faiga o auala, e leaga materials e faatino ai le auala, aua a timu, tafea, a timu, faata, tafea. Aua foi na o le pau lea, e le lelei le faiga o galuega, na pau ia o taavale e o ai, e le toe o ai ni masini, e le toe o ai ni loli pau sefulu ma ni masini e mafua ai ona leaga auala. A faapea la lau Afioga i le Fofoga Fetalai e lelei le vaaiga o le faiga o auala, e agavaa kamupani po o tagata e ave i ai, ou te talitonu ua lelei uma auala o itumalo. O le mea lea ou te tautino atu ai, ua tatau ona fai se fua i mea o kamupani nei ma konekarate i le faiga o auala nei, aua o le faiga lava lea o le a fai ai nei, o le isi tausaga lea, fai isi auala, ae na o le faalogologo lava, ae taumafai e taofi e pei o paipa. A taamilo atu lava o la e i luga paipa e aliali mai lava le paipa paepae, ae se i tau tuutuu i lalo, pa, e le faia faalelei galuega. Aua o le mau lava lea, a na faapea e faatino lelei a tatou galuega, e leai se mea e pei o auala nei e feoi ai nei i le taulaga, leaga e tatau ona ave se vaegatupe lelei e faatino ai, leaga o le traffic, o taimi uma taimi uma faapea. Aua a e nofonofu lau Afioga i le auala lea, e le mafai ona tumau lou ulu, na ona faapea a, taxi, loli, lea. E tatau la ona fai lelei auala ia, e faapena foi auala i tua, ae ou te le iloa la po o le a le mea e soona alu ai se vaegatupe i nei auala galue, ae pau lava na na o le tasi le masina timu, pupu, maintain. O le mea la lea, o le mau, ia fai ma le faamaoni, taumafai e o lo o latou faasoasoina nei galuega ina ia o e tulimatai lelei, aua na ona o atu lava o kamupani o ifo le aiga, vaai le tamai mauga la e i tua e sua mai e aumai se tupe, ae le o le material lea, e le o le ituaiga palapala lea e fai ai le auala. E i ai lava le material, le aggregate po o le mea tanu foi lea mai le mauga pei lava e lelei lona po o le a lava, pe le taina, e lima tausaga o mau le vaega lea o le auala.

Ona ou oo mai lea i le isi vaega lea i le Afioga i le Minisita o Tupe, e avatu lau faamalo ia te oe, ua ou pasi mai foi ananafi sa fai au asiasiga i lo matou itumalo, i le manaia o lou auala lea ua lata mai i le uafu. A o au faataitaiga lelei na se i e alofa atu i le matou itumalo, ae toaga e saili le tupe, o lau matafaioi lava... A o le naunauga o lenei itumalo ma le sui usufono, e lafo atu lava ia te oe e saili mai tupe aua le atinaeina o si o tatou atunuu.

Ona ou oo mai lea i le faasologa o manaoga o lou itumalo ma toe matimati atu lau Afioga i le Minisita mo Fesootaiga, e i ai si nuu lea o Tapueleele, e i ai le faalavelave na tupu talu ai ona ua le lelei le fesootaiga e vili mai le taavale a le falemai ua le...ua alu atu le taavale... a o faalogologo mai si ou pitonuu lea, ia ua tuai atu le taavale ona ua le lava le fesootaiga. Se i e alofa ane i ai leaga e mamao tele. O le sau lea i le uati tau mai i Afega, o le va lona o Tuasivi ma Tapueleele.

Lau Afioga i le Minisita mo Faamasinoga ma Pulega Tau Faamasinoga, ou te talitonu o lea o le a aveese le fale faamasino ma Tuasivi. Ia o mea lelei uma lava, ae lelei le faatopetope leaga e tele foi fuafuaga a le Malo e ono fai i lona vaega, e pei o le falemai ma...

Lau Afioga i le Minisita o Aoga, Taaloga ma Aganuu, alofa ane i le faleaoga lea i Fatausi, na ou faalogo i ai toe lava o sau ioe ona faataunuu lea e faatino pei o le faleaoga lea i Sapapalii.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Lau Afioga i le Minisita o Tupe, malo, malo mo le lipoti ae na o vaega na se i fuafua lelei a tatou tupe ma fai ia lelei, o tupe uma lava a tatou ma le tatou Malo. O nai vaega na e tilotilo lelei i alagatupe pe leai se isi o taamilomilo mai tua, ae tatau ona faatele le tatou tupe aemaise o tatou tupe ia faameaalofa mai fafo.

I le Minisita mo Tina ma Tamaitai, Atinae o Nuu, Afioga ma Agafesootai, se i alofa ane e i ai Sui Tamaitai na e lua Pulenuu na e avatu ai le talosaga se i silasila ane i ai.

Ia, si ou uso a Minisita mo Tupe Maua, faamalo mo le lafoga a faifeau. A o faafogafoga mai faifeau, o se mea manaia, aua o lea lava e aumai e le Minisita o Tupe, atonu o le a fesoasoani uma nei alagatupe e faatupe ai mea o lo o mananao i ai le atunuu ae le na o se vaega.

Lau Afioga i le Minisita mo Faatoaga ma Faigafaiva, ou te manatua sa ou lagolago i le 2001 i le Minisita lea. E i ai ia le ma asiasiga i le togafai i Nuu, sa ma asiasi ai lea sa ma o lea i lona Ofisa sa ou fautuaina lea e taofi, e aua nei toe faia lea togafai i lona vaegatupe o le a alu, ina ua ou tilotilo atu e leai se lumanai i le togafai lea sa tilotilo ai, ma sa fiafia le Afioga i le Minisita i lau fautuaga. Ae peitai ane na o atu loa Saina faatino le faatoaga lea ma fualaau, sui atoa le faataitaiga.

E tai pei foi o le lafupuaa se i tulou. O lea lafu masalo e le fia vaai i ai se isi i le tagata sa faatinoina lea atinae ma sa ou fautuaina foi e aveese, manaia ia. Se i alofa ane i le faasao lea a lo matou nuu, toe tasi lava le faasao toe o le faasao lea e tai lua masina, faamolemole, se i alofa ane i ai.

E i ai le.....e masani ona o au ou te uo tele i Saina, sa ou fesili i ai, ma e o le mea leni e le o iloa e se isi e na o au lava. Ae lea o le a ou taumafai e tau atu ia te oe sa ou tauina i le uso a Minisita talu ai, ae te i ma fai mai e aua le taua i se isi, ae o lea o le a tau atu ia te oe e aoga tele mo lau Afioga i leni vaitau.

E mafuta tele au i le vaega lea i Saina, o au sa i ai lau metotia e tala uma ai fale o le Malo i le taulaga. O au la lea sa tuua i lalo le fale foi lea e fogafaletolu o le Esetete lea na faatino ai le TATTE. Sa ou i ai foi la i le faavaega e tau lava i luga le fale, sa ou vaai lava i le mea lena mo le faatu, se i tulou. A o au foi e uu lava le faguvai ma feei i luga mo mo le soifua galue, ma toe aami atu foi au i Salafai ma ou alu e fai lea falemalii lea i le matou nuu, lea na afio atu le Taitai o le Malo tatala ma fai i lo matou nuu e aua le toe feita ia te au. Na toe aami atu foi lea o au fai mai faamolemole ou te sau e tatala i lea ua i ai le ofisa o le falemai. Ia uma lena toe aami foi au i Tafaigata e tala i e valu fale i le falemai na mafua ai ona vave le falemai sa ou fesili i ai.

E masani la Saina e ta le 7:00 e o ma fagupau i luga o le fale fogafale 6:00 la le e faatoa omai lava i lalo i le ta o le 4:00, e utu ona o lea e faavevela i luga e le toe o mai i lalo e sa. Ou te leiloa la po o le a le mea e faaoga i le faguvai a uma ona inu ae le toe omai i lalo i le 7:00 pe omai i le 4:00. Na ou fai atu loa laia, e le mafai ona ou toe alu atu i luga. E i ai la le masini na ou alu ai i luga, e faatu mai lava le Saina pe ono itula o faatu.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O le mea la lea, na ona tuu tuu atu i ou autafa, fai se aoga mo mea o le totoina o fualaau aina, kapisi ma mea na, aua a faatu mai lava le Saina e faapea e tau i o, faatoa manu ae lava i le fa itula e matua....o le metotia lena ia e maua mai i le mea lea, a toto e tatou faitogalaau, e te vaai atu e tu tu faapenei pe alu lea moe. Ae o le metotia lena ua e tulai mai i le tofi, ae tautuana ma oe, fai se aoga amata mai i Asau aua e pei e amata mai ai, ona matou tilotilo lea i ai pe aoga mo le lautele o le atunuu, aua ua uma foi ona ou tauina i le Minisita o Aoga, vaai Taaloga o le Pasefika o le a fai nei, ia request e aumai se taaloga e fai i i nei e maua ai ia ni tatou pine auro.

Lau Afioga i le Minisita mo Galuega, Felauaiga ma Atinae Eseeese, o lena ua ou fai atu, ia taofi le lipea o auala, ae alu se i e siaki. A e manao i se., o au foi sa ou fai auala, na o mai le kamupani mai Alaska i le Public Works sue se tagata na te faga le ta i le malaevaalele. Na o au lava na ave au ma toe o i Futia e faga le ta i ina. Ou foi mai loa koe aami au i le malaevaalele lea i le 1984, aua tou te le o i ai i le mea na. Sa ou mulimuli ai i papalagi i le faiga o auala i le malaevaalele, ou te mulimuli i ai, talie lava isi tagata ae la ou te alualu lava i le tamalao.

E i ai la le loli tele a le tamalao mai fafo, e fealuai ma le fua lena e mita ai le malosi o le pau o le vaalele i lalo, masalo e le o..... Sa ou fesili i ai, po o le a le mea ua toe eli ai aua matua lelei lava ala la e i lalo? O le tala a le tamalao fai mai ia te au, e te iloa oe, e fia pauna lea e pau ai i lalo le vaalele, ia mamafa, o le taimi e pau ai ae faapea, tupu le faalavelave. Na ou malamalama lava lea i ai, ou sau loa fai i le tamalao o le kamupani e vaai se loli e fua ai auala. E i ai mita e fua ai a faapea e emo, ona toe eli lea faapena, ona aumai lea o le loli.

**FOFOGA FETALAI:** Toe lua minute o le sui usufono.

**Afioga PAU SEFO TAUMATA PAU:** Ioe, e faapena ona fai ai galuega a le Malo. O lau vaai i ai, e leai lava ma se isi o le aufai konekarate lea e i totonu o le Maota e i ai se loli faapena, se i e tilotilo lava i ai faapena, se i e tilotilo lava faapena, e i ai le loli e fua ai le malosi o le auala ona faata ai loa laia lea, se i oo atu i lo ta itumalo. E amata la lau faamatalaga i lou itumalo, tausaga nei 2001 le taimi na Minisita ai i le aua o le taeao lea na tofi ai le Minisita, ma fai le ma asiasiga ma faapotopoto mai Sapapalii tumu, fai le matou ava, ona faapea mai lea o le Minisita, o le a fai le tou auala, ae lea ua ou vaai atu nei e le o toe nofo mai i i le Minisita, i le 2001 ona ou alu ese lea.

O le auala lea, masalo o lape i asiasiga ia e o atu, leaga foi e leai se laupapa foi lea e faailo ai o le auala laupapa, ae e le o se auala laupapa, o le auala sima. Silasila i ai a oo nei i se ituaiga timuga poloka loa lea. E 48 na ou faitauina ananafi aiga e lofia uma ai le gatai leaga e leai se alia e pei lava. E oo foi i le pamu, o le pamu lena a timu e le mafai ona utu ai se taavale a matou i Savaii, na ona faapea mai o la e tafe ai le vai i le faletalimalo o si vaega.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

A oo nei na tafe e palapala uma e toe o ese uma lava ia tagata tafafao maimoa mai fafo i lea fale. Faamolemole se i e tagatagai i ai, aua o i lava e poloka ai le aveina o mai, poloka ai faalavelave o la e i ai le Ofisa o Leoleo i Tuasivi e faapena foi ma....

**FOFOGA FETALAI:** E faamalulu atu i le sui usufono mamalu, faamaea mai le saunoaga a lau Afioga.

**Afioga Hon Gatoloaifaana Amataga Alesana Gidlow (Faasaleleaga Nu.1 Sisifo):** Lau Afioga i le Fofoga Fetalai, faamolemole pe mafai ona toe faaopopo se 10 minute a si ou tuagane lea Faasaleleaga Nu.2.

**FOFOGA FETALAI:** Ua faatuina mai ina ia faaopopo se isi 10 minute o le sui usufono o lo o saunoa.

*E le i faamaonia le lafo.*

**FOFOGA FETALAI:** Faamaea mai le saunoaga.

**Afioga PAU SEFO TAUMATA PAU:** Faafetai, faafetai i le... Ona oo mai lea i le auala lena i Sapapalii se i alofa ane. Ou te manao lava na o le sua lava, sua lava ma i ai se vai i uta, e tele nai aiga na e fia nonofo i uta ae leai se vai aemaise lava nai fanau aoga. Ia e faigata lava na o mai nao nai tamaiti ae manaomia lava nai matua ma moli i po e feoai mai ai ona o la e i ai nai faleoloa i tai.

Oo atu i lo matou nuu, o la e i ai nai atonu foi e i ai sou taimi ona ta asiasi lea i ai. O le nuu lea o Tapueleele e pei ona ou fai atu, e 700 tagata soifua la e i ai i Tapueleele faatasi ai ma tagata o le aoga lea a Vaiola. A oo la ina pa le vai o lona uiga e le mafai ona feoai, se i e alofa e lua auala sima na e i ai, ae o le matua leaga lava. Ia ma le ta lea i le pitonuu lea na gata le faataina i le 1997 na sauni mai ai le talosaga.

Lau Afioga i le Minisita mo Tagata Tafafao Maimoa Mai Fafo, ia faafetai, o le mea sili lena e maua lou soifua maloloina. O lena e maua lou malosi o lena foi e lelei lou nofo mai, e le toe faalagolago ae faafetai.

Le Afioga i le uso a Minisita mo le Soifua Maloloina, o le matua 100% o uta, pau o le mea i luma o le.... manai pe a fai se pa, se pa i le pito i tai o le falemai foi lea, ana o la e lava e taumafa tapaa tagata i totonu o le falemai e tele lava, ia ma le paka lea i luma ua faalavelave tele taxi na e i luma ua fai sina faalavelave i nai tagata na e....

Lau Afioga i le....

**FOFOGA FETALAI:** Ia ua maea le taimi o le sui usufono.



19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Afioga PAU SEFO TAUMATA PAU:** Ia o le a faauma atu. Lau Afioga i le Minisita, ia tautuana manaia lava lau saunoaga lea i le maketi. Sa e aumai tonu lava faapea sa e le manao e faatino le fale lea, ia ae ona o le fautuaga a nisi o le komiti, o le mea sili ai....

Lau Afioga i le Minisita mo le Punaoa Faalenatura ma le Siosiomaga, o lena ua taoto atu i lau Afioga ia le matou taligalu, e le i tofo lava lenei itumalo i se taligalu.

Lau Afioga i le Minisita mo Leoleo, tele lava le faaletonu ona e faaopoopo nisi a tatou leoleo i le maketi. E pei ona tulai mai lea faalavelave i le maketi i lea taimi, ua leai ma se leoleo ua o. Ae ou te talitonu aua e masani ona ou i ai i Aso Toonai, e ta le 9:00 ou i ai, e gata lava leoleo i le uafu, ia ae leai ni leoleo i le maketi. Pe le tataua ona ave loa i ai le tamaitai lea o le Sui Komesina i lea vaega?

Lau Afioga o nai vaega ia, e molimoli atu, ae tautuana o manaoga o lenei itumalo ma fautuaga foi ua avatu i le Tala o le Tupe, ia faamalo lava i lau Afioga Minisita o Tupe, toaga e sui mai ni tupe e faatino ai manaoga o lenei itu. Ae taumafai ua lava le matou itu e mananao, ao outou na e faasoasoa.

Lau Afioga e momoli atu ai le faafetai mo lenei avanoa, ia lou itumalo, ia o lea ua uma ona fai le folasaga. Onosai, masalo o se taimi lata mai o le a ma malaga atu ai ma le Minisita o Galuega Eseeese, ia faatalitali lelei mai ia le matou faigamalaga. O le mea lea e momoli atu ai le faafetai mo le avanoa, ia manuia le Fono.

**FOFOGA FETALAI:** Malo, faafetai saunoa i lau Afioga i le sui usufono mamalu o Faasaleleaga Nu.2. Ia e tapuai mai ou faiva e le itumalo, ia o lea foi ua maua le avanoa mo se isi foi sui usufono e fia saunoa.

Ia tulai mai le sui usufono mo Salega i Sasae. Ia maitau atu faapea o lea e te tulai mai.

**Tofa OLO FITI AFOA VAAI (Salega Sasae):** Lau Afioga i le Fofoga Fetalai, se ua ta musu lava o lea e faatalitali ia le matou Komiti po o le a le taimi e uma ai. O lea e tau talitali atu ae a faapea loa o le a matou alu matou pe afai ua leai se isi e fia lauga ia o lena la.

**FOFOGA FETALAI:** Ia lelei, malo faafetai. Se i lafo atu foi i lea itu o le Maota po o ai o tapena.

Ia, tulai mai le Aiga i le Tai.

**Susuga MULIPOLA LEIATAUA LAKI (Aiga i le Tai):** Lau Afioga i le Fofoga Fetalai, e momoli le agaga faafetai, i lau faatofalagia i lenei aso. Manatu e le faigofie ou faiva alofilima, aua le usuia o le Fono usu i lenei aso. Faafetai foi ua maua se avanoa o le Aiga i le Tai, e ui ina maitau atu, e faatutugata foi le Maota ua alu le aso, faamalo le papale.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E manatu lea o le a ulumaau ia i le toa le paia o le naa, taoto foi mauiloa o Samoa faapea ona tului paetapu ma ona tului paesa, aua ao faasao o Savea, aua o Samoa o lele ua maea ona faaee i lumamaota ona feoga. Aua o paia o le Auaifaluga totofi o le Atua, e o lo o faanonomanu aua se manuia o Samoa ma ona tagata. Ou te manatu la o le a ou le toe faloina le afaloloa pe ou te toe asaina le filifili o le vaosa, o lea ua uma ona paepaeulufanua lo tatou aso e ala foi i nisi o tootoou o le Maota, aemaise foi o le faapolo ma le faasagi e pei ona saunoa i ai lau Afioga i le Fofoga Fetalai i lenei aso.

Ae tulai ma le agaga faaaloalo, o le agaga o le faafetai e fia momoli i le tatou Malo aua faiva alofilima sa alo i ai mai le amataga o lenei Paeaiga, o lea ua tatou tutonu i le taulaiga po o le ogatotonu o le tatou folauga. Viia le Atua faafetai i Lona agalelei o lo o see malu lava le sa o Samoa.

Ona manatu lea lau Afioga i le Fofoga Fetalai, na o se faafetai e fia momoli i le Minisita o Galuega, e le faigofie ou faiva alofilima aua le polo faasoa i le tau faasoasoa o le tamaoiga aua atinae tetele ma atinae fai. Ua maitauina foi i lenei vaiaso ua alu atu, ua sefulu tatou auala galue ua tatalaina o le faailoga o le agai i luma o le tatou Malo. O lo o gaoioi lava e ala i fuafuaga mamao faataatitia aua le atiaaina o le tatou atunuu, atinaeina o le vao aemaise o le gataifale e tua i ai Samoa ma ona tagata. E faapena foi se maitau i le agai atu isi o matou itumalo, e momoli le agaga faafetai i lau Afioga i le Minisita, ou te faaupuina lau Afioga o le Minisita o Galuega o le seneturi, aua lele ua faitau sefulu tausaga o tatalo Aiga i le Tai, e le i toe inumia e Manonotai se vai. A ua a lenei taeao? A lea ua tau le ai, o lea ua soo si ou motu o Manonotai. O lea ua oo Manonotai i le vaega ma le itulagi o lo o sapi ai Samoa i le paipa. O le faafetai lea i lau Afioga i le Minisita, ua tele tausaga o taumafai, ua fiala lava le motu, ua lagona.... ua tea le galala sa feagai ma le nuu, ae matou te talitonu o lo o agai atu pea nisi o faamanuiaga.

**FOFOGA FETALAI:** Malo faafetai. Ia, ou te vaelupeina le saunoaga a le sui usufono mamalu mo Aiga i le Tai ona o lea ua tatou taunuu i le tatou malologa masani. Malie le sui usufono mamalu o le a faaauau le saunoaga pe a tatou taliu mai i le tatou malologa. O le a faataatiaese Galuega a le Fono Aoa mo lana malologa masani.

*Na faataatiaese Taualumaga a le Fono Aoa mo lana malologa masani i le itula e 4:43 ma toe faaauau i le itula e 5:21 i le afaifi.*

*Na toe faaauau Felafolafoaiga i luga o le faitauga o le Tulafono Tau Faaofi o le Faatatauina o Tupe Faaopoopo (Nu.2) 2017/2018 ma le Tulafono Tau Faaofi o le Faatatauina o Tupe 2018/2019.*

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoaofa Faitulafono. E faia le malologa o lo o saunoa le sui usufono mo Aiga i le Tai. Ou te tapa ma le faaaloalo le sui usufono mamalu e tulai mai e faaauau le saunoaga.

**Susuga MULIPOLA LEIATAUA LAKI:** Faafetai i lau Afioga i le Fofoga Fetalai. E manatu o lea ua matu i fau le taliga o le sua i lau Afioga i le Taitai o le Maota, ua palega auau foi le taliga o le sua i le paia o lenei Maota i le afio o le Afioga i le Palemia, faalupe i le vao, faapea foi le afio o le Afioga i le Sui Palemia, le Kapeneta ma le mamalu o lenei Palemene, ua maua foi se faasiliga malosi aua le faaauauina o tiute o le Fonousu a le tatou atunuu. O le agaga faafetai e le faaitiitia, o lagona ia na lagonaina e le lepela Samaria, na toe foi e faafetai i lona Faaola ina ua ia maua le faaolataga. O le agaga foi lea e taumolimoli e le sui usufono o Aiga i le Tai, aua e le faigofie ona to mai faamanuiaga a le Malo, o lea ua sapi ai lou motu o Manonotai.

Faafetai i lau Afioga i le Minisita, sa agalelei foi i se tasi o uafu laitiiti, sub-wharf i se tasi o motu lea foi sa umusa talu ai. E talitonu lava le agaga ua ulufia e le agaga o le Atua lau Afioga ina ua e laasia le motu ma e lagona ai faigata ma fita o feagai ma le motu lea. Faafetai ia Upolu ma Savaii, lelei vaa ma tulaga faatino i le feoaiga, a o lea ua silasila lau Afioga, se pologa o lo o feagai ma le nuu lea o Manono ma Apolima, aua o nuu uma o le atunuu lenei, e fua taimi feoai i le uati, ta se fia ua tatau ona tatou toe malaga, ta se fia ua tatau ona tatou toe foi. O Manono e le faapea, o Apolima e le faapea foi. Aisea? E fua i le tai, a sua le tai on fuafua lea o malaga, e fua uma mea uma i le taimi e tei ai le tai, e maua ai le liu. Peitai a oo ina pe le tai ona nofonofo a lea e leai se tulaga e toe fai i le tulaga tau femalagaaiga vagana ni tulaga ogaoga ona taumafai lea e tetee le vaa, e tulei faatoa e oso i le isi 50 i le 100mita i tai. O tulaga faigata ma le pagatia lea o lo o feagai ma le nuu o Manono ma Apolima, ae faafetai i lau Afioga. O le ala lea o le tele o se tala e faafetaia ai lau Afioga i le Minisita ma le Pulega o le Suavai aemaise foi le tatou Malo, ua le itiiti lenei agalelei ma le tauau tuu atu aua le faafaigofieina o femalagaaiga aemaise foi o le suavai taumafa. Peitai lau Afioga, e i ai lava nisi vaega e fia faaleleia, i le talitonuga e tele a taimi e utiuti ai le suavai, e le lava foi le faaso, ona manatu lea lau Afioga, i se taimi tefa le tauala ma ae foi se tofa, ae manaia pe a i ai sina faatanoa i le ogatotonu o lou motu aua le sapalai o le suavai pe a oo ina utiuti le faaso.

O le tatalo lea e faataatia atu i tafatafa o lau Afioga e fai i ai lau polofaaso. E le gata i lea, e tatalo atu foi i lau Afioga i auala galue ma auala taamilo o si ou itumalo e pei ona faailo atu i le taimi ua fano, ou te talitonu o lena e i ina le tofa, o Lalovi, Apolima, Faleu, Salua faapea foi Lepuiai. E ave lau faamuamua lau Afioga pei foi ona maua e se tasi o Tootoo, le Afioga i le sui usufono mo Falelatai ma Samatau, o le auala o si o matou kolisi i Aana.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Na pau lea o le kolisi e o atu nai alo ma fanau tutu pe a oo ina timuga, faatalitali se i tau mou atu le vai aua a oo ina timu, e matua lilofia i vai le tele o omoomo mai le tasi tafaala i le tasi tafaala. E tau fuafua le taimi e agai i le aoga, ua aafia foi mafaufau aoaoina o alo ma fanau a o sauni i le taimi o aoaoga, e le gata foi i lea o le taimi o le tuua mai, e faitau selau tagata o lo o nofoia atoa ia ogaelele. Lau Afioga, na ona valuvalusia aa o le laau, a o lo o i ina le tofa i lau Afioga.

Ona agai mai lea lau Afioga i le Fofoga Fetalai, faafetai i le Afioga i le Minisita mo Faatoaga o lea foi ua maua ua amata au polokalame faagasolo aua lava le faaitiitia o tulaga i manu ainiu, manu faalafua, ae tasi lenei o faamanuiaga o lea ua taumafai e toe lalaga mai le popo, ua maualuga le tau o le popo, lelei le maketi, peitai, e uunaia foi le aufai popo ina ia toto le niu, a ua malosi foi le sau o le manu ainiu latou. Faafetai i le tofa o lea ua vave ona e piiama aua foi le foiaina o ia faafitauli, o lea o le a agai uma atu i itumalo aua foi le faaitiitia. Faafetai foi i le SROS ua maitauina foi le tele o le tatou production ua amata, o lea ua fuafua i le masina fou ona launch foi lea o le tatou taro whisky, o le sasalapa whisky ma le tele o isi mau faamanuiaga, ua alualu i luma le tomai ma le sailiili ae le gata foi i lea o le mataalia o lau Afioga i le Minisita ma le Matagaluega i le tele o vaega aua le faaaogaina o fua o faaeleleaga e tua i ai le tatou atunuu. E tele naua nisi o vaega e fia oo i ai le tautalaga, ae manumanu i le taimi.

Lau Afioga i le Fofoga Fetalai, ia ne i galo ia te au le faafetai i lau Afioga i le Minisita o Aoga, malo faafetai ua siitia maualuga foi le tulaga o tatou aoaoga pei ona i ai i lenei vaitau, o oe lava le best lea ua i ai. Faafetai o lea foi ua e saunoa o le a faalelei atu malae taalo o si au aoga tulagalua. O le aoga lea e taaalo i luga o le taufusi tulou le gagana vaeane le pau o le malu, o lea ua ioe mai lau Afioga, talosia ia i le agalelei o le Atua e avatu i ai le ola ma le malosi, ia faafualoa le soifua o lau Afioga i le Minisita.

Ia lau Afioga i le Minisita o Tupe, faamalo tapena i lau Afioga faapea foi le Faauluuluga ma le aufaigaluega a le Ofisa o Tupe, e talia atoatoa e le Aiga i le Tai le Tala o le Tupe, pau lava le agaga, tuai ia ona pasia ua leva ona fia galulue Afioga i Minisita aua foi le fia faaumaina o faiva ma tiute o le tau faamaeaina o lenei tausaga faaletupe.

Ia, ia faafualoa e le Atua le soifua i lau Afioga i le Fofoga Fetalai, ia maua pea lou malosi aua le faafoeina o le Fonousu a le atunuu. Faafetai i le tapuaiga mau a si ou itumalo, i le paia o Aiga e Lua ma alo o Malietoa, Tapaau faapea foi Ati ma Lautolo, susu Sau ma le latou aiga faapea foi le Tulafale ma Sauma, oe na faletolu i ai Manono. I le tapuaiga a si ou nuu i le Toafa o Alii ma le toalua o tulafale, faapea foi lau Susuga i le Tapunuu ma le alo o le Malietoa ma upu ia te oe Aiga i le Tai. Ia manuia le Fonousu.

**FOFOGA FETALAI:** Malo faafetai saunoa i lau Afioga i le sui usufono mamalu. Ou te tapa se isi sui usufono e tulai mai.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ia, ua maua atu le tulai mai o le sui usufono mo Safata Sasae. Tulai mai lau Afioga i le sui usufono mamalu e saunoa.

**Tofa NONU LOSE NIUMATA (Safata Sasae):** Ou te faatalofa atu i lau Afioga i le Fofoga Fetalai aemaise lau Afioga i le Palemia ma lou auvaa, Afioga i Minisita Lagolago aemaise foi sui usufono. Ou te faatalofa atu foi i le mamalu o lou itumalo o Safata Sasae, malo le soifua manuia.

Lau Afioga i le Fofoga Fetalai, o lea ua folasia i Maota le Tala o le Tupe, aemaise le folasaga manino a lau Afioga i le Minisita o Tupe. Lau Afioga i le Fofoga Fetalai, o le sini autu o le tamaoaiga ia mautinoa e le Malo ona tauaveina o tapulaa ma faiga faavae tau tupe a le Malo. O le tapulaa, o tupe o galuega e 2.6% i le tausaga 2018/2019, ae 23.7% o tupe o galuega fai. O tapulaa e 35% i le 38%. O le totogi o tagata faigaluega e 48.4% i le 2018/2019, a o le tausaga e 2017/2018, e 47.5%. O le tapulaa e 40% i le 45%. O nonogatupe a le Malo i le tamaoaiga, e 44.1% i le tausaga nei po o le... ae 47.4%, a o le tapulaa o lalo ifo o le 50%. O le pasene o le aofaiga o totogi mo nogatupe i le tamaoaiga i le tausaga 2018/2019, e 3.5%. I le tausaga e 2017/2018 e 3.4%. Lau Afioga i le Fofoga Fetalai, o le tamaoaiga i le atunuu leni, e 1.8% i le tausaga 2017/2018 ae 3.3% i le tausaga 2018/2019. Lau Afioga i le Fofoga Fetalai, e faapena foi le tamaoaiga ia Ausetalia, Niu Sila ma Fiti, e tusa ma le 3.1%, 2.9% ma le 3.5%. O lona uiga, e faapena le tatou tamaoaiga o le atunuu. O lona uiga ou te matuai lagolagoina le Tala o le Tupe. Na pau lav ale mea lau Afioga i le Minisita, o le filifili toa. O le uiga o lau tala, o le mea lea e i ai nei o le filifili toa, e tataua ona sao le filifilia i le vaega e tataua ona ave i ai le faamuamua. Ae sa faapena foi i le tausaga lea ua uma, e faapena i le tausaga lea i ona tua atu, a o lea ua foliga mai o lea ua fai i le taimi leni.

Lau Afioga i le Fofoga Fetalai, o le Minisita o Galuega, masalo o le 100% o sui usufono lea e i ai nei i le tatou Maota, e manao uma lava i auala galue. Po o le a se mea e fai ai, o le uiga o lau tala, po o le a se faiga, po o se mea foi lele, aua masalo o le 5 tausaga leni, masalo o lea ua 2 ma le afa, ae a pe a amata i lou itumalo, amata mai i ina a? Amata mai i Safata i Sasae, sau i Safata i Sisifo, alu atu ai i ina. Aua o lea ou te vaai atu nei lau Afioga o lea o le a fai na o isi itumalo ae faapefea isi itumalo.

**FOFOGA FETALAI:** Malie le sui usufono mo Safata Sasae, se i tulai mai le Minisita mo Galuega.

**Susuga Hon Papaliitele Niko Lee Hang:** Lau Afioga i le Fofoga Fetalai, ou te le fia faalavelave i le saunoaga a le sui usufono mamalu, ae ou te tulai atu e faasao le saunoaga, e le faapea le faiga o galuega. O lea e mulimulitai lava i le tulaga o galuega ua moomia aemaise galuega ia e uia faleaoga e pei o le faamuamua lena, ae sese le faamatalaga lea e pei e faaituau le faiga o galuega i isi itumalo.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ae manatua foi e lau Afioga i le sui usufono, o le tou itumalo lea na tele auala na fai i le Paeaiga talu ai, o Safata. Ae o le a toe faasolo atu foi o lea e tau faasolo nai sui usufono lea e tagi mai foi i o latou auala ma le faasaoga o le saunoaga lau Afioga, e le faaituau le faiga o le galuega, e fua lava i le manaomia tele e itumalo, aemaise auala ia ua gaoa tele ae agai i faleaoga, ia, ma galuega e alu atu le asiasiga ua tele faatoaga ua atiae i auala galue ia e tagi mai ai sui usufono. A alu atu lava la le asiasiga e leai ma ni atinae, ia o le a le mea o le a ave i ai le faamuamua ae le faamuamua... E pei o le tulaga lena ou te faasaoina ai le saunoaga a le sui usufono, e le faapena le faiga o le galuega, ma lou faaloalo lava.

**FOFOGA FETALAI:** Malo faafetai. Ia se i tulai mai le sui usufono.

**Tofa NONU LOSE NIUMATA:** Lau Afioga i le Minisita mo Aoga, o le mea lea e i ai nei aoga i le matou itumalo, masalo e manaomia nisi o faiaoga i Mulivai, Tafitoala ma Fusi. O lea foi sa faaleo mai e le sui usufono mo Safata Sisifo le mea lea.

Lau Afioga i le Fofoga Fetalai, o le Minisita mo Faatoaga ma Faigafaiva, o lou itumalo, o le tele ia o talo ma mea ia, a o le mea lea e i ai nei, ua leai se maketi. Po o le a se mea e fai ai i le taimi lenei lau Afioga i le Minisita, po o le a se mea... pe ave i Niu Sila po o nisi mea foi nei....

**Tofa Hon Lopao Natanielu Mua (Minisita mo Faatoaga ma Faigafaiva):** Lau Afioga i le Fofoga Fetalai faamolemole pe maua se avanoa....

**FOFOGA FETALAI:** Ia se i tulai mai le Minisita mo Faatoaga ma Faigafaiva.

**Tofa Lopao Natanielu Mua:** E le fia faalavelave i le saunoaga matagofie a le sui usufono mamalu ae vave lava le tali, pei uma lava ou te lagona e le o mafai e le motu lenei i Upolu ma Savaii ona faamalieina le manaoga o Ah Liki i le taimi lenei. O lona uiga na ona faamanatu atu pe mafai ona... o lea foi o le a uma nei le Fono ou toe vili i le ofisa lea, ae le o mafai ona tatou faamalieina le talo lea e moomia e Ah Liki i le taimi lenei mo maketi i fafo. Afai la e le o laua le talo a le tou itumalo, lona uiga e i ai se mea o tupu, pe le o matua talo pe le o lelei ae o le a faapena foi ona feutagai ma le kamupani e fesoasoani atu. Ma le faaloalo.

**FOFOGA FETALAI:** Atonu o lea ua maua lea vaega.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Tofa NONU LOSE NIUMATA:** Lau Afioga i le Fofoga Fetalai, toe tasi lava le isi mea lea lau Afioga i le Minisita mo Galuega, o le auala lea i Vailima, pei e galugalu foi lele le auala, pei o le mea lea e fai mai ai Pau. O lona uiga la, e pei e galugalu foi lele. O le mea lea sa fai muamua, e aveese uma a le ta lea sa i ai muamua, a o le mea lea ua i ai nei, o lea ua toe fai lava i luga le ta lea e fai nei. Ou te alu lava i le aso ou te alu ai i le taeao i Vailima ma ou alu i tua, a o le mea lea e i ai, e pei e foliga e galugalu ma faapena.

Lau Afioga i le Fofoga Fetalai, ua uma se manatu, ae faafetai tele i lau Afioga i le Fofoga Fetalai, aemaise le Palemia ma le...

**FOFOGA FETALAI:** Malie le sui usufono mo Safata Sasae se i tulai mai le Minisita mo Galuega.

**Susuga Hon Papaliitele Niko Lee Hang:** Lau Afioga i le Fofoga Fetalai, leai na o se mea lava lea e fia faasao i le saunoaga a le sui usufono mamalu. Masalo o le concern a le Afioga i le sui usufono fai mai e galugalu le auala, ae ua feoloolo lena i lo le patupatu sa i ai. Ma o le tulaga foi o lea auala, na o le reseal lava sa fai. Afai e toe faatino le tulaga lea e aveese uma le ta tuai, e tele le tupe o le a alu ai, a o le faiga lea ua fai ai, e mautinoa lava e uma le lima tausaga o faapena le tatou auala. Ae ona o le popolega foi i nai konekarate ia sa faatinoina le galuega, pei ua taumamaina le latou galuega sa faatino. E faamalulu atu ai i le sui usufono mamalu. Masalo na o le Afioga i le sui usufono la e faitio mai i le auala, ae o le tala a le mamalu o le atunuu ua matua manaia le auala. Ma lou faaloalo lava.

**FOFOGA FETALAI:** Malo. Se i vaai po o lou auala po o pau o lou auala e faaletonu. O le mea e popole i ai leaga o la e faafofoga mai nai pisinisi ma konekarate.

**Tofa NONU LOSE NIUMATA:** E sao au lau Afioga i le Minisita, e sao le mea lea ou te fai atu ai e galugalu le mea. A lea e fai mai e galugalu. Ia manuia le Fono.

**FOFOGA FETALAI:** Malo faafetai. Ia, tulai mai se isi sui usufono e fia saunoa. Masalo e maitau atu i le sui usufono mo Vaimauga Sisifo Nu.1 e pei e foliga o la e fia tulai mai. Ia, leai, afai o avanoa se isi sui usufono, lelei. Ae ua ou tapa le sui usufono mamalu faapea o la e tulai mai.

Se i tulai mai le sui usufono mo Vaimauga Sisifo Nu.1.

**Tofa LENATAI VICTOR FAAFOI TAMAPUA (Vaimauga Sisifo Nu.1):** Faafetai i lau Afioga mo le avanoa. Ia, o lea sa taumafai le faatau i isi sui usufono i ou autafa, ae paga lea o lea ua lafo mai e sui usufono le avanoa i lou nei tagata. Faafetai.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ia, o sa ma faiga, o paia ma mamalu o aofia o le a le oo i ai se leo, aua o paia ma sa mai le vavau seia oo i le gataaga. Ae fai ia le leo o le sui usufono mo Vaimauga Sisifo Nu.1 i le afio o le Matua ia Tofaeono, afio Asi ma Patu, afifio aiga e tolu, afifio le usoalii, alaalatai i laua na tai o Tamapua ma Manogiamanu ma le nofo a ituaiga ia Fuata faapea Ataga ma Sa Ataga e faaleo ai le lagolago o lenei itumalo i le Tala Faatatau Autu o le Tupe 2018/2019. Faamalo faafetai i galuega sa faatino e le Afioga i le Minisita tainane foi le Matagaluega. Faafetai i le Komiti Faapalemene o Tupe Maua ma Tupe Totogi a le tatou Malo mo le galuega foi ma le Lipoti o lea ua faafaigofie ai ona malamalama sui usufono ma avatu ai le lagolagosua ia vave faamatuu atu ai tupe i Matagaluega ma Faalapotopotoga ina ia faatino loa a latou galuega.

Lau Afioga i le Fofoga Fetalai, o le a le tolaulauina manaoga o lou nei itumalo, o le musumusuga na oo mai i lou nei tagata i se tasi o Minisita e faamuamua e i latou talosaga tusitusia pei ona tauaaoina atu. Faamolemole a outou Afioga, o lena ua faamuamua atu nisi o manaoga o lenei itumalo e faapena ona oo mai ai le tufa ma le faasoa ma le tou lima lelei aua foi lenei itumalo, aua o le tele o faamatalaga e oo mai o mea e lelei mo Apia e ave mo nuu i tua ma Savaii. Ae matau atu si o matou itumalo e tu taulaga, ua ave uma mea uma i tua, ae pei ua faatuatuanai nai o tatou nuu o lo o lata i le talafatai i Apia. Ma le faaaloalo lava.

Lau Afioga e fia faaleo le faafetai i le Afioga i le Minisita mo Punaoa Faalenatura ma le Siosiomaga, tainane foi le Ofisa Sili o Pulega, aemaise le tamaitai pule lagolago o lo o vaaia le vaega o le GEF po o le small grants programme. O le faafetai foi e fia faaoo atu foi i le Ofisa o Malo Aafaatasi mo polokalame tauatiae i totonu o le Pasefika po o le UNDP, faamalo faafetai i le tali foi i le talosaga a lenei nuu o Moataa mo se latou auala savali e pei ona faatino i totonu o le togatogo e pei ona i ai i le taimi lenei. Faafetai le agalelei, ua leva ona taatia foi nisi o le matou afioaga o lo o manaomia le auala e sopo atu ai aua foi le agai atu i aoaoga. Ua tele foi tagata sa le lolotu i lena vaiata, aua a sua le tai, ua le mafai ona sopo lea auala tuai sa i ai. O le taimi lenei, ua manaia, ua atoatoa ma lelei mea uma ua mafai foi ona savavali ai le matou nuu. O le auala savali e le o se auala laupapa, o le auala sima e pei ona taua, ae i ai le talitonuga o se taimi oi luma o le a fai ai auala sima o le a mafai ai ona feoai taavale afi. Malo faafetai.

O le faafetai lona lua lau Afioga e fia ave i le Minisita mo Aoga, Taaloga ma Aganuu. Faafetai mo le taimi sa faaavanoa e asiasi atu ai i le matou aoga tulagalua i Moataa. Ia, e tatalo atu ai ma le agaga maualalo pei ona e tagai foi i le faaletonu o lo o i ai, e manaomia se faleaoga fou o le aoga tulagalua i Moataa ona o le tulata foi i le auala ma le faaletonu o le laitiiti o potu aoga, a ua faatupualia le aofaiga o tamaiti, ua silia ma le 400 le aofaiga o tamaiti o lo o resitala i le aoga i le taimi lenei.



19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Lau Afioga i le Fofoga Fetalai, e fia avea foi lenei avanoa e momoli atu ai foi alofaaga i le susuga ia Enefatu ma le faletua o le EFKS i Tanoaleia, o lea ua faaee i ai le tofi o le Toeaina. O le tatalo ia maua pea le malosi i le tino ma le mafaufau aemaise o le agaga aua le tauasuina o le Ipuvai o le Ola, aemaise foi tofiga pei ona tofofi mai oulula i lenei vaitau e le tatou Tama o i le lagi.

Lau Afioga, ua maea ai i i, e momoli atu le faafetai i lau Afioga, ia maua pea lou soifua aua le taitaiina o le tatou Palemene, ia alofagia foi e le Atua taualumaga o lo o totoe aua le Fonousu. Faafetai.

**FOFOGA FETALAI:** Malo faafetai saunoa i le sui usufono mamalu e tusa ai o mea sa laga aua le itumalo. Ia, tulai mai se isi sui usufono e fia saunoa.

Ia, tulai mai le sui usufono mo Faasaleleaga Nu.1 Sisifo.

**Afioga Hon GATOLOAIFAANA AMATAGA ALESANA GIDLOW:** Faafetai tele i lau Afioga i le Fofoga Fetalai mo le avanoa mo le itumalo o Faasaleleaga Nu.1 Sisifo. E muamua lava ona ou faatulou ma ou faatalofa atu i le paia lasilasi o le Palemene i le afio o lau Afioga i le Fofoga Fetalai, afio foi lau Afioga i le Palemia, Sui Palemia, le mamalu i le Kapeneta, alii ma tamaitai Minisita, ae tainane foi le afifio o Minisita Lagolago. Sasao atu foi le mamalu o le Palemene o lo o agaia foi le Malo i lenei vaitau. Tainane le afifio foi o Faauluuluga o Matagaluega ma Faalapotopotoga a le tatou Malo o lo o lima ma vae aua le tautuaina o le tatou Malo ma ana galuega fai. Afio foi le tamaitai failautusi o le Palemene ma le mamalu o le aufaigaluega a le Palemene o lo o vae ma lima i ai galuega a le Palemene. O lo o faafogafoga mai foi le paia o Samoa i le tapuaiga O Le Ao Mamalu o Samoa ma le Masiifo, tainane foi le Sui o le Fono a Sui Tofia ma lana Masiifo. Faafogafoga mai foi le Afioga i le Faamasino Sili ma le aiga Faamasino i ona vaega eseese aemaise lava le faafogafoga mai a Samoa i ee ma tupu o Samoa o faafogafoga mai i lenei itula. E faigata lava ona oo se upu e opo ai paia ma mamalu o le tatou atunuu, aua o le ia e iviivia e le mafai lava ona atoatoa i se faamatalaga a se tagata, aua o paia lava mai le amataga seia oo lava i le gataaga. Ae tau ia ina faapea atu, nuunuu atu ia faatini o tausala paia lasilasi o Samoa o faafogafoga mai i lenei itula.

E fia oo lava se faamatalaga lau Afioga i le Fofoga Fetalai i le faafogafoga mai a si ou itumalo o Faasaleleaga Nu.1 Sisifo ia Iva ma ona atitala, o Salelavalu ma Lalomalava, o se itumalo e afifio ai Tupu ma Ee ia Sua ma Sa Sua, o Tusani ma Sa Tusani, aemaise le mamalu ia Sa Silafaiga. Afio ai foi le Tootoalii ma lona matua, le fetalaiga a Leauanae, le paia i le Aiga Salevalasi e pola puipui e le nofo a ituaiga ma Sasulu. Tainane foi le afifio o alo o Tagaloa, le paia lava lea ia Safune ma Taulauniu. Susu ai foi le Tamaitai ia Gatoloaifaana, le mamalu i le falefa o Atiulagi, le Gafa ia Soanai ma Patane, susu Tuilaepa.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Afio foi Tuioti ma le Toainafu ma le mamalu i le Aiga Salemuliaga, e puipui e le nofo a ituaiga ma Safuamua, Tevaga ma le faleono faapea foi Fuga ma Mauga. Faafetai tele i le tapuaiga le leoa. E lagona le mafanafana ma le tulai o le tagata faatauva ma le iloa o le faiva o lo o tapuaia. Faafetai mo la outou faatuatuag ma la outou tapuaiga.

E le mafai foi ona galo ia te au le tatalo a auauna a le Atua i fatafaitaulaga e fia i totonu o le itumalo. E le gata mo lo outou sui usufono, ae faapea foi mo Samoa atoa. Faafetai tatalo, o talosaga lava ia o lo o ae manuia ai faiva e le gata o taitai o Samoa a o si o tatou atunuu atoa. Lau Afioga i le Fofoga Fetalai, ua alu lava lenei aso o faafogafoga atu i manaoga o itumalo taitasi aemaise lava le Afioga i le Minisita o Galuega, ona ou manatu lea, ou te manatua ai la matou asiasiga e avatu ai le agaga faafetai tele i lau Afioga i le Fofoga Fetalai mo le avanoa sa ou taitaiina ai se faigamalaga a ni faipule se toaiva i le atunuu tele lea o Saina. E tele ni avanoa ua mafai ona asiasia ai lea atunuu, a o se taimi muamua lea ua toe faapupula ai le vaai ma toe manatunatu ai foi i auala ma metotia na faaaogaina e lea foi atunuu e tele lona tamaoaiga e le gata o le tamaoaiga faalenatura, ae o le tamaoaiga foi i le tulaga o le tagata. Aua masalo Saina a le sili atu pe lona lua le numera o ona tagata i le lalolagi atoa, e ova i le piliona ona tagata.

A vaavaai la i le auala na mafai ai ona atiae e se atunuu ona laufanua ma ona tagata e toatele, e le i faigofie. Ua tatou faalogo i le faa-Komunisi sa latou faaaogaina e pulea ai ona tagata, ae ua ou manatunatu, masalo o le metotia lea o le tasi o le leo sa faaaogaina e Saina ina ia mafai ai ona atiae, aua o le tele o leo e taape ma leo e tulai mai e taumafai e talepe ni mafauauga lelei, ni mafauauga tuusao aua le atiaeina o se atunuu e faigata ai foi ona tulai mai ni fuafuaga. Ua ou vaai la ia Saina, po o fea lava le mea e malaga i ai, po o fea a le mea e agai i ai, ou te le i alu i luga i se auala faaletonu, ma o le isi lea lesona na ou maua mai, masalo foi o se lesona lea na maua e o taitai, o le mea o le infrastructure ina ia mafai ona faaoo atu metotia eseese, o atinae eseese, e le gata i le taulaga ae faapea i so o se nofoaga o Samoa. Aua o tatou auala galue ia, ua ala ona ou faamatalaina le mea lea, o le taua ia malie ai lau Afioga i le Minisita i le tuu atu soo o matou manaoga, ae leaga o le taua lena, o le auga lena o le atiaeina o le tatou atunuu, ia mafai ona oo atu ona tagata e galueaiina ona laufanua.

E pei foi ou te lagona o le isi lena fesoasoani tele i le atinae o Samoa aua e le pei tatou o isi atumotu, e fia ma fia maila e va ai se taulaga po o se motu autu po o se motu o lo o i ai le faauluuluga o Malo, e fia maila e mamao ai ma nai motu ia. E goto lava la i le ogatotonu o le Faigamalo manuia aua e faigata ona faaoo atu i isi atumotu i tua. Ae peitai Samoa, o le va o Upolu ma Savaii na o le 14 maila, pe tasi lava ma le kuata itula oo foi le vaa i Savaii. Ua faigofie la ona tufa le faamanuiaga, e oo foi la i auala galue, ua le toe augatata tagata e o i uta e atiae mai o tatou laufanua aua na o le pau lea o le tatou aseta o tatou laufanua.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ma tailo i se isi motu, a o Samoa ma ona laufanua, oka se faamanuiaga a le Atua so o se mea lava tatou te mananao e tuu i lalo, e tasi le vaiaso na tatou vaaia foliga o le ola lauusiusi, aua o le faamanuiaga lena. Tatou te tagi i nisi mea, ae tatou te le o faaaogaina o tatou laufanua ma le tatou tofi o le tatou meaalofa fua mai le Atua.

O le mea la lea lau Afioga i le Minisita mo Galuega, ia malie mai lava i le tatalo atu pea, ae pei o le agaga lena, ua avea foi auala galue e le gata ina galulue ai a ua faapea foi ona agai atu i nofoaga o nonofo ai ina ia o ese mai tai i nofoaga ia e lalata i le sami, aua o lenei lava vaitau ma le suiga o le tau, ua le o toe sefe lava nofoaga tu matafaga ma lalata i le sami ona o le siisii o le tau.

O le isi vaega ou te fia talanoa i ai lau Afioga i le Fofoga Fetalai ou te fia tauagai atu lava i le Minisita mo Aoga, Taaloga ma Aganuu. Faamolemole lau Afioga i le Minisita, matau pea lava ma vaai i se avanoa e mafai ai ona fau se fale taalo i Savaii, o se fale taalo e tauatiae ai foi nai taleni laiti la o lo o i ai i Savaii. Ou te lagona o le tulaga o taaloga e pei ona i ai le netipolo, e i ai foi le squash, e tatou te le o iloa lava o lo o i ai lava ni nai siamupini la o lo o i ai i totonu o Savaii i alo ma fanau o lo o i Savaii, ae o lo o taotaomia ona o le leai o se nofoaga e mafai ona o e atiae ai faalelei ia ia foi taleni eseese o lo o latou maua.

E moni lava o lea e i ai lakapi, lea ua lelei ia malae lakapi ae eseese isi mau taleni e tofu lava le tagata ma taleni e foai mai e le Alii, ae o tatou e faafaileleina ma taumafai e maua auala e atiae ai taleni faapea. E pei o se talosaga lena i lau Afioga i le Minisita o Aoga.

Ia lau Afioga i le Minisita mo Punaoa Faalenatura ma le Siosiomaga, ia ua taatia atu lava nai talosaga i ni apitagalu o si ou itumalo. E silafia lava o le tele lava o e o lo o afifio ai, o lo o taulalata lava i le sami ia ma ua tele lava le afaina i lenei vaitau se i tagai ane i ai pe i ai lava ni nai vanoa e mafai ona faatino lenei faamoemoe.

Lau Afioga i le Minisita mo Tagata Tafafao Maimoa Mai Fafo, e avatu lau faafetai tele, i se tofa ua ae, e pei ona afio atu ai foi le Afioga i le Palemia e tatala le Miss Samoa o le a faia atu nei i Savaii i le Teuila. Ia e moni lava o lea ua outsource foi lea vaega i le Samoa Events, ia ae amatamea mai lava lau Afioga ma le Pule Sili o le Matagaluega ia ma le aufaigaluega o Tagata Tafafao Maimoa Mai Fafo. E ala la ona ou faafetai, ona o lea foi ua i ai le auala o le a tatala atu ai faitotoa o Savaii e maimoa atu foi e le gata i lo tatou atunuu ae faapea foi e o le a asiasi atu ia i laufanua matagofie o Savaii ma tagata aulelei o lo o nonofo ai. O lea e faafetai tele mo lea avanoa ma lau miti ma lou faamoemoe, masalo e le o toe mamao ae fai atu ma le Miss Pacific i Savaii. Ia o se moomooga taua tele ma moomooga lelei na mo si o tatou motu i Salafai.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E aoga foi faapea se i vaavaai foi Savaii, e i ai isi mea matagofie e ono tupu mai ma tulai mai i lo o mea nei o lo o tatou faalogologo i ai, ne i faapea e faapea uma lava tagata Savaii, ae leai e i ai lava nai mea manaia e mafai ona tulai mai leaga o le motu tele e tetele ni mea e tutupu mai i totonu o Savaii.

Lau Afioga i le Minisita mo Matagaluega Tumaoti, lea o lo o gafa foi lau Afioga ma le tatou vaalele. Ia ae le gata i ina foi, o lo o lagolagosua foi i le Minisita o Galuega Eeseese, i le tatou malaevaalele fou. Faafetai tele lava ma faamalo atu i le matagofie aua e pei o foliga na o Samoa e tau loa i ai ni tagata ona iloa o se atunuu e fai mea mafai. O se atunuu e le o... sa tau lava a ta fesili nei a ta talanoa nei i se tagata tafao maimoa mai fafo, e faapea o Samoa o se Third World Country. Ona ou faapea lea, o le a le uiga o lena tala o le Third World Country? E pei e i ai se isi lalolagi e tuu i ai ia nai atunuu laiti ia. Ia ae ua omai nei vaavaai ia Samoa, oi e leai. E tutusa lelei lava mea o lo o maua i Samoa ma mea e maua i Aukilani ma Sydney o Sini e leai lava se eseesea ae pei o mea o vaiga muamua ia, e tau mai loa, e iloa ai lava i ina le atunuu e atiae i le atunuu ua atiae, e i ai la si o tatou atunuu.

E avatu ai lau faamalo tele, lau Afioga i le Palemia, aua o oe lava o lo o taiulu i galuega lelei uma nei. Malo le tau, malo foi le faamalosiua foi, malo le saili, aua o le saili lena e fesoasoani mai ai nai atunuu tetele, e tatou te le tagolima ma mafai ai ona faatino ia tatou miti ia ma tatou faamoemoe.

Ia lau Afioga i le Fofoga Fetalai, e le tele ni manao o si o matou itumalo, e pei lava ona faamatala atu i se taimi ua fano, ia ua leva ona taatia ia nai talosaga i le Afioga i le Minisita o Galuega e tusa ai ma auala galue, ia faapea foi le Minisita o Siosiomaga mo nai apitagalu. Ia o lena foi ua tuu atu foi nai moomooga fou mo se faletaalo mo Savaii, ia talosia ia ia mafai ona talia ia nei talosaga i le faasoasoina o le tupe i le Minisita o Tupe.

Ia e leai lava se tala e oo i ai, e pei foi ona ou tautala i nisi o Tala i le Tupe ua fano, e leai se tala a Faasaleleaga.1. i Sisifo leaga o le Faasaleleaga.1. i Sasae o lo o faafoeina le mea lea. Ma ua lava lava lena e avatu ai lau faatuatuaga ma le ioe i mea uma lava e te faia Sili, e silisili lava mea e faia e Faasaleleaga. Faafetai tele lava lau Afioga i le Fofoga Fetalai, manuia le Fono.

**FOFOGA FETALAI:** Malo, faafetai saunoa i lau Afioga i le sui usufono mamalu. Ia ua oo mai le faasologa e pei e manaia le felafuai. Ia ae afai foi a maea loa le itu lea i tai lea e faapea o le Itu o lea e aga mai i le Malo, ia ona tali loa lea o le Malo e tusa ai o le Tala Faatatau Autu o le Tupe.

Ia pei e manaia ona faamotu mai le itu i tai, lafo loa i le Malo. Ia malo, tulai mai lau Afioga i le sui usufono mo Salega i Sisifo, lau Afioga Toomata.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

**Afioga TOOMATA AKI TUIPEA (Salega i Sisifo):** Faafetai i lau Afioga i le Fofoga Fetalai mo le avanoa ua maua e lenei itumalo, e fai atu ai sona sao mo le Tala Faatatau Autu o le Tupe 2018/2019. O paia, sa ma faiga o le Maota aemaise tapuaiga ia Samoa, mai mauga maualuluga seia paia mauga maualalo e tumau e oo i le faavavau. O le a le oo foi la i ai se leo o Salega i Sisifo, aua pe oo i ai pe leai, e leai lava se iota e toe faaopoopo pe toesea.

Ae momoli le agaga faafetai tele i le o lenei itumalo i le Taitai o le Malo, le Sui Taitai ma le Kapeneta, aemaise lava le Minisita o Tupe ma le Matagaluega o Tupe faapea Faaululuga uma o Matagaluega a le Malo, ma Pulega uma o lo o fai sao i le tau tapenaina o lenei Tala Faatatau o le Tupe. Faamalo le tauatai, faafetai le lototele. E pei lava ona fai ma anavatau, o le Tala o le Tupe, e manatu autu, e lagolagoina e lenei itumalo, Tala Faatatau Autu o le Tupe, Tala Faaopoopo o le Tupe, 2017/2018 ia ma le Tala o le Tupe 2018/2019.

A vaavaai atu i a tatou tupe maua, o le aofaiga o le Tala Faatatau o Tupe, \$932, 000,000. O le 67% o lea Tala Faatatau o le Tupe o lo o faalagolago lava i tupe o lo o maua i totonu o lo tatou lotoifale. O lona uiga, e le o faalagolago tele i nonogatupe. 24% o lo o maua mai i fesoasoani mai fafo. Ou te faamalo i lau Afioga i le Taitai o le atunuu, i le saili ma le aisi, aua ana le seanoa la outou taumafaiga, semeamanu e tele se faalagolago a Samoa i nonogatupe.

Faafetai, faafetai tele, i le vaavaai a lenei sui usufono, \$932,000,000 e le taitai ona gafatia ai faamalieina manaoga o tagata. Ae faafetai i le fuafua tatau e le Malo o lenei Tala Faatatau Autu o le Tupe, e le gata ina fua i ana tupe maua, fua i fesoasoani, fua foi i nonogatupe ina ia gafatia e le Malo ona totogi. O se fiafiaga foi o lou nei sui usufono, i le totogiina o nonogatupe a le Malo, i faletupe i fafo o lo o sologa lelei. Ma o lo o mafai ona ausia tapulaa e mafai ai ona totogi ma talia e faletupe i fafo talosaga a le Malo o Samoa.

E talitonu foi, e mafai e le Malo o Samoa ona talosaga nonogatupe e sili atu ao lo o maitau atu, o lo o fuafua lelei lana Tala o le Tupe ma ana nonogatupe ina ia gafatia e lo tatou tamaoaiga o lo o maua ona toe totogi. A fuafua i tupe o lo o totogi i tausaga mo nonogatupe e faatusatusa i ana tupe o lo o maua i totonu o le atunuu o se pasene laititi.

E le o faalagolago foi i tupe o lo o maua mai i fesoasoani, po o nonogatupe e toe totogiina ai ia tupe mo ana nonogatupe. I lau vaavaai atu i ai, \$600,000,000 o lo o maua mai i totonu lava o le atunuu ona tuu lea i ai faatusatusa i ai se pasene o le tupe o lo o alu mo le totogiina o ana nonogatupe, pe a ma le 20 ma ona tupu pasene. O lona uiga o lo o tele lava ia tupe o lo o mafai ona maua i totonu o lo tatou atunuu, e faasafua atu mo le totogiina o ia nonogatupe. Faafetai tele i ia fuafuaga lelei.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ou te faafetai ai i Matagaluega aemaise lava i le Matagaluega o Faatoaga, lau Tofa Lopao aemaise lava le Ofisa Sili o le Matagaluega ma le Pulega, i le maitau atu i galuega sa faatino i le 2017, 2018, e tele galuega sa faatino. E tele foi taumafaiga o lo o taumafai ai, ina ia fesoasoani ai i le aufaifaatoaga ma le aufaifaiva o le atunuu. O lo o faapena ona atagia ai e le o manatu mama le Malo i le faiva alofilima o le aufaifaatoaga ma le aufaifaiva ma i latou uma o fitaituga i le galueina o le elele faapena foi ma le sami, aua o i e faaalagolago i ai lo tatou tamaoiga. O lo o maitauina foi i polokalame o lo o faataatitia e le Matagaluega o lo o i ai lava tulaga o lo o fuafuaina auala lava le lagolagoina o lea tulaga ina ia faapena ona faatosina tagata o le atunuu e galueaiina le lauelele. Faafetai. Na pau lava o lea, ia taumafai ina ia faapena ona tofufusia itumalo uma e le gata i Upolu nei a ia faapena foi i Savaii. Ua maitauina foi ua i ai le fuafuaga a le Matagaluega e toe faaleleia le auunaga a le Matagaluega i tua i itumalo e ala lea i vaega o lo o i ai fale o lo o i ai asiasi itumalo o se fuafuaga lelei ma le poto, e avatu ai se tuualalo a Salega, faamolemole, ia alofagia e i ai nai fanau lea ua iu mai aoga i latou vasega i kolisi i le Vasega 12 ma le Vasega 13 e le o maua ni latou galuega, e le o maua foi ni avanoa e ausia ai maka mo le NUS. E talosaga atu ai i le agaga faaaloalo se i silasila i ai itumalo taitasi ina ia faaoga nai ia fanau, ia ave i ai le practical training i mea tau faatoaga, ae le gata i lea o lafumanu. E taua tele le auunaga lea e le o mafai ona faatino uma e le Matagaluega, ae a i ai nai tamaiti ua iu mai kolisi e avatu e faaoga i ai e ao i ai le tomai o le tou Matagaluega ona nofo lava lea o le tamaititi e faaoga e ave e faigaluega i tua e auuna ai i le aufaifaatoaga ma tuu i ai sina seleni e fesoasoani ai. E le gata foi i lea, ua maitauina le taumafaiga a le Matagaluega o se taumafaiga e tape le manuainiu, o se taumafaiga lelei. A o le vaavaai a lou nei sui usufono, e le taitai lava le vaegatupe o fuafua mo lea galuega tele ma le taua. Sa fesiligia le Matagaluega ae faapea e i ai nisi fesoasoani e maua mai paaga mai fafo e ono fesoasoani ai i le sao lea o le Malo ae se i vaavaai lelei po o lava lena seleni ae se i o e sailiili. Afai lava ua tape le manuainiu ia matua o e tape, a maua le seleni, ia ave i nuu e faatosina ai latou e o e fai le galuega lea i lo le tau o atu o tagata faigaluega a le Malo e faatino lea galuega. Ua maitauina foi ua amata ona faateleina le togafai, o lea lava atinae sa alu alu i le isi taimi ua muta ona o le tele o faamai o lo o aafia ai. Ma e maitauina e lou nei sui usufono ua i ai fuafuaga ma ua i ai foi faifaatoaga ua latou atiaeina lea foi tamaoiga ma lea laau toto e aoga mo le atiaeina e le gata i le fofoga taumafa ae aoga mo le auina i fafo e maua mai ai tatou seleni.

I le itu tau manupapalagi, ua maitauina le lelei o nisi fuafuaga e ala lea i le taumafai atu i le taavale foi lea e alu atu i tua e fesoasoani i le fasiina o manu a le aufaifaatoaga. Ae pau lava se taumafai atu i lau Afioaga, o nai manu foi lea mo le motu i Salafai ona o lea e maua o lo o atiae manupapalagi a le Matagaluega i Togitogiga ma uta i Avele.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

E tele le aufaifaatoaga o lo o manaomia le fia avatu o manu, a o le faalavelave e leai se auala o le Matagaluega e kiliva atu ai manu i tua. Sa i ai loli i aso ia, sa faapena foi ona fesoasoani le faleoloa o faatoaga i le kilivaina o manu i tua ma Savaii a o lea ua maua ua leai se auaunaga faapena. E le o faigata foi i luga o vaa ona alu atu lava o le tagata ia ma lana manupapalagi e le tau faailoa atu le mafuaaga, ae talosaga atu se i silasila ane pe le maua lava se loli e fai ni pusa i luga e ave ai nai manupapalagi e feaveai e le gata i Savaii, a o totonu foi o le motu nei o Upolu. E avatu ai se tuualalo i lau Afioga se i e silasila ane i lea tulaga.

Ou te faafetai atu foi i le polokalame o le koko, e le tau faailoa le koko aua lava le atinaeina o si o tatou atunuu. Pei lava ona outou silafia le Tala o le Tupe, e tele lava ina faalagolago i tupe mai lafoga ma tiute ae le o i ai se sao tele o le tulaga i mea tau faatoaga. E manaia le polokalame lea ua faatino nei. Ona ou see atu lea... A i ai se isi mataupu ou te manatua, o le a ou musumusu atu i se aso ma lou faaaloalo, ae o le a ou see atu i le falemai.

E momoli le faafetai tele a lenei itumalo i le tulaga ua i ai falemai i tua. Tailo i nisi falemai i tua i Upolu, a o Savaii, sa faatino le asiasiga a le Komiti o Tupe, sa maitauina ai le tele o le suiga ua i ai i falemai i tua i le tulaga lea o le supply ina o mea o vailaau. Ou te manatua o le talosaga muamua a lea a lou nei sui usufono ma sui usufono mai Salafai, ina ia alolofa le Malo, afai e fia ola ma soifua umi se tagata i Upolu, e faapena foi i Salafai. O lea la ua maua i le asiasiga lata mai nei, ua matua lelei lava le tulaga o le supply o vailaau i tua i falemai i Savaii. Na pau lava le mea o lo o misi o fomai, a o lea lava e malamalama i le tulaga o le tuuitiitia o tatou fomai, a o lo o i ai lava le fomai o lo o tausavali atu i vaiaso uma i le motu tele i Salafai ma fai ai togafitiga.

O le isi itu ou te fia faamauina, o nai teine tausimai. Sa maua i le asiasiga, e i ai nai teine tausimai i o i le falemai lea i Sataua, atonu foi e faapena ma Safotu. O le tele o taimi a le maua se taavale a le Malo e afifio ai i tua e fai asiasiga, ua faaoga lava a latou taavale ona o le latou manatu i le auaunaga ina ia faaauau le mamalu o le atunuu. E le gata foi i lea, e alolofa i tagata o le atunuu e le lava le faasoa, o le isi toeaina ma le loomatua e gasegase lava i le fale ma nofonofa ai lava, ua leva ona fia oo i le falemai ae leai se tupe e alu ai i le falemai. O le mea la lea e faamau ai le faafetai tele i le vasega o tausimai mo lea galuega lelei o lo o faia. Ona ou manatua ai lea o le tulaga o lo o i ai le falemai lea i Sataua faapea foi ma Salega, e tasi le taavale o lo o faaogaina, le taavale foi lea o le ambulance, o lo o i ai se faamatalaga faapea ua avatu le faatonuga i Upolu, a fia utu le penisini o le taavale, ia alu i Salelologa. O lo o i ai le pamu penisini a le Afioga i le Minisita o Faatoaga i Asau. A fuafua i le umi e alu ai le taavale i Salelologa e utu ai toe sau, oi sole, e le mafaufau ma le fuafua lelei lea faaiuga aua e oo mai i Sataua, toetiiti uma le penisini.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ae le gata i lea, e o ai foi ma tagata faigaluega ae tiai ai le tiute e tatau ona fai i le falemai. Se i silasila ane po o ai e ona lea faaiuga, faaaoga le pamu a le Afioga i le Minisita, e leai se afaina e le o i ai se conflict of interest, a o le availability ma le convenient, e tatau ona faaaoga.

**FOFOGA FETALAI:** Se i tulai mai le Minisita mo Faatoaga leaga e matuia le tuuaiga.

**Tofa Hon Lopaoo Natanielu Mua:** Lau Afioga i le Fofoga Fetalai, e musu lava e faalavelave i le saunoaga a le sui usufono, na o se mea fia faasao lava i le mataupu lea, e le o toe i ai se pamu a le Minisita o Faatoaga i Asau, o la e ua ese le tagata la e ua faia le pamu ne i te i ua aveseseina le mataupu lea.

**Afioga TOOMATA AKI TUIPEA:** Faafetai. E leai, e le o se complain, o le fautuaga i le tagata na faia le faaiuga lea, na faaaoga lelei le faautautaga tatau. E le o le alu i Salelologa e fia penisini e alu ai ma o atu ai ma tagata faigaluega e tietie ai, a o la e latalata mai le pamu penisini na o nai tamai iata lava e alu atu ai po o nai maila i Asau e utu ai. O ituaiga faaiuga lea, aua a fuafua i le tausaga o sau lava le taavale i vaiaso uma i Salelologa e sau e utu ai, o le tasi lea vaega o le Budget o le a alu ai. O le mea la lea e fautua atu ai ma le faaaloalo po o ai na faia nei faaiuga, se i silasila faaaoga lelei le faautautaga tatau ma le mafaufau. Ma lou faaaloalo lava.

Ia, lau Afioga i le Minisita mo le Soifua Maloloina, e i ai nai vaivaiga sa tulai mai ma maua e le Komiti, e tele gasegase o lo o gasegase i uta i le falemai, a oo lava ina tea, e fiu e faatali se isi e sau e avatu lona pili ona savalivali lava lea ua tapena lana atopau ma ona lavalava, savalivali i le fale e le totogia. O le mea lea, atonu ana faapea e totogi uma na pili, semanu e tele se sao i na tupe maua. O le mea moni, e i ai e molimau i nei mea, afai e toaselau tagata e o le totogia pili, o lona uiga e lava ai totogi o isi fomai, ae se i silasila ane lau Afioga e le o se compain a o se fautuaga.

Ona ou see mai lea i lau Afioga i le Minisita mo Galuega, Felauaiga ma Atinae Esee, ou te talitonu ua faasoesa i lau Afioga manaoga o sui usufono, ua manao, manao, manao, a o fea le mea lea a aumai ai le tupe? E leai sou faletupe e te alu e sue mai ai le tupe, a o matou lava e matou te vaavaai i mea e tatau ona faaleleia, aemaise lava auala galue. Na ou sau muamua, o lau lauga muamua a lea i totonu o le Palemene, alofagia auala galue o si o matou itumalo. Ou te to lou pulou ma ou faafetai o lea na e saunoa mai i le aso lenei, o lea foi ua tusi i totonu o lau diary, o lea ua i ai le fuafuaga o auala mo si ou itumalo. Faafetai. Malo le pule. Ou te faapea atu ai, logo mai au pe a i ai se aso e te afio ai i Savaii, ta o lelei i Savaii, leaga ua tau le galulue tagata i uta. Masalo a e silasila i tai i le auala lea alu agai i Falelima, o tagata na o le matou nuu lea sa galulue i uta, ua omai galulue i tai ona o le faigata o le o galulue i talane o le auala tiga ona le ola lelei ni mea, a ua taumafai lava e galue le eleele ona o le faigata ona o i uta i le aega.



19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ia, ae tuu ai ia puaa aivao faitalia le matou nuu ma o e tuli e le o se faafitauli lena a le Malo. E toe faamanatu atu i lau Afioga, sa ou musumusu atu i lau Afioga e toe faamanatu atu le auaunaga a le Pulega o le Suavai, ou te talitonu o lena e te manatua lau saunoaga i le isi Fonotaga talu ai, e le mafai ona see ese masini mai o i lou itumalo seia vagana auala ua uma ona toso vai i nai aiga la e i uta i auala galue e le o oo i ai se suavai. O lea la e toe talosaga ma lou faaaloalo, ona ai ua avea le afa o Gita, lea na o ese faafuasei ai masini ai ona ua uma le isi o matou nuu, ae le i faia Fagafau, o Samataiuta, o Fogatuli ma Faiaai. E le toatele tele. Ae faamolemole lava, leaga e pei o le a faitioina le sui usufono, faapea ua ou fai mea faapito i lou nuu, ae ua uma ona folafola i ai, ua uma ona saunoa mai le Afioga i le Minisita, e le se ese masini pe atoa lava le ono masina o iinei, seiloga lava e uma ona fai ia paipa o si ou itumalo. O le mea la lea, faamolemole e leai lava nisi mea e tele o tagisa atu ai le itumalo lenei, e le o tagisa atu i ni taligalu po o nisi lava mea, e pau lava o lea, na o le vai, auala galue, ia ma nisi mea laiti.

**FOFOGA FETALAI:** Malo. Toe lua ou minute.

**Afioga TOOMATA AKI TUIPEA:** O le mea la lea lau Afioga, e faataatia atu i ou tafatafa manaoga o lenei itumalo, ma lou faaloalo lava.

Ou te talitonu ia o se mea o lo o fia taua ai lau uo le Minisita mo Aoga, Taaloga ma Aganuu. Ou te faafetai i le Matagaluega, e ui ina tele nisi atinae ma nisi mea o le a ou le tolaulauina atu, ae o le mea e faapito lau faafetai, ua i ai se fuafuaga a le Matagaluega e faafaigaluega ni tagata foi na e pei o se pool o faiaoga e fesoasoani atu i le utiuti o faiaoga, pe afai ae o e mamai, ia pe o foi e ave o latou maternity leave, o se fuafuaga lelei, aua e le mafai ai ona tiai tamaiti, ae ua i ai se fuafuaga ia solo lelei aoaoga o tamaiti, ia e momoli atu le faafetai, faafetai tele i lau Afioga.

Ou te talitonu e toe tasi lava lau Afioga i le Sui Palemia, lau Afioga i le Minisita mo Punaoa Faalenatura ma le Siosiomaga. O le talosaga ma le faaaloalo, e i ai le mea lea o lo o i ai i Sinamoga, e pei ona silafia e lau Afioga o lo o i ai le vaiatafe. O lea vaiatafe ua tele ina faaleagaina ai ia auala laupapa, aemaise foi o le lamatia ai o le soifua o e o lo o nonofo latalata i le vaiatafe. Sa ou savalivali atu i lou ofisa ma ma feiloai ma le Afioga i le Ofisa Sili lata mai nei, ae na ia faapea mai, ua uma ona fai le survey, sa ia tuu mai tuuina mai foi ia te au le kopi o le lipoti o lea survey, survey lena i le faaleagaina o autafa o le vaiatafe, aemaise o le aia o eleele o lo o i autafa o le vaiatafe. Leaga na ou vaai i le lipoti, o lea e amata mai i tai i se isi vaega, ae le o taitai ona oo atu i uta i le mea o lo o i ai tagata o lo o mafatia mai lava i le pa mai o le vai ma afaina ai. O le talosaga aua o lea e tau fuafua se pa sima i tai, a o le talosaga e faauu atu i lau Afioga, i gauta, e manaomia lava ni nai maa tetele e taofi ai le aia o autafa o le vaiatafe ma toe faaputu ai le saogalemu o le soifua o tagata o lo o i ai, o nai tagata e le lava le tamaoaiga.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ona faauma ai lea o se faamatalaga lau Afioga i le Fofoga Fetalai, ou te fia faafetai isi ou itumalo pele o Salega i Sisifo, amata mai lava i Fagafau Alo o Lilomaiaava, Sefe ma Tilamafaga, Tuimaugapo ma lo outou aiga, aemaise foi le Falefa o Sasoa ma Samai. Fogatuli, afio lau afioga Afualo ma le Toafa ou alo, lau fetalai Faimanu o le fofoga o Usoalii. Faiaai, afio lau afioga Fualalo ma lo outou aiga, afio Tilafono ma le Faavaoga, afio Gisa Sua ma Fepuleai o le Aloalii. Lau fetalai Tuisalega, o oe e te teu vaatele i le itumalo. Oo mai isi ou nuu o Samata, lau afioga i le sao Toomata, le toafa o alii i tai ma le toatolu o alii i uta, ae faapea le mamalu ia te oe Sa Leutogipoe, na matua i ai le Faleupolu e fa o le tofiga.

Ia lau Afioga, faafetai tele ia manuia lau Paeaiga, foai e le Atua ni aso se tele ma le malosi i le tino ma le mafaufau, e tautua ai mo lona atunuu. Soifua.

**FOFOGA FETALAI:** Malo faafetai saunoa. Ua faafofoga tapuai mai le itumalo, a o faapena ona avatu le sao o le itumalo i le latou fola i luma e ala i le Afioga i le sui usufono mamalu. Malo faafetai saunoa.

Ma e ua faapena foi ona avanoa ia se isi sui usufono e tulai mai e saunoa e faaiu ai a tatou galuega o lenei aso. E manaia le taimi lenei o lena e faafofoga tapuai mai le atunuu ina ua maea foi taimi o tapuaiga o le afiafi.

Ia tulai maia lau Afioga i le Sui Fofoga Fetalai, le sui usufono mamalu mo Gagaemauga Nu.3, ia alo ia ia manuia le saunoaga.

**Afioga NAFOITOA TALAIMANU KETI:** Ua se toa ma lau Afioga i le fitaituga aua le tiute o le Nofoa. O le ala lea o le lagalaga ma tatala maea o le sa o Matautu, sau fesoasoani i le tiute ma le faiva, aua e le o se faiva e faigofie lau Afioga i le Fofoga Fetalai i le faafofoeina o le Fonotaga o le Fonousu, le tofa sasaa se i sasaa le fafao, se i fofola le fala e pei ona e saunoa, aua manaoga o itumalo taitasi.

O le ala lea na ou manatu ai e ui lava ina utiuti le vaai atu i le taimi, ae taua le taimi i le tofi o Matautu o Gagaemauga Nu.3.

Lau Afioga i le Fofoga Fetalai, ana le seanoa le filivaa ai o le safolau o le sui filifilia o Gagaemauga Nu.3, aua le fitaituga i lenei aso se i faafofoga Samoa aemaise le Maota. A oo ina talanoaina loa le Tala o le Tupe aua le tamaoaga o le atunuu, e leai lava se sui faipule e le tapenapena malie i ai lona vaa. Aisea? Aua e le gata i manaoga o le atunuu a o manaoga foi o le itumalo. O e na tusilima ma tusiaao fai oe ma o tatou sui, ave le Nofoa i Tiafau tauave e pei ona i ai lenei afiafi.

Ae ua ou manatu se i matou faafeiloai ma faatulima lau Afioga i le Fofoga Fetalai, sa e momoli lapalapaomalo i le taeao ua sola, se i faafofoga le Atua e Ona le malosi uma lava, i Lana tausiga i le soifua ma le ola. E i ai le manatu e faapena se lagona o le itumalo lenei, le Alii e, e ia te Oe pea le viiga o mea uma, aua ne i i le tagata, ae ia fai le tagata ma viiga o lau Afioga. Faafetai tele i le taeao ua sola.

19 IUNI 2018

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Lau Afioga i le Taitai o le Maota, matou te faafeiloai atu, ua vela le fala, malo onosai, malo le faatoatoa. Lau Afioga i le Sui Palemia, le aiga Kapeneta Minisita Lagolago i lena itu o le malu, malo le faatoatoa. E faafeiloai atu lenei itumalo. E le po malae i le silasila a le atunuu i lo outou fitaituga, leai. Ae ua molimau lea aso ma lenei aso e pei foi ona molimau lena vaiaso, e tautala galuega, malo fai o le faiva, malo le tauatinae, ia aua ne i ia te i tatou, aua ne i ia te outou, a o mea lelei uma ua ofoina mo le atunuu mo ona tagata, fai lena ma viiga o le Atua.

O lenei itu o le malu e faafeiloai lenei itumalo, a outou Afioga i Taitaifono o Komiti Faa-Palemene, aemaise lau Afioga i le Taitaifono o le Komiti o Tupe, o lele ua manino le mata o le vai, na matou molimau ma matamata i la outou Lipoti e tusa o le Tala o le Tupe, tausaga e 2018/2019 o lea foi ua toe faaopopo mai ai ma le Tala Faaopopo o le Tupe i lena tausaga 2017/2018, ia matou te momoli atu le faamalo ma le faafetai. Malo le onosai i tiute ma faiva, ua matou molimau i aso uma le gasolo mai o ofisa ma Matagaluega taitasi se i fai se sao, a o lea ua taoto le galuega sa fitaituga i ai. Ia faafetai laia i le Atua, o Le na aumaia le poto ma le atamai e faatino ai la outou tiute ma la outou faiva, o Komiti eseese o le Palemene, malo faafetai, ia afe atu i ai sa matou faamalo.

O le tapuaiga a le atunuu leleoa, o le atunuu mamala, Samoa ua Faavae i le Atua, e le galo i sa matou faamatalaga e ala i la matou tulai i lenei afiafi. Afio lau Afioga i Le Ao Mamalu O Le Malo ma lau Masiofo, afio lau Afioga i le Sui o le Fono a Sui Tofia ma lau Masiofo, ae a lau Afioga e tolu i ai itu tetele Faatauagai a le Malo lau Afioga i le Faamasino Sili, alii ma tamaitai o le Faamasinoga, aua o lea matou te potopoto ma le Afioga i le Fofoga Fetalai ma le Palemene o Samoa e faapena foi lau Afioga i le Palemia le Executive, le Aiga Minisita. Lau Afioga i le Faamasino Sili ma le Matagaluega o Faamasinoga, matou te ofo alofa atu ma faatalofa atu. O le atunuu le paia aua Tama ma Aiga, Aiga ma Tama, le Usoga a Pule ma Tumua, Ituau ma Alataua, Aiga i le Tai ma le Vaa o Fonoti, matou te faatalofa ma faatulou atu, ne i tapisa le tamaloa Salafai, ae matou te faaaloalo i la outou faafofoga tapuai mai, malo tapuai, malo tatalo, manuia faiva o le Taitai o le Malo ma le Palemene, lea ua matalupe ai le seuga i lenei taeao.

Ia e le alu loa foi e ao ona matou faatalofa atu i Faauluuluga o Matagaluega a le Malo, e le alu loa sa matou faamatalaga leaga o outou o lima ma vae, o le malosiaga lea o le Aiga Kapeneta, malo fai o le faiva, malo onosai, tele faitioga, a o faitioga e atili ai ona lelei le auaunaga ma le tautua. Ia faafetai le galulue.

Ona afea lea o lou itumalo i se matou talanoa, lou itumalo pele Gagaemauga Nu.3, le paia mai le Fanuatanu ma Asofaatau o Matautu, Siliga ma Faafalemaoi, Futu ma Leuo, Vaivaoa ae a Malae, ma Maloamata Tulaga ma Punale, ae matua le Tuu i lou Falefagamalo lea e te tiu ai.

19 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

O oe o le Muaautasi o oe o le Muaaufaalele, aua le Aiga Sa Peseta ma lo latou Maopu, le Nofo a Usoalii le Faleiva ma lou Igoatau Matautu, o oe lava o le Muaautasi o Salafai, o le Faamalugaomalo. Malo tapuai mai, ua maua se vaivai o la outou tofi, e le mafai ona outou tuulafoaia i a outou tatalo. O le mea lea e faafetai ai mo lenei avanoa ua maua. E le mafai foi ona ou tulalua ma faaleiloga i sa matou tala i le paia o le Afaigaluega galulue, o outou o le Auositaulaga e tu i le va o le tagata ma le Atua soifua. Malo tatalo, malo onosai, o a outou faamanuiaga ua maua ai se upu o la outou tofi, aua le mamalu ma malu tauee ma paia o le Maota o Tiafau, o le Maota o le tagatia a le atunuu, faafetia le manatu mai. E itiiti lava taelega i le silafaga paia a le Atua.

Lau Afioga i le Fofoga Fetalai ona taumafai lea o sa matou faamatalaga e tusa o le Tala Autu o le Tupe o lenei tausaga 2018/2019, ae i ai lava lou lagona e i ai lava si mea e fia oo i ai se faamatalaga a Gagaemauga Nu.3, e fia momoli ai le faamalo i le paia maualuga i le Taitaifono ma Faauluuluga o le Ekalesia EFKS, o mea lava e tulai i Apia nei Upolu nei ma Tumua nei, e lagona mai Salafai, faafetai mo mea uma, ua matou maua faamatalaga, ua maea la outou feiloaiga ma Taitai o le Malo. A o le iuleo na matou maua, ua taotoga malie ma sologa lelei mea uma. E leai se mea e faigata i le Atua. Malo le faatoatoa, malo le silasila i le lagi. Ua matou maua tala, leai se mea o gase ua taoto mea uma i tulaga o i ai le Faigamalo. O le mea lea faafetai tele i lau Afioga i le Taitaifono. E afua ona ou talanoa lau Afioga i le Fofoga Fetalai, leaga o Avao o le nuu na liliu ai le Tusi Paia, na manino ai mataitusi ma iloa ai le suafa mamalu o le Atua le Tama, le Atua le Alo ma le Atua le Agaga Sa. A lea ua faavae i ai le atunuu. O le ala lea o le oo i ai o sa matou faamatalaga lau Afioga i le Fofoga Fetalai faamalulu atu.

E na ona matou faafetai lava ona see lea o le matou vaa, se i folau i le ogasami loloto lea e taoto mai i ou luma. O le matou tatalo a lo matou itumalo o Gagaemauga Nu.3, lau Afioga i le Taitaifono, aiga i Toeaiina ma le mamalu o le Ekalesia, o outou mama na. Faafetai le tausī mealelei, faafetai i le tausī i le feau a le Atua. O e fai mea sili e taua i latou o fanau a le Atua, latou te faatupua le filemu o le atunuu, lea ua i ai le taotoga o iasa, ia ma ua taoto i lagotonu o mea uma. To le pulou, faafetai tele.

**FOFOGA FETALAI:** Ia ua maua atu o lea ua tuta lou sa, i le tulaga o le faafetai i le Afaigaluega i le tapuai mai o le Ekalesia EFKS, ia e lagona le agaga faagaetia i lenei afiafi. Ia logo i tino foi matagi lelei, a ua sausaufialele foi le manu na i Utufiu, ina ua patipati taoto le Feepo. O le mea la lea ia malo faafetai saunoa i lau Afioga i le Sui Fofoga Fetalai.

*19 IUNI 2018*

**Tulafono Tau Faaofi o le Faatatauina o Tupe Faaopopo (Nu.2)  
2017/2018 ma le Tulafono Tau Faaofi o le Faatatauina o  
Tupe 2018/2019 – faitauga faalua**

Ia ona i ai lea o le manatu ia e lelei ona papaaveloa loa lau saunoaga, ia faaiu mai loa le tatou Fonotaga i se tatalo.

*Na motusia Felafolafoaiga ina ua tolopo Taulumaga a le Fono Aoa o le itula e 7:00 i le afiafi seia aulia le itula e 9:00 i le taeao o le Aso Lulu, 20 Iuni 2018.*